

IBUKU RĪA KEERĪ RĪA SAMŪELI

Daudi Kwirwo Ūhoro wa Gīkuū gĩa Saūlū

¹ Na rīrī, thuutha wa gīkuū gĩa Saūlū, Daudi agīkorwo aacooka kuuma kūhoota Aamaleki na agīkara kūu Zikilagi mīthenya īrī. ² Mūthenya wa ītatū-rī, hagīuka mūdū oimīte kambī-inī ya Saūlū, arī na nguo ndembūkangu na rūkūngū mūtwe. Hīndī īrīa aakinyire harī Daudi, akīngūithia thī nīguo amūhe gītīo.

³ Daudi akīmūūria atīrī, “Wee uumīte kū?”

Nake akīmūcookeria atīrī, “Nī kūūra njūrīte, ngoima kambī-inī ya andū a Isiraeli.”

⁴ Daudi akīmūūria atīrī, “Kaī gwīkīkīte atīa? Ta njīra.”

Nake akīmwīra atīrī, “Andū nīmorīte makoima mbaara-inī. Na andū aingī nīmooragītwo. Nake Saūlū na mūrīū Jonathani nīmakuīte.”

⁵ Nīngī Daudi akīūria mwanake ūcio wamūreheire ūhoro ūcio atīrī, “Ūmenyete atīa atī Saūlū na mūrīū Jonathani nīmakuīte?”

⁶ Mwanake ūcio akīmūcookeria atīrī, “Ndīrakorirwo ndī hau kīrīma-inī kīa Giliboa, na hau nīho ndīronire Saūlū, etiranītie na itimū rīake, akirīī gūkorererwo nī ngaari cia ita na ahaici a mbarathi. ⁷ Rīrīa eehūgūrire, akīnyona, na akīnjīta, na nī ngīmūūria atīrī, ‘Ūngienda ngwīkire atīa?’

⁸ “Nake akīnjūūria atīrī, ‘Wee ūrī ū?’

“Ngīmūcookeria atīrī, ‘Nī ndī Mūamaleki.’

⁹ “Nīngī akīnjīra atīrī, ‘Ūka haha ūnjūrage! Nī ndī na ruo rūnene mūno rwa gīkuū, no ndī o muoyo.’

¹⁰ “Nī ūndū ūcio ngīthīī harī we, ngīmūūraga, tondū nīndamenyire atī arīkītie kūgūa ndekūhona. Ngīruta

thũmbĩ ĩrĩa yarĩ mūtwe wake, na mũrĩnga ũrĩa warĩ guoko gwake, na nĩcio indo iria ndarehera mwathi wakwa.”

¹¹ Hĩndĩ ĩyo Daudi na andũ othe arĩa maarĩ nake makĩnyiita nguo ciao, magĩcitembũranga. ¹² Nao magĩcakaya, na makĩrĩra, o na makĩhinga kũrĩa irio nginya hwaĩ-inĩ, nĩ ũndũ wa Saũlũ na mũriũ Jonathani, o na nĩ ũndũ wa mbũtũ cia ita cia Jehova, na nyũmba ya Isiraeli, tondũ nĩmooragĩtwo na rũhiũ rwa njora.

¹³ Daudi akĩũria mwanake ũcio wamũreheire ũhoro atĩrĩ, “Wee uumĩte kũ?”

Nake agĩcookia atĩrĩ, “Nĩ ndĩ mũriũ wa mũndũ wa kũngĩ, Mũamaleki.”

¹⁴ Daudi akĩmũũria atĩrĩ, “Nĩ kĩĩ kĩragiririe wĩtigĩre gũtambũrũkia guoko gwaku ũũrage mũitĩrĩrie maguta wa Jehova?”

¹⁵ Ningĩ Daudi agĩĩta ũmwe wa andũ ake, akĩmwĩra atĩrĩ, “Thiĩ, ũmũũrage!” Nake akĩmũringa, agĩkua.

¹⁶ Nĩgũkorwo Daudi aamwĩrĩre atĩrĩ, “Thakame yaku ĩrogũcookerera. Kanua gaku we mwene nĩko kaaruta ũira wa gũgũũkĩrĩra, rĩrĩa uugire atĩrĩ, ‘Nĩndĩrooragire mũitĩrĩrie maguta wa Jehova.’”

Daudi Gũcakaĩra Saũlũ na Jonathani

¹⁷ Nake Daudi agĩcakaĩra Saũlũ na mũriũ Jonathani, ¹⁸ na agĩathana atĩ andũ a Juda marutwo icakaya rĩrĩ rĩntagwo rwĩmbo rwa ũta (narĩo rĩandĩkĩtwo lbuku-inĩ rĩa Jasharu):

¹⁹ “Wee Isiraeli, riiri waku ũũragĩtwo irĩma-inĩ ciaku.
Hĩ, kaĩ andũ arĩa njamba nĩmagwĩte-ĩ!

²⁰ “Ũhoro ũyũ ndũkaheanwo Gathu,
o na ndũkanĩrĩtwo njĩra-inĩ cia Ashikeloni,*

* 1:20 Matũũra ma Gathu na Ashikeloni maarĩ ma Afilisti.

nĩguo airĩtu a Afilisti matigacanjamũke,
na nĩguo airĩtu a andũ acio mataruaga matigakene.

21 “Atĩrĩrĩ, inyuĩ irĩma cia Giliboa,
mũroaga kũgĩa na ime kana mbura,
o na kana mĩgũnda ãngĩciara ngano ya kũrutwo
igongona.

Nĩgũkorwo kũu nĩkuo ngo ya mũndũ ũrĩa njamba
yathaahĩrio,

ngo ĩyo ya Saũlũ ndĩkahuurwo na maguta rĩngĩ.†

22 Kuuma kũrĩ thakame ya arĩa moragĩtwo,
na kuuma kũrĩ mĩĩrĩ ya andũ acio njamba,
ũta wa Jonathani ndũrĩ wahũndũka tũhũ,
kana rũhiũ rwa njora rwa Saũlũ rũkahũndũka
ũtheri.

23 “Saũlũ na Jonathani,
marĩ muoyo nĩmendetwo na maarĩ andũ ega,
o na gĩkuũ-inĩ matiatiganire.

Maahanyũkaga gũkĩra nderi,
maarĩ hinya gũkĩra mĩrũũthi.

24 “Inyuĩ airĩtu a Isiraeli,
rĩrĩrai Saũlũ,
ũrĩa wamũhumbaga guo ndune ta gakaraku na ik-
agemio,
nĩwe wagemagia guo cianyu na indo cia thahabu.

25 “Hĩ, kaĩ andũ arĩa njamba nĩmagwĩrĩire mbaara-inĩ-ĩ!
Jonathani nĩmũkuũ, akooragĩrwo irĩma-inĩ ciaku.

26 Nĩĩ ndĩ na kĩaha nĩ ũndũ waku Jonathani, wee mũrũ
wa baba;

† 1:21 Ngo ciakagwo na njũũa, na ikahakwo maguta nĩguo citũũre mũno.

nii nĩndĩrakwendete mũno.
Wendo waku kũrĩ nii ũraarĩ wa magegania,
Nĩ wa kũgegania ũgakĩra wendo wa andũ-a-nja.

²⁷ “Hĩ, kaĩ andũ arĩa njamba nĩmagwĩte-ĩ!
Indo cia mbaara nĩithirĩte!”

2

Daudi Gũitĩrĩrio Maguta Athamakĩre Juda

¹ Na rĩrĩ, thuutha wa ihinda rĩu, Daudi agĩtũria ũhoru harĩ Jehova, akĩũria atĩrĩ, “Nyambate thĩĩ itũũra-inĩ rĩmwe rĩa matũũra ma Juda?”

Jehova akĩmwĩra atĩrĩ, “Ambata.”

Nake Daudi akĩũria atĩrĩ, “Nĩ rĩrĩkũ ngũthĩĩ?”

Nake Jehova akĩmũcookeria atĩrĩ, “Thĩĩ Hebironi.”

² Nĩ ũndũ ũcio Daudi akĩambata agĩthĩĩ Hebironi na atumia ake eerĩ, Ahinoamu ũrĩa Mũjezireeli, na Abigaili ũrĩa warĩ mũtumia wa ndigwa wa Nabali ũrĩa woimĩte Karimeli. ³ Ningĩ Daudi agĩthĩĩ hamwe na andũ arĩa aarĩ nao, o mũndũ na andũ a nyũmba yake, nao magĩtũũra Hebironi, na matũũra-inĩ makuo. ⁴ Hĩndĩ ĩyo andũ a Juda magĩũka Hebironi, magĩitĩrĩria Daudi maguta kuo, atuĩke mũthamaki wa nyũmba ya Juda.

Rĩrĩa Daudi eerirwo atĩ andũ a Jabeshi-Gileadi nĩo maathikire Saũlũ-rĩ, ⁵ agĩtũma andũ kũrĩ andũ a Jabeshi-Gileadi makameere atĩrĩ, “Jehova aromũrathima nĩ ũndũ nĩmuonanĩtie ũtugi kũrĩ mwathi wanyu Saũlũ na ũndũ wa kũmũthika. ⁶ Jehova aromuonia ũtugi na wĩhokeku wake, o na nii nĩngũmwĩka maũndũ mega ta macio nĩ ũndũ nĩmwĩkĩte ũndũ ũcio. ⁷ Na rĩrĩ, ũmĩrĩriai mũtuĩke njamba, nĩgũkorwo Saũlũ mwathi wanyu nĩakuĩte, nao andũ a nyũmba ya Juda nĩmanjitĩrĩrie maguta nduĩke mũthamaki wao.”

Mbaara Gatagati ka Nyumba ya Daudi na ya Saũlũ

⁸ Mahinda macio, Abineri mũrũ wa Neri, mũnene wa mbũtũ cia ita cia Saũlũ, nioete Ishi-Boshethu mũrũ wa Saũlũ akamũtwara Mahanaimu. ⁹ Akĩmũtua mũthamaki wa Gileadi, na wa Aashuri, na Jezireeli, na wa Efiraimu, na Benjamini, na wa Isiraeli guothe.

¹⁰ Nake Ishi-Boshethu mũrũ wa Saũlũ aarĩ wa mĩaka mĩrongo ĩna hĩndĩ ĩria aatuĩkire mũthamaki wa Isiraeli, agĩthamaka mĩaka ĩrĩ. No rĩrĩ, nyũmba ya Juda yarũmĩrĩire Daudi. ¹¹ Ihinda rĩrĩa Daudi aarĩ mũthamaki kũu Hebironi agĩthamakĩra nyũmba ya Juda, rĩarĩ mĩaka mũgwanja na mĩeri ĩtandatũ.

¹² Abineri mũriũ wa Neri, hamwe na andũ a Ishi-Boshethu mũrũ wa Saũlũ, makiuma Mahanaimu magĩthĩ Gibeoni. ¹³ Joabu mũrũ wa Zeruia na andũ a Daudi maki-umagara, magĩtũngana nao karia-inĩ ka Gibeoni. Gĩkundi kĩmwe gĩgĩikara thĩ mwena ũmwe wa Karia kau na gĩkundi kũu kĩngĩ gĩgĩikara mwena ũcio ũngĩ.

¹⁴ Hĩndĩ ĩyo Abineri akĩra Joabu atĩrĩ, “Nĩ tuoee aanake amwe mokĩre marũe marĩ mbere iitũ.”

Joabu agĩcookia atĩrĩ, “Ũguo nĩ wega, nĩ meeke ũguo.”

¹⁵ Nĩ ũndũ ũcio makĩrũgama magĩtarwo, andũ ikũmi na eerĩ a Abenjamini na Ishi-Boshethu mũrũ wa Saũlũ, na ikũmi na eerĩ a Daudi. ¹⁶ Hĩndĩ ĩyo o mũndũ akĩnyiita mũndũ ũria merekanĩire mũtwe, akĩmũtheeca na rũhiũ mbaru-inĩ ciake, nao makĩgũanĩra thĩ o ro hamwe. Nĩ ũndũ ũcio kũndũ kũu gũgĩtwo Helikathu-Hazurimu, na gwĩ kũu Gibeoni.

¹⁷ Mbaara ĩkĩrũra mũno mũthenya ũcio, nake Abineri na andũ a Isiraeli makĩhootwo nĩ andũ a Daudi.

¹⁸ Nao ariũ atatũ a Zeruia maarĩ ho: Nao nĩ Joabu, na Abishai, na Asaheli. Na rĩrĩ, Asaheli aarĩ mũhũthũ magũrũ, akagĩa ihenya o ta thwariga. ¹⁹ Nake agĩteng’eria Abineri atekũgarũrũka na mwena wa ũrĩo kana wa

ũmotho, amũingatithitie. ²⁰ Nake Abineri akĩrora na thuutha wake, akĩũria atĩrĩ, “Asaheli, kaarĩ we?”

Nake agĩcookia atĩrĩ, “Ĩĩ nĩ niĩ.”

²¹ Nake Abineri akĩmwĩra atĩrĩ, “Garũrũka na mwena wa ũrĩo kana wa ũmotho; ũnyiite mwanake ũmwe na ũmũtunye indo ciake cia mbaara.” No Asaheli ndaigana gũtiga kũmũhanyũkia.

²² O rĩngĩ, Abineri agĩkaania Asaheli, akĩmwĩra atĩrĩ, “Tiga kũndeng’eria! Kĩrĩa kĩngĩtũma ngũũrage, nĩ kĩĩ? Ingĩhota atĩa kũng’ethanĩra na mũrũ wa nyũkwa Joabu?”

²³ No Asaheli ndaatigire kũmũhanyũkia; nĩ ũndũ ũcio Abineri agĩtheeca Asaheli nda na mũthia wa itimũ rĩake, narĩo itimũ rĩkiumanĩra na mũgongo. Nake akĩgũa hau agĩkua o hĩndĩ ĩyo. Na mũndũ o wothe aakinya hau Asaheli aagwĩte akuĩte, akarũgama ho.

²⁴ No Joabu na Abishai magĩteng’eria Abineri, narĩo riũa rĩgĩthũa-rĩ, magĩkinya kĩrĩma-inĩ kĩa Ama, kĩrĩa kĩrĩ hakuhĩ na Gia, njĩra ya gũthiĩ werũ-inĩ wa Gibeoni. ²⁵ Hĩndĩ ĩyo andũ a Benjamini magĩcookanĩrĩra hamwe, makĩrũmĩrĩra Abineri. Nao magĩthondeka gĩkundi thĩinĩ wao, makĩrũgama igũrũ rĩa kĩrĩma.

²⁶ Abineri agĩta Joabu aanĩrĩire, akĩmũũria atĩrĩ, “Rũhiũ rwa njora rũgũtũũra rũniinanaga nginya tene? Anga ndũramenya atĩ ũhoro ũyũ ũkaarigĩrĩria na ũrũrũ? Ũgũikara nginya rĩ ũterĩte andũ aku matige gũteng’eria ariũ a ithe wao?”

²⁷ Joabu agĩcookia atĩrĩ, “Ti-itherũ o ta ũrĩa Ngai atũũraga muoyo, korwo ndũnaaria-rĩ, andũ aya mangĩathĩ o na mbere gũteng’eria ariũ a ithe wao nginya rũciinĩ.”

²⁸ Nĩ ũndũ ũcio Joabu akĩhuha karumbeta,* nao andũ othe makĩrũgama; matiacookire kũhanyũkia Isiraeli kana kũrũa rĩngĩ.

²⁹ Ũtukũ ũcio wothe Abineri na andũ ake magĩ-tuĩkanĩria Araba. Makĩringa Jorodani, magĩthiĩ na mbere matuĩkanĩrie Bithironi guothe, na magĩkinya Mahanaimu.

³⁰ Nake Joabu agĩtiga gũteng'eria Abineri, akĩhũndũka agĩcookanĩria andũ ake othe. Andũ ikũmi na kenda a Daudi makĩoneka matiarĩ ho, Asaheli atatarĩtwo. ³¹ No andũ a Daudi nĩmooragĩte andũ a Benjamini magana matatũ ma mĩrongo itandatũ arĩa maarĩ na Abineri. ³² Nao makĩoya Asaheli, makĩmũthika mbĩrĩra-inĩ ya ithe kũu Bethlehemu. Ningĩ Joabu na andũ ake magĩthiĩ ũtukũ wothe, magĩkinya Hebironi gũgĩkĩa.

3

¹ Na rĩrĩ, mbaara gatagatĩ ka nyũmba ya Saũlũ na nyũmba ya Daudi nĩyatũũrire ihinda iraya. Daudi agĩkĩrĩrĩria kũgĩa hinya; nayo nyũmba ya Saũlũ igĩkĩrĩrĩria kwaga hinya.

² Nake Daudi nĩagĩire na ciana cia aanake arĩ kũu Hebironi:

Mũriũ wake wa irigithathi eetagwo Amunoni ũrĩa waciarĩtwo nĩ Ahinoamu ũrĩa Mũjezireeli;

³ Mũriũ wa keerĩ eetagwo Kileabu ũrĩa waciarĩtwo nĩ Abigaili ũrĩa warĩ mũtumia wa ndigwa wa Nabali ũrĩa Mũkarimeli;

na wa gatatũ aarĩ Abisalomu ũrĩa waciarĩtwo nĩ Maaka mwarĩ wa Talimai mũthamaki wa Geshuru;*

* 2:28 Karumbeta kaahuhagwo kuonania kwambĩrĩria kwa haaro kana kũrĩka kwayo. * 3:3 Geshuru warĩ ũthamaki mũnini wa Ashuri, na nĩkuo Abisalomu oorĩre (13:37, 38; 14:23).

⁴ wa kana aarĩ Adonija ũrĩa waciarĩtwo nĩ Hagithu;
 wa gatano aarĩ Shefatia ũrĩa waciarĩtwo nĩ Abitali;
⁵ na wa gatandatũ aarĩ Ithireamu mūrũ wa Egila
 mūtumia wa Daudi.
 Acio nĩo maaciarĩrwo Daudi kũu Heberoni.

Abineri Gũthĩ kũrĩ Daudi

⁶ Hĩndĩ ya mbaara ya nyũmba ya Saũlũ na nyũmba ya Daudi, Abineri no kũgĩa aagĩaga na hinya arĩ thĩinĩ wa nyũmba ya Saũlũ. ⁷ Na rĩrĩ, Saũlũ nĩ arĩ na thuriya yetagwo Rizipa mwarĩ wa Aia. Nake Ishi-Boshethu akĩũria Abineri atĩrĩ, “Wakomire na thuriya ya baba nĩkĩ?”

⁸ Abineri nĩarakarire mũno tondũ wa kwĩrwo ũguo nĩ Ishi-Boshethu, nake akĩmũcookeria atĩrĩ, “Kaĩ ndĩkĩrĩ mūtwe wa ngui mwena-inĩ wa Juda? Ũmũthĩ ũyũ nĩ ndĩ rũmwe na nyũmba ya thoguo Saũlũ na andũ a nyũmba yake na arata. Nĩ ndirĩ ndaamũneana kũrĩ Daudi. No rĩu ũranjĩra atĩ nĩhĩtĩtie ihĩtia ũhoroni ũkonĩ mũndũ-wa-nja ũyũ! ⁹ Ngai arothũũra, nĩ Abineri, na anjĩke ũũru makĩria, ingĩaga kũhingĩria Daudi ũrĩa Jehova aamwĩrĩre na mwĩhĩtwa, ¹⁰ na ndute ũthamaki nyũmba-inĩ ya Saũlũ, na ndũgamie gĩtĩ kĩa Daudi kĩa ũnene igũrũ wa Isiraeli na Juda, kuuma Dani nginya Birishiba.”† ¹¹ Ishi-Boshethu ndaigana kwĩra Abineri ũndũ ũngĩ tondũ nĩamwĩtigĩrĩte.

¹² Ningĩ Abineri agĩtũma andũ kũrĩ Daudi makamwĩre atĩrĩ, “Bũrũri ũyũ nĩ waũ? Nĩtũgie na kĩrĩkanĩro nawe, na nĩngũgũteithia ngũrehere andũ a Isiraeli othe mwena waku.”

¹³ Nake Daudi akiuga atĩrĩ, “Ũguo nĩ wega. Nĩtũkũgĩa na kĩrĩkanĩro nawe. No nĩ harĩ ũndũ ũmwe ngwenda wĩke: ndũkanooke mbere yakwa angĩkorwo ndũkarehe Mikali mwarĩ wa Saũlũ hĩndĩ ĩrĩa ũgooka kũnyona.” ¹⁴ Ningĩ

† 3:10 Kuuga “kuuma Dani nginya Birishiba” nĩ kuuga bũrũri wothe wa Isiraeli (Atiir 20:1).

Daudi agītūma andū kūrī Ishi-Boshethu mūrū wa Saülū makamwīre atīrī, “Nengera mūtumia wakwa Mikali, ūrīa ndagūrīre na ikonde igana rīmwe cia Afilisti.”

¹⁵ Nī ūndū ūcio Ishi-Boshethu agīathana Mikali agīrwo kuuma kūrī mūthuriwe Palitieli mūrū wa Laishi. ¹⁶ No rīrī, mūthuriwe, agītwarana nake, agīthī amūrūmīrīre akīrīraga nginya Bahurimu. Hīndī ūyo Abineri akīmwīra atīrī, “Cooka mūciī!” Nī ūndū ūcio agīcooka mūciī.

¹⁷ Nake Abineri akīaranīria na athuri a Isiraeli akīmeera atīrī, “Kwa ihinda nīmūkoretwo mwīrīrīrie gūtua Daudi mūthamaki wanyu. ¹⁸ Mūtīgīke ūguo rīu! Nīgūkorwo Jehova nīerire Daudi atīrī, ‘Na ūndū wa ndungata yakwa Daudi nīngahonokia andū akwa a Isiraeli kuuma guoko-inī kwa Afilisti na kuuma guoko-inī gwa thū ciao ciothe.’”

¹⁹ Nake Abineri nīacookire akīaranīria na andū a Benjamini. Agīcooka agīthī Hebironi akeere Daudi maūndū mothe marīa Isiraeli na nyūmba yothe ya Benjamini meendaga gwīka. ²⁰ Rīrīa Abineri, ūrīa warī na andū mīrongo īrī ookire kūrī Daudi kūu Hebironi, Daudi akīmūrūgithīria iruga hamwe na andū ake. ²¹ Hīndī ūyo Abineri akīra Daudi atīrī, “Reke thī o ro rīu ngacookanīrīrie andū a Isiraeli othe nī ūndū wa mūthamaki mwathi wakwa, nīgeetha marīkanīre nawe, na nīguo ūthamakagīre o kūrīa guothe ngoro yaku īrīrīrie.” Nī ūndū ūcio Daudi agītūma Abineri athī, nake agīthī na thayū.

Joabu Kūūraga Abineri

²² Hīndī o ūyo andū a Daudi, na Joabu magīcooka kuuma mbaara-inī, na magīūka na indo nyingī iria maatahīte. No Abineri ndaarī hamwe na Daudi kūu Hebironi, tondū Daudi nīamwīrīte athī, nake agīthī na thayū. ²³ Rīrīa Joabu na thigari ciothe iria ciarī hamwe

nake maakinyire-rĩ, akĩrwo atĩ Abineri mūrũ wa Neri nĩokĩte kūrĩ mũthamaki, na atĩ mũthamaki nĩarekire athiĩ, nake agĩthiĩ na thayũ.

²⁴ Nĩ ũndũ ũcio Joabu agĩthiĩ kūrĩ mũthamaki akĩmũũria atĩrĩ, “Nĩ atĩa ũguo weka? Ta kĩone, Abineri nĩokire kūrĩ wee. Ũrekire athiĩ nĩkĩ? Rĩu nĩagĩthiire!
²⁵ Wee nĩũũ atĩ Abineri mūrũ wa Neri egũũkĩte gũkũheenia na gũthigaana mĩthiire yaku, na amenye maũndũ marĩa mothe ũreka.”

²⁶ Hĩndĩ ĩrĩa Joabu oimire harĩ Daudi, agĩtũma andũ makinyĩre Abineri, nao makĩmũcookia kuuma gĩthima-inĩ gĩa Sira. No Daudi ndaigana kũmenya ũhoru ũcio. ²⁷ Na rĩrĩ, rĩrĩa Abineri aacookire Heberoni, Joabu akĩmũtwara keheri-inĩ kĩhingo-inĩ, ta ekwenda kwaria nake na hitho. Na marĩ hau, akĩmũtheeca nda agĩkua, nĩguo arĩhĩrie thakame ya mūrũ wa nyina Asaheli.

²⁸ Thuutha ũcio, rĩrĩa Daudi aiguire ũhoru ũcio, akiuga atĩrĩ, “Nĩĩ na ũthamaki wakwa tũtirĩ na ihĩtia nginya tene mbere ya Jehova ũhoru-inĩ wa thakame ya Abineri mūrũ wa Neri. ²⁹ Thakame yake ĩrocookerera Joabu na nyũmba ya ithe yothe! Nayo nyũmba ya Joabu ndĩkanaage mũndũ ũmwe ũrĩ na kĩronda gĩkuura thakame, kana mangũ, kana mũndũ ũrĩthiiga na mĩtĩ, kana mũndũ ũũragĩtwo na rūhiũ rwa njora, kana mũndũ wagĩte irio.”

³⁰ (Joabu na Abishai mūrũ wa nyina mooragire Abineri tondũ nĩooragĩte Asaheli mūrũ wa nyina wao mbaara-inĩ kũu Gibeoni.)

³¹ Hĩndĩ ĩyo Daudi akĩra Joabu na andũ othe arĩa aarĩ nao atĩrĩ, “Tembũrangai nguo cianyu na mwĩhumbe makũnia, na mũthiĩ mũgĩcakayaga mbere ya Abineri.” Nake Daudi ũcio mũthamaki agĩthiĩ arũmĩrĩire ndayaya ĩrĩa yakuuĩte kĩimba. ³² Nao magĩthika Abineri kũu

Hebironi, nake mūthamaki akĩrĩra aanĩrĩire hau mbĩrĩra-inĩ ya Abineri. O nao andũ othe makĩrĩra.

³³ Mūthamaki akĩina icakaya rĩrĩ nĩ ũndũ wa Abineri: “Abineri nĩaragĩrĩrwo nĩgũkua ta andũ arĩa moinaga watho?

³⁴ Moko maku matiarĩ moohe, namo magũrũ maku matiarĩ moohe na nyororo. Wagũire o ta mũndũ ũrĩa ũgũũaga mbere ya andũ arĩa aaganu.”

Nao andũ othe makĩrĩra rĩngĩ nĩ ũndũ wake.

³⁵ Ningĩ andũ othe magĩũka na makĩringĩrĩria Daudi arĩe irio gũtanatuka, no Daudi akĩihĩta na mwĩhĩtwa, akiuga atĩrĩ, “Ngai arothũũra, o na anjĩke ũũru makĩria, ingĩcama irio kana kĩndũ kĩngĩ riũa rĩtanathũa!”

³⁶ Nao andũ acio othe maakĩona ũrĩa gwathiĩ magĩkena; ti-itherũ, maũndũ mothe marĩa mūthamaki eekire nĩ-mamakenirie. ³⁷ Nĩ ũndũ ũcio andũ othe na Isiraeli guothe makĩmenya mūthenya ũcio atĩ mūthamaki ndaari na itemi ũhoror-inĩ wa gĩkuũ kĩa Abineri mũrũ wa Neri.

³⁸ Ningĩ mūthamaki akĩira andũ ake atĩrĩ, “Kaĩ mūtaramenya atĩ mũndũ mūnene na ũrĩ igweta mūno nĩarĩkĩtie gũkua ũmũthĩ thĩinĩ wa Isiraeli? ³⁹ Na rĩrĩ, ũmũthĩ, o na gũkorwo ndĩmũitĩrĩrie maguta nduĩke mūthamaki, ndirĩ na hinya, nao ariũ aya a Zeruia marĩ na hinya mūno kũngĩra. Jehova arorĩhia mwĩki ũũru kũringana na ciiko ciake njũru!”

4

Ishi-Boshethu Kũũragwo

¹ Na rĩrĩ, hĩndĩ rĩria Ishi-Boshethu mũrũ wa Saũlũ aaiguire atĩ Abineri nĩakuĩrĩire kũu Hebironi-rĩ, akĩũrwo nĩ hinya, nao andũ othe a Isiraeli makĩmaka. ² Nake mũrũ wa Saũlũ aarĩ na andũ eerĩ arĩa maarĩ atongoria a ikundi cia

gūtharīkanīra. Ũmwe eetagwo Baana na ũcio ũngĩ Rek-abu; maarĩ ariũ a Rimoni ũria Mũbeerothi wa mũhĩrĩga wa Benjamini; Beerothu gūtaragwo ta gĩcunjĩ kĩa Benjamini, ³ tondũ andũ a Beerothu nĩmoorĩire Gitaimu na matũũrĩte kuo ta andũ a kũngĩ nginyagia ũmũthĩ.

⁴ (Jonathani mŭrũ wa Saũlũ aarĩ na mŭriũ wonjete magŭrũ meerĩ. Aarĩ na ũkŭrũ wa mĩaka ĩtano rĩrĩa ũhoro wa Saũlũ na Jonathani wamakinyĩire kuuma Jezireeli. Nake mŭreri wake akĩmũkuua, akĩũra; no rĩrĩa aahiũhĩte akĩũra-rĩ, mwana ũcio akĩgũa agĩtuĩka kĩonje. Rĩtwa rĩake rĩarĩ Mefiboshethu.)

⁵ Nake Rekabu na Baana, ariũ a Rimoni ũria Mũbeerothi, magĩthĩ marorete nyũmba-inĩ ya Ishi-Boshethu, na magĩkinya kuo rĩrĩa gũkoragwo kŭrĩ ũrugarĩ mũthenya, rĩrĩa aahurũkĩte mĩaraho. ⁶ Nao makĩingĩra nyũmba ya thĩinĩ metuĩte ta meendaga gũkuua ngano, makĩmũtheeca nda. Nake Rekabu na mŭrũ wa nyina Baana makĩũra.

⁷ Maingĩrĩre nyũmba hĩndĩ ĩrĩa aakomete gĩtanda-inĩ nyũmba yake ya toro. Maarĩkia kũmũtheeca na kũmũũraga, magĩtinia mŭtwe wake. Makĩũkuua, magĩthĩ ũtukũ wothe magerete njĩra ya Araba. ⁸ Magĩtwarĩra Daudi mŭtwe wa Ishi-Boshethu kũu Hebironi, makĩira mũthamaki atĩrĩ, “Ĩ ũyũ mŭtwe wa Ishi-Boshethu mŭrũ wa Saũlũ, thũ yaku, ũria wageragia gũkũũraga. ũmũthĩ nĩguo Jehova arĩhĩria mwathi wakwa mũthamaki gwĩ Saũlũ na rŭciarero rwake.”

⁹ Nake Daudi agĩcookeria Rekabu na Baana, mŭrũ wa nyina, ariũ a Rimoni ũria Mũbeerothi atĩrĩ, “Ti-itherũ o ta ũria Jehova atũũraga muoyo, ũria ũhonoketie kuuma mathĩina-inĩ mothe, ¹⁰ rĩrĩa mŭndũ aanjĩrĩre atĩrĩ, ‘Saũlũ nĩakuĩte’, agĩciiria atĩ nĩ ũhoro mwega andehera, ndamũnyitire ngĩmũũragĩra kũu Zikilagi. Kĩu nĩkĩo kĩheo kĩrĩa ndamũheire nĩ ũndũ wa ndũmĩrĩri ĩyo yake! ¹¹ Akĩrĩ

makīria atīa, hīndī īrīa andū aaganu moragīte mūdū ūtarī na ihītia thīinī wa nyūmba yake akomete ūrīrī-inī wake, githī ndiagīrīrwo nī gwītia thakame yake kuuma moko-inī manyu na ndīmweherie muume thī!”

¹² Nī ūndū ūcio Daudi agīatha andū ake, nao makīmooraga. Makīmatinia moko na magūrū, na magīcuuria mīrī yao hau karia-inī kūu Hebironi. No rīrī, makīoya mūtwe wa Ishi-Boshethu na makīūthika mbīrīra-inī ya Abineri kūu Hebironi.

5

Daudi Gūtuīka Mūthamaki wa Isiraeli Guothe

¹ Na rīrī, mīhīrīga yothe ya Isiraeli īgīthīī kūrī Daudi kūu Hebironi īkīmwīra atīrī, “Ithuī tūrī a mūthiimo waku na thakame yaku. ² Ihinda rīrīa Saūlū aarī mūthamaki witūrī, wee nīwe watongoragia mbūtū cia Isiraeli īgīthīī ita. Nake Jehova agīkwīra atīrī, ‘Wee nīūgatuīka mūrīithi wa andū akwa a Isiraeli, na ūtuīke mwathi wao.’”

³ Rīrīa athuuri othe a Isiraeli maathiite Hebironi kūrī Mūthamaki Daudi, mūthamaki nīagiire na kīrīkanīro nao mbere ya Jehova o kūu Hebironi, nao magīitīrīria Daudi maguta mūtwe atuīke mūthamaki wa Isiraeli.*

⁴ Daudi aarī na ūkūrū wa mīaka mīrongo ītatū rīrīa aatuīkire mūthamaki, na agīthamaka mīaka mīrongo īna. ⁵ Aathamakīire Juda mīaka mūgwanja na mīeri ītandatū arī Hebironi, na agīthamaka Isiraeli guothe mīaka mīrongo ītatū na ītatū arī Jerusalemu.

Daudi Gūtooria Jerusalemu

⁶ Mūthamaki na andū ake magīthīī Jerusalemu magatharīkīre Ajobusi, arīa matūūruga kuo. Nao Ajobusi makīra Daudi atīrī, “Ndūgūtoonya gūkū; tondū andū arīa

* 5:3 Rīrī rīarī rita rīa gatātū rīa Daudi gūitīrīrio maguta, na rīarī rīa kuonania atī we aarī mūthamaki wa Isiraeli yothe.

megūkūgirīrīria ūtoonye nī arīa atumumu na cionje.” Tondū meiraga atīrī, “Daudi ndangihota gūtoonya kuo.”
⁷ No rīrī, Daudi nīatunyanire kīhitho kīa hinya gīa Zayuni, na nīkīo gīitagwo itūūra inene rīa Daudi.

⁸ Mūthenya o ro ūcio Daudi akiuga atīrī, “Mūdū wothe ūngītooria Ajebusi no agerire mūtaro-inī wa maaī nīguo akinyīre andū acio ‘mathuaga na atumumu’ o acio thū cia Daudi.” Kīu nīkīo gītūmaga moige atīrī, “‘Andū atumumu na arīa mathuaga’ matigatoonya nyūmba ya ūthamaki.”

⁹ Nake Daudi agītūūra kīhitho-inī kīu kīa hinya, agīgītua itūūra inene rīa Daudi. Nake Daudi agīakīrīra itūūra rīu inene kuuma Milo arīcooketie na thīinī. ¹⁰ Daudi agīkīrīrīria kūgīa na hinya tondū Jehova Ngai Mwene-Hinya-Wothe aarī hamwe nake.

¹¹ Na rīrī, Hiramū mūthamaki wa Turo agītūmīra Daudi andū, hamwe na mīgogo ya mītarakwa, na atharamara, na aaki na mahiga, nao magīakīra Daudi nyūmba ya ūthamaki. ¹² Nake Daudi akīmenya atī Jehova nīamūhaandīte atuīke mūthamaki wa Isiraeli na agatūūgīria ūthamaki wake nī ūndū wa andū ake a Isiraeli.

¹³ Aarīkia kuuma Hebironi, Daudi nīagīire na thuriya ingī na akīhikia atumia kūu Jerusalemu, na agīciarīrwo aanake na airītu angī. ¹⁴ Maya nīmo marīitwa ma ciana iria aaciarīire kūu Jerusalemu: Shamua, na Shobabu, na Nathani, na Solomoni,[†] ¹⁵ na Ibiharu, na Elishua, na Nefegu, na Jafia, ¹⁶ na Elishama, na Eliada, na Elifeleti.

Daudi Kūhoota Afilisti

¹⁷ Hīndī īrīa Afilisti maaigūire atī Daudi nīaitīrīrio maguta agatuīka mūthamaki wa Isiraeli, makīambata magīthīī na mbūtū ciao ciothe makamūcarie, no Daudi aigua ūhoro ūcio agīkūrūka agīthīī kīhitho-inī kīa hinya.

[†] 5:14 Ici inya ciarī ciana cia Bathisheba (1Maū 3:5).

¹⁸ Na rĩrĩ, Afilisti nĩmokĩte na makeyaragania gĩtuamba-inĩ kĩa Refaimu; ¹⁹ nĩ ũndũ ũcio Daudi agĩtuĩria ũhoro kũrĩ Jehova, akĩmũũria atĩrĩ, “Thiĩ ngatharĩkĩre Afilisti? Nĩũkũmaneana kũrĩ niĩ?”

Nake Jehova akĩmũcookeria atĩrĩ, “Thiĩ, nĩgũkorwo ti-itherũ nĩ ngũneana Afilisti kũrĩ we.”

²⁰ Nĩ ũndũ ũcio Daudi agĩthiĩ Baali-Perazimu, na agĩtooreria Afilisti kuo. Akiuga atĩrĩ, “O ta ũrĩa maĩ moinaga, noguo Jehova aharaganĩtie thũ ciakwa mbere yakwa.” Nĩ ũndũ ũcio handũ hau hagĩtwo Baali-Perazimu. ²¹ Nao Afilisti magĩtiganĩria mĩhianano yao kũu, nake Daudi na andũ ake makĩmĩoya magĩthiĩ nayo.

²² Afilisti nĩmambatire o rĩngĩ makĩaragania Gĩtuamba-inĩ kĩa Refaimu; ²³ nĩ ũndũ ũcio Daudi agĩtuĩria ũhoro harĩ Jehova, nake Jehova akĩmũcookeria atĩrĩ, “Tiga kwambata ũthiĩ ũrũngĩrĩrie, no thiũrũrũka ũmoime na thuutha, ũmatharĩkĩre ũmarutĩtie na mbere ya mĩtĩ ya mĩkũngũgũ. ²⁴ Rĩrĩa ũrĩigua mũkubio uumĩte igũrũ rĩa mĩtĩ ya mĩkũngũgũ-rĩ, thiĩ narua, tondũ ũguo nĩkuonania atĩ Jehova nĩathiite mbere yaku nĩguo ahũire mbũtũ cia Afilisti.” ²⁵ Nĩ ũndũ ũcio Daudi agĩka o ta ũrĩa Jehova aamwathĩte, akĩhũũra Afilisti amarutĩtie Gibeoni, o nginya Gezeri.

6

Ithandũkũ Kũreehwo Jerusalemu

¹ O rĩngĩ, Daudi agĩcookanĩrĩria andũ arĩa maarĩ njamba a Isiraeli othe, nao maarĩ ngiri mĩrongo ĩtatũ. ² Daudi arĩ hamwe na andũ acio ake othe magĩthiĩ moimĩte Baala kũu Juda makambatie ithandũkũ rĩa Ngai marĩrute kuo, ithandũkũ rĩrĩa rĩĩtanĩtio na Rĩĩtwa Rĩake, naguo ũguo nĩ ta kuuga Rĩĩtwa rĩa Jehova Mwene-Hinya-Wothe, ũrĩa ũikaraga gatagatĩ ka makerubi marĩa marĩ igũrũ

rĩa ithandūkũ rĩu. ³ Nao makĩgĩrĩra ithandūkũ rĩa Ngai ngaari-inĩ njerũ ya ng'ombe, makĩrĩruta nyũmba ya Abinadabu, ĩrĩa yarĩ kĩrĩma-inĩ. Nao Uza na Ahio, ariũ a Abinadabu, nĩo maatongoretie ngaari ĩyo njerũ ⁴ ĩrĩ na ithandūkũ rĩu rĩa Ngai igũrũ rĩayo, nake Ahio nĩwe warĩtongoretie. ⁵ Nake Daudi na nyũmba yothe ya Isiraeli maarũuhagia na hinya wao wotho marĩ mbere ya Jehova, makaina nyĩmbo na inanda cia kĩnũbi, na inanda cia mũgeeto, na tũhembe, na njingiri na thaani iria ihũurithanagio ikagamba.

⁶ Hĩndĩ ĩrĩa maakinyire kĩhuhĩro-inĩ kĩa ngano kĩa Nakoni, ndegwa ikĩhĩngwo, Uza agĩtambũrũkia guoko akanyĩtĩrĩra ithandūkũ rĩa Ngai tondũ ndegwa nĩ ciahĩngĩtwo. ⁷ Namo marakara ma Jehova magĩakanĩra Uza tondũ wa gĩko kĩu gĩa kwaga gĩtĩo; Nĩ ũndũ ũcio Ngai akĩmũgũtha akĩgũa, agĩkuĩra hakuhĩ na ithandūkũ rĩa Ngai.

⁸ Nake Daudi akĩrakara tondũ mang'ũrĩ ma Jehova nĩmookĩrĩre Uza, na nginya ũmũthĩ handũ hau hetagwo Perezu-Uza.

⁹ Nake Daudi agĩtĩgĩra Jehova mũthenya ũcio, akĩũria atĩrĩ, “Ngaahota atĩa kũinũkia ithandūkũ rĩrĩ rĩa Jehova?” ¹⁰ Nake ndetĩkĩrĩre gũtwara ithandūkũ rĩu rĩa Jehova kũu aatũire, itũũra-inĩ inene rĩa Daudi. Handũ ha ũguo, aarĩtwarire kwa Obedi-Edomu ũrĩa Mũgiiti. ¹¹ Ithandūkũ rĩu rĩa Jehova rĩgũikara nyũmba-inĩ ya Obedi-Edomu ũrĩa Mũgiiti mĩeri ĩtatũ, nake Jehova akĩmũrathima hamwe na nyũmba yake yothe.

¹² Na rĩrĩ, Mũthamaki Daudi akĩrwo atĩrĩ, “Jehova nĩarathimĩte nyũmba ya Obedi-Edomu na kĩrĩa gĩothe arĩ nakĩo, tondũ wa ithandūkũ rĩa Ngai.” Nĩ ũndũ ũcio Daudi agĩkũrũka akĩruta ithandūkũ rĩa Ngai kuuma nyũmba

ya Obedi-Edomu akĩrĩtwara itũũra inene rĩa Daudi akene. ¹³ Na rĩrĩ, andũ acio maakuuĩte ithandũkũ rĩa Jehova maakinya makinya matandatũ-rĩ, Daudi akĩruta igongona rĩa ndegwa na gacaũ kanoru. ¹⁴ Daudi akĩina arĩ mbere ya Jehova na hinya wake wothe, ehumbĩte ebodi ya gatani; ¹⁵ nĩ ũndũ ũcio Daudi na nyũmba yothe ya Isiraeli makĩambatia ithandũkũ rĩa Jehova makĩanagĩrĩra na makĩhuhaga tũrumbeta.

¹⁶ Hĩndĩ ĩrĩa ithandũkũ rĩa kĩrĩkanĩro kĩa Jehova rĩa-toonyaga itũũra inene rĩa Daudi-rĩ, Mikali mwarĩ wa Saũlũ agĩcũthĩrĩria arĩ ndirica-inĩ. Na rĩrĩa onire Mũthamaki Daudi akĩrũga-rũga akĩinaga mbere ya Jehova, akĩmũnyarara ngoro-inĩ yake.

¹⁷ Nao makĩrehe ithandũkũ rĩa Jehova na makĩrĩiga handũ harĩo thĩinĩ wa hema ĩrĩa Daudi aambĩte nĩ ũndũ warĩo, nake Daudi akĩruta maruta ma njino na ma ũiguano mbere ya Jehova. ¹⁸ Aarĩkia kũruta magongona ma njino, na maruta ma ũiguano-rĩ, akĩrathima andũ thĩinĩ wa rĩitwa rĩa Jehova Mwene-Hinya-Wothe. ¹⁹ Ningĩ akĩheana mũgate, na gĩkũmba gĩa thabibũ, na gĩcunjĩ kĩa nyama kũrĩ mũndũ o wothe warĩ gĩkundi-inĩ kũ gĩa Isiraeli, arũme na andũ-a-nja o ũndũ ũmwe. Nao andũ othe makĩinũka mĩcĩi kwao.

²⁰ Hĩndĩ ĩrĩa Daudi aacookire mũcĩi akarathime andũ a nyũmba yake-rĩ, Mikali mwarĩ wa Saũlũ agĩũka kũmũtũnga, akiuga atĩrĩ, “Kaĩ mũthamaki wa Isiraeli nĩakĩionanĩtie ũmũthĩ-ĩ, agakĩruta nguo mbere ya ngombo cia airĩtu cia ndungata ciake, o ta ũrĩa mũndũ ũtarĩ thoni angĩika!”

²¹ Daudi akĩira Mikali atĩrĩ, “Nyuma mbere ya Jehova ũrĩa wathuurire nĩ handũ ha thoguo kana mũndũ o na ũmwe wa nyũmba yake, hĩndĩ ĩrĩa aathuurire ndũike mũthamaki wa gũthamakĩra andũ a Jehova, nĩo andũ a

Isiraeli, na nĩ ũndũ ũcio no nginya nyine ndĩ mbere ya Jehova. ²²O na nĩ ngũkĩrĩrĩria kwĩyagithia gĩtĩio gũkĩra ũũ, na nĩngwĩnyihia maitho-inĩ makwa. No rĩrĩ, ndungata icio cia airĩtu wagweta-rĩ, nĩ nĩgũtĩio ngũtĩio nĩcio.”

²³ Nake Mikali mwarĩ wa Saũlũ ndaagĩire ciana nginya mũthenya ũrĩa aakuire.

7

Kĩĩranĩro kĩa Ngai kũrĩ Daudi

¹ Na rĩrĩ, thuutha wa mũthamaki gũikara nyũmba yake ya ũthamaki, nake Jehova akamũhe ũhurũko agatiga gũũkĩrĩrwo nĩ thũ ciake ciothe iria ciamũrigiicĩirie-rĩ, ² akĩira mũnabii Nathani atĩrĩ, “Nĩ njikaraga nyũmba ya ũthamaki yaakĩtwo na mĩtarakwa, o rĩrĩa ithandũkũ rĩa Ngai rĩgĩtwo hema-inĩ.”

³ Nathani agĩcookeria mũthamaki atĩrĩ, “Ũndũ ũrĩa ũreciiria, gwĩka ĩka guo tondũ Jehova arĩ hamwe nawe.”

⁴ Ũtukũ ũcio kiugo kĩa Jehova gĩgĩkinyĩra Nathani, akĩrwo atĩrĩ:

⁵ “Thĩ ũkeere ndungata yakwa Daudi atĩrĩ, ‘Jehova ekuuga ũũ: Anga we nĩwe ũkũnjakĩra nyũmba nĩguo ndĩmĩtũũre? ⁶ Nĩ ndirĩ ndatũũra nyũmba kuuma mũthenya ũrĩa ndaarutire andũ a Isiraeli kuuma bũrũri wa Misiri nginya ũmũthĩ. Ndũũraga thiiaga kũndũ na kũndũ ndĩ hema-inĩ arĩ yo gĩtũũro gĩakwa. ⁷ Kũrĩa guothe ndanathĩ na andũ a Isiraeli othe-rĩ, ndĩ ndooria mũtongoria o na ũmwe wao, arĩa ndaathire marĩithagie andũ akwa a Isiraeli, atĩrĩ, “Mwagĩte kũnjakĩra nyũmba ya mĩtarakwa nĩkĩ?”’

⁸ “Na rĩrĩ, ĩra ndungata yakwa Daudi atĩrĩ, ‘Jehova Mwene-Hinya-Wothe ekuuga ũũ: Ndaakũrutire rũũru-inĩ ngĩgũtigithia kũrũmĩrĩra mahiũ nĩguo ũtuĩke mwathi wa andũ akwa a Isiraeli. ⁹ Nĩ ngoretwo nawe

o kūrīa guothe wanathiī, na ngakwehereria thū ciaku ciothe ikeehera mbere yaku. Rīu nīngūtūma rīitwa rīaku rītuīke inene, o ta marīitwa ma andū arīa anene mūno a thī. ¹⁰ Na nīngahe andū akwa a Isiraeli handū, na ndīmahaande wega nīgeetha magīe na mūcīi wao kīūmbe, na matigacooka gūthīnīka. Andū aaganu matigacooka kūmahinyīrīria rīngī, o ta ūrīa maatūire meekaga kīambīrīria-inī, ¹¹ o na ūrīa matūire meekaga kuuma rīrīa ndathuurire atongoria a gūtongoragia andū akwa a Isiraeli. Ningī nīngakūhe ūhurūko kuuma kūrī thū ciaku ciothe.

“Jehova egūkwīra atī Jehova we mwene nīwe ūkaarūgamia nyūmba yaku: ¹² Hīndī īrīa matukū maku magaathira, ūhurūke hamwe na maithe maku, nīngarahūra mbeū yaku ĩcooke ithenya rīaku, īrīa ĩkoima mūthiimo waku wee mwene, na nīngarūgamia ūthamaki wake. ¹³ Ūcio nīwe ūgaaka nyūmba ĩtanītio na Rīitwa Rīakwa, na nīngarūgamia gītī kīa ūnene wake nginya tene. ¹⁴ Nīngatuīka ithe, nake atuīke mūrū wakwa. Hīndī īrīa ageeka ūūru, ngaamūherithia na rūthanju rwa andū, na ahūūrwo mahūūra nī andū. ¹⁵ No rīrī, wendo wakwa ndūrī hīndī ūkeeherio kūrī we, ta ūrīa ndaaweheririe harī Saūlū, ūrīa ndeheririe mbere yaku. ¹⁶ Nyūmba yaku na ūthamaki waku igūtūūra mbere yakwa nginya tene; o nakīo gītī gīaku kīa ūnene gīgūtūūra kīrī kīrūmu wega nginya tene.”

¹⁷ Nake Nathani akīra Daudi ciugo ciothe cia ūguūrio ūcio.

Ihooya rīa Daudi

¹⁸ Nake Mūthamaki Daudi agītoonya, agīkara thī mbere ya Jehova, akiuga atīrī:

“Nii ndikiri ũ, Wee Mwathani Jehova, nayo nyumba yakwa-ri, ikiri ki, ati niko ũnginyitie nginya haha? ¹⁹ Na riri, Wee Mwathani Jehova, wonete undu ũcio ta uri munini maitho-ini maku, nawe ugacooka kwaria ũhoru wa matuku maria magooka makoni nyumba ya ndungata yaku. Ningi Wee Mwathani Jehova ino niyo njira yaku iria waragiria andu nayo?

²⁰ “Ni ati ũngi Daudi angikwira? Nigukorwo Wee Mwathani Jehova, niui ndungata yaku. ²¹ Ni undu wa kiugo giaku, na kuringana na wendo waku, niwikite undu ũyu mune ũguo, na ũkaumenyithia ndungata yaku.

²² “Wee Mwathani Jehova, kai ukiri mune-i! Gutiri ũngi tawe, na gutiri Ngai ũngi tiga wee, o ta uria tiguite na matu maitu. ²³ Na nu ũhaana ta andu aku a Isiraeli, ruri rumwe guku thi ruria Ngai waruo aakurire rutuika andu ake, nigeetha wigire igweta, na wike maundu manene ma magegania na ma gwitigirwo, na undu wa kungata nduri na ngai ciehere mbere ya andu aku, aria wakurire kuuma bururi wa Misiri? ²⁴ Wee nurugamitie andu aku a Isiraeli matuika andu aku nginya tene, nawe, Wee Jehova nituikite Ngai wao.

²⁵ “Na riri, Jehova Ngai, tuma kiranro kiria wiranire gikoni ndungata yaku na nyumba yake kirume nginya tene. Na wike o ta ũguo wiranire, ²⁶ nigeetha ritwa riaku rinenehe nginya tene. Ningi andu nimakoiga atiri, ‘Jehova Mwene-Hinya-Wothe niwe Ngai wa Isiraeli!’ Nayo nyumba ya ndungata yaku Daudi nikehaanda mbere yaku.

²⁷ “Wee Jehova Mwene-Hinya-Wothe, Ngai wa Isiraeli, niuguririe ndungata yaku undu ũyu, ũkoiga atiri, ‘Ningagwakra nyumba.’ Ni undu ũcio ndungata yaku

nīngiite na ūmīrīru wa kūhooya ihooya rīrī. ²⁸ Wee Mwathani Jehova, Wee nīwe Ngai! Ciugo ciaku nīciak-wihokwo, na nīwīrīre ndungata yaku maūdū macio mega. ²⁹ Rīu nīwonete kwagīrīre ūrathime nyūmba ya ndungata yaku, nīgeetha itūūre mbere yaku nginya tene maitho-inī maku; nīgūkorwo Wee Mwathani Jehova nīwe warītie, na nī ūndū wa kīrathimo gīaku, nyūmba ya ndungata yaku itūūre īraathimītwo nginya tene.”

8

Ūtoorania wa Daudi Mbaara-inī

¹ Thuutha wa mahinda macio-rī, Daudi nīatharīkīre Afilisti na akīmatoria biū, na agītunyana Methegi-Amma kuuma watho-inī wa Afilisti.

² Ningī Daudi nīatooririe andū a Moabi. Agītūma makome thī na akīmathima na ūraihi wa rūrigi. Aamathima-rī, ithimi igīrī ciao makooragwo, na gīthimi gīa gatatū mageetīkīrio matūūre muoyo. Nī ūndū ūcio andū a Moabi magītuīka ndungata cia Daudi na makamūrehagira igooti.

³ Daudi nīahūūranire na Hadadezeri mūrū wa Rehobu, mūthamaki wa Zoba, rīrīa aathiite gūcookia būrūri ūrīa aatunyītwo gūkuhī na Rūū rwa Farati. ⁴ Nake Daudi akīmūtunya ngaari ciake cia ita ngiri īmwe, na andū a gūcitwara ngiri mūgwanja, na thigari cia magūrū ngiri mīrongo īrī. Nake agītemenga mbarathi icio cia mbaara magūrū agītūma ithue ciothe tiga o igana rīmwe.

⁵ Rīrīa Asuriata a kuuma Dameski mookire gūteithia Hadadezeri mūthamaki wa Zoba, Daudi akīūruga Asuriata ngiri mīrongo īrī na igīrī. ⁶ Akīiga mbūtū cia kūrangīra

ũthamaki wa Asuriata kũu Dameski. Nao Asuriata magĩ-tũika a gwathagwo nĩwe makamũrehagĩra igooti. Jehova nĩaheaga Daudi ũhootani kũrĩa guothe aathiiaga.

⁷ Na rĩrĩ, Daudi agĩkuua ngo cia thahabu iria ciarĩ cia atongoria a Hadadezeri agĩcirehe Jerusalemu. ⁸ Kuuma matũũra ma Teba na Berothai, marĩa maarĩ ma Hadadezeri, Mũthamaki Daudi agĩkuua kuuma kuo indo nyingĩ mũno cia gĩcango.

⁹ Rĩrĩa Tou mũthamaki wa Hamathu aaiguire atĩ Daudi nĩahootete mbũtũ ciothe cia mbaara cia Hadadezeri-rĩ, ¹⁰ agĩtũma mũriũ Joramu kũrĩ Mũthamaki Daudi akamũgeithie na amũkũngũire nĩ ũndũ wa kũhoota Hadadezeri, ũrĩa wakoretwo akĩrũa na Tou. Joramu akĩmũrehera indo cia betha na cia thahabu, o na cia gĩcango.

¹¹ Mũthamaki Daudi akĩamũrĩra Jehova indo icio, o ta ũrĩa aamũrĩte betha na thahabu kuuma ndũrĩrĩ-inĩ ciothe iria aatooretie. ¹² Nacio nĩ Edomu na Moabi, na Aamoni na Afilisti, na Amaleki. Ningĩ akĩamũra indo iria aatahĩte kuuma kũrĩ Hadadezeri mũrũ wa Rehobu mũthamaki wa Zoba.

¹³ Nake Daudi akĩgĩa igweta hĩndĩ ĩrĩa oimire kũũraga andũ a Edomu ngiri ikũmi na inyanya Gĩtuamba-inĩ gĩa Cumbĩ.

¹⁴ Nake akĩiga thigari cia kũrangĩra Edomu guothe, nao andũ a Edomu othe magĩtuĩka ndungata cia Daudi. Nake Jehova nĩaheaga Daudi ũhootani kũrĩa guothe aathiiaga.

Ndungata cia Daudi

¹⁵ Daudi nĩathamakire Isiraeli guothe, akahũthagĩra kĩhooto, na akahingĩria andũ ake othe maũndũ marĩa maagĩrĩire. ¹⁶ Joabu mũrũ wa Zeruia nĩwe warĩ mũnene wa ita; nake Jehoshafatu mũrũ wa Ehiludu nĩwe warĩ mwandĩki wa maũndũ ma ihinda rĩu; ¹⁷ nake Zadoku mũrũ

wa Ahitubu* na Ahimeleku mūrū wa Abiatharu maarĩ athĩnjĩri-Ngai; nake Seraia aarĩ mwandĩki. ¹⁸ Nake Benaia mūrū wa Jehoiada nĩwe warĩ mūnene wa Akerethi na Apelethi;† nao ariũ a Daudi maarĩ ataari a mũthamaki.

9

Daudi na Mefiboshethu

¹ Nake Daudi akĩũria atĩrĩ, “Nĩ kũrĩ mũndũ o na ũmwe ũtigariite wa nyũmba ya Saũlũ ũria ingituga nĩ ũndũ wa Jonathani?”

² Na rĩrĩ, nĩ kwarĩ na ndungata ya mũciĩ wa Saũlũ yetagwo Ziba. Nao makĩmũita ĩthiĩ mbere ya Daudi, nake mũthamaki akĩmũria atĩrĩ, “Wee nĩwe Ziba?”

Nayo ĩgĩcookia atĩrĩ, “Ĩĩ nĩ niĩ ndungata yaku.”

³ Nake mũthamaki akĩũria atĩrĩ, “Gũtirĩ mũndũ o na ũmwe ũtigariite wa nyũmba ya Saũlũ ũria ingĩonia ũtugi wa Ngai?”

Nake Ziba agĩcookeria mũthamaki atĩrĩ, “Nĩ kũrĩ na mūrũ wa Jonathani; nake nĩ mwonju magũrũ meerĩ.”

⁴ Nake mũthamaki akĩũria atĩrĩ, “Arĩ ha?”

Ziba akĩmũcookeria atĩrĩ, “Arĩ mũciĩ kwa Makiru mūrũ wa Amieli kũu Lo-Debari.”

⁵ Nĩ ũndũ ũcio, Mũthamaki Daudi agĩtũmana areehwo kuuma nyũmba ya Makiru mūrũ wa Amieli, kũu Lo-Debari.

⁶ Rĩrĩa Mefiboshethu mūrũ wa Jonathani, mūrũ wa Saũlũ, ookire harĩ Daudi, akĩnamĩrĩra amũhe gĩtĩo.

Nake Daudi akĩmwĩta “Mefiboshethu!”

Nake agĩcookia atĩrĩ, “Nĩĩ ũyũ ndungata yaku.”

⁷ Nake Daudi akĩmwĩra atĩrĩ, “Tiga gwĩtigĩra, nĩgũko-rwo ti-itherũ nĩngũgũtuga nĩ ũndũ wa thoguo Jonathani.

* 8:17 Zadoku aarĩ wa rũciaro rwa Eliazaru, na nĩwe waitĩrĩrie Solomoni maguta nĩguo athamake ithenya rĩa Daudi. † 8:18 Thigari cia Akerethi na cia Apelethi ciarĩ thigari cia gũkomborwo.

Nīngūgūcookeria gīthaka gīothe kīrīa kīarī gīa gukaguo Saūlū, nawe ūrīrīagīra irio metha-inī yakwa hīndī ciothe.”

⁸ Nake Mefiboshethu akīinamīrīra, akiuga atīrī, “Ndungata yaku ikīrī kī, atī nīguo ūrūmbūiye nguī nguū ta nīi?”

⁹ Hīndī iyo mūthamaki agītūmanīra Ziba, ndungata ya Saūlū, akīmwīra atīrī, “Nīndahe mūrū wa mūrīū wa mwathi waku indo ciothe iria ciarī cia Saūlū na cia nyūmba yake. ¹⁰ Wee, hamwe na ariū aku na ndungata ciaku, nī inyuī mūrīmūrīmagīra mūgūnda, na mūkainūkia magetha, nīgeetha mūrū wa mūrīū wa mwathi waku oonage irio. Nake Mefiboshethu, mūrū wa mūrīū wa mwathi waku, arīrīagīra irio metha-inī yakwa hīndī ciothe.” (Na rīrī, Ziba aarī na ariū ikūmi na atano, na ndungata mīrongo īrī.)

¹¹ Ningī Ziba akīira mūthamaki atīrī, “Ndungata yaku nīngwīka o ūrīa wothe mūthamaki, mwathi wakwa, egwatha ndungata yake īike.” Nī ūndū ūcio Mefiboshethu aarīagīra irio metha-inī ya Daudī taarī ūmwe wa ariū a mūthamaki.

¹² Mefiboshethu aarī na kamwana geetagwo Mika, nao andū othe a mūciī wa Ziba maarī ndungata cia Mefiboshethu. ¹³ Nake Mefiboshethu agītūūra Jerusalemu, tondū aarīagīra irio metha-inī ya mūthamaki hīndī ciothe, nake arī mwonju magūrū meerī.

10

Daudi Gūtooria Aamoni

¹ Thuutha wa mahinda macio, mūthamaki wa Aamoni* agīkua, nake Hanuni, mūrīū, agītūika mūthamaki ithenya rīake. ² Nake Daudi agīciiria atīrī, “Nīnguonania ūtugi

* 10:1 Andū a Amoni maarī andū a werū-inī, na maatūūraga mwena wa irathiro wa Jorodani.

kūrī Hanuni mūrū wa Nahashu, o ta ūrīa ithe aanjikire maūndū ma ūtugi.” Nī ūndū ūcio Daudi agītūma andū kūrī Hanuni makamūcakaithie nī ūndū wa gūkuirwo nī ithe.

Rīrīa andū acio maatūmītwo nī Daudi maakinyire būrūri-inī wa Aamoni-rī, ³ andū arīa maarī igweta a Aamoni makīūria Hanuni mwathi wao atīrī, “Ūreciiria Daudi nī thoguo aratīa nī ūndū wa gūgūtūmīra andū magūcakaithie? Githī Daudi ndatūmīte andū aya kūrī we nīgeetha matuīrie na mathigaane itūūra rīrī inene, nīguo macooke marītunyane?” ⁴ Nī ūndū ūcio Hanuni akīnyitithia andū acio a Daudi, na akīmenjithia nderu rwere rūmwe, na agītīnia nguo ciao irima gatagatī ka njikarīro, na akīmaingata.

⁵ Hīndī irīa Daudi eerirwo ūhoru ūcio, agītūma andū makamatūnge tondū andū acio nīmaconorithītio mūno. Mūthamaki akiuga atīrī, “Ikarai kūu Jeriko nginya nderu cianyu ikūre, mūcooke mūūke.”

⁶ Rīrīa Aamoni maamenyire atī nīmatuīkīte kīndū kīnungu harī Daudi-rī, makīandīka thigari cia magūrū cia Asuriata ngiri mīrongo īrī kuuma Bethi-Rehobu na Zoba, o na mūthamaki wa Maaka arī na andū ake ngiri īmwe, o na ningī andū ngiri ikūmi na igīrī kuuma Tobu.

⁷ Nake Daudi aigua ūhoru ūcio-rī, agītūma Joabu na ita rīothe rīa mbaara. ⁸ Nao Aamoni makiumagara, makīara mīhari ya mbūtū cia mbaara kīhingo-inī gīa itūūra rīao inene, nao Asuriata a Zoba na Rehobu, na andū a Tobu na a Maaka maarī oiki kūu werū-inī.

⁹ Nake Joabu akīona atī thigari nīciarīte mīhari ya mbaara mbere yake o na thuutha wake; nī ūndū ūcio agīthuura mbūtū imwe iria ciarī njamba mūno kūu Isiraeli, agīcitūma ikarūe na Asuriata. ¹⁰ Andū acio angī akīmaiga watho-inī wa Abishai mūrū wa nyina, na akīmatūma makarūe na andū a Amoni. ¹¹ Joabu akiuga atīrī,

“Asuriata mangĩngĩria hinya-rĩ, wee ũuke ũndeithie; no Aamoni mangĩgũkĩria hinya-rĩ, nĩngũũka ngũteithie. ¹² Wĩyũmĩrĩrie nĩgeetha tũrũe na ũcamba nĩ ũndũ wa andũ aitũ na nĩ ũndũ wa matũũra manene ma Ngai witũ. Jehova nĩegwĩka ũrĩa ekuona kwagĩrĩire maitho-inĩ make.”

¹³ Ningĩ Joabu na mbũtũ ciake magĩtharĩkĩra Asuriata, nao makĩmoorĩra. ¹⁴ Rĩrĩa Aamoni moonire atĩ Asuriata nĩmaroorarĩ, o nao makĩũrĩra Abishai, magĩtoonya thĩinĩ wa itũũra rĩrĩa inene. Nĩ ũndũ ũcio Joabu agĩcooka agĩtiga kũrũa na Aamoni na agĩthĩĩ Jerusalemu.

¹⁵ Thuutha wa Asuriata kuona atĩ nĩmatoorio nĩ andũ a Isiraeli-rĩ, magĩcookanĩrĩra hamwe ringĩ. ¹⁶ Hadadezeri aarehithĩtie Asuriata kuuma mũrĩmo wa Rũũĩ rwa Farati; magĩthĩĩ nginya Helamu marĩ hamwe, na Shobaki mũnene wa mbũtũ ya ita ya Hedadezeri, amatongoretie.

¹⁷ Rĩrĩa Daudi eerirwo ũhoru ũcio-rĩ, agĩcookanĩrĩria ita rĩa Isiraeli rĩothe, makĩringa Rũũĩ rwa Jorodani na magĩthĩĩ nginya Helamu. Nao Asuriata makĩara mĩhari ya thigari cia mbaara igatũngane na Daudi, makĩrũa nake. ¹⁸ No rĩrĩ, Asuriata acio makĩũrĩra Isiraeli, nake Daudi akĩũruga andũ magana mũgwanja arĩa maatwarithagia ngaari ciao cia ita, na thigari cia magũrũ ngiri mĩrongo ĩna. Ningĩ akĩũruga Shobaki mũnene wa mbũtũ ciao, agĩkuĩra kũu. ¹⁹ Rĩrĩa athamaki arĩa othe maarĩ ndungata cia Hadadezeri moonire atĩ nĩmahootwo nĩ Isiraeli-rĩ, magĩthondeka thayũ na andũ a Isiraeli na magĩtuĩka a gwathagwo nĩo.

Nĩ ũndũ ũcio Asuriata magĩtĩgĩra gũcooka gũteithia Aamoni hĩndĩ ĩngĩ.

11

Daudi na Bathisheba

¹ Na rĩrĩ, hĩndĩ ya kĩmera yaakinya ihinda rĩrĩa athamaki maathiiaga mbaara-inĩ-rĩ, Daudi agĩtũma Joabu

hamwe na andũ a mũthamaki na mbũtũ ciothe cia mbaara cia andũ a Isiraeli. Makĩananga Aamoni magĩcooka makĩ-rigiicĩria Raba. Nowe Daudi agĩtigwo Jerusalemu.

² Hwaĩ-inĩ ùmwe-rĩ, Daudi agĩũkĩra akiuma gĩtanda-inĩ gĩake agĩthiĩ gũceeranga kũu igũrũ rĩa nyũmba ya ũthamaki. Arĩ nyũmba igũrũ akĩona mũndũ-wa-nja agĩthamba. Mũndũ-wa-nja ũcio aarĩ mũthaka mũno, ³ nake Daudi agĩtũma mũndũ agatuĩrie ũhoru wake. Mũndũ ũcio akĩmwĩra atĩrĩ, “Githĩ ũcio ti Bathisheba, mwarĩ wa Eliamu mũtumia wa Uria ũrĩa Mũhiti?” ⁴ Hĩndĩ iyo Daudi agĩtũma andũ makamũgĩre. Mũndũ-wa-nja ũcio agĩũka kũrĩ Daudi, nake agĩkoma nake. (Nĩgũkorwo nĩethereetie ihinda rĩake rĩa mweri), nake agĩgĩcookera gwake mũciĩ. ⁵ Mũndũ-wa-nja ũcio akĩgĩa nda na agĩtũmanĩra Daudi, akĩmwĩra atĩrĩ, “Ndĩ na nda.”

⁶ Nĩ ũndũ ũcio Daudi agĩtũma mũndũ athiĩ kũrĩ Joabu amwĩre atĩrĩ: “Ndũmĩra Uria ũrĩa Mũhiti.” Nake Joabu agĩtũma Uria kũrĩ Daudi. ⁷ Rĩrĩa Uria ookire, Daudi akĩmũuria ũhoru wa ũrĩa Joabu aatarĩ, na ũhoru wa ũrĩa thigari ciatarĩ, na ũrĩa mbaara yathiiaga na mbere. ⁸ Nĩngĩ Daudi akĩra Uria atĩrĩ, “Ikũrũka gwaku mũciĩ ũgethambe magũrũ.” Nĩ ũndũ ũcio Uria akiuma nyũmba ya ũthamaki, na akĩrũmĩrĩrio kĩheo kuuma kũrĩ mũthamaki. ⁹ No Uria agĩkoma itoonyero-inĩ rĩa nyũmba ya ũthamaki hamwe na ndungata ciothe cia mwathi wake, na ndaigana gũikũrũka athiĩ gwake mũciĩ.

¹⁰ Rĩrĩa Daudi eerirwo atĩrĩ, “Uria ndaanathiĩ mũciĩ,” akĩmũuria atĩrĩ, “Githĩ to hĩndĩ woka kuuma kũraya? Nĩ kĩĩ kĩragiririe ũthiĩ mũciĩ?”

¹¹ Uria akĩra Daudi atĩrĩ, “Ithandũkũ rĩa Jehova, na andũ a Isiraeli na a Juda maikarĩte hema-inĩ, na mwathi wakwa Joabu na andũ a mwathi wakwa maikarĩte kambĩ kũu werũ-inĩ. Ingĩrahotire atĩa gũthiĩ mũciĩ gwakwa,

ngarīe na nganyue, na ngome na mūtumia wakwa? Titherū o ta ūria ūtūūraga muoyo, ndingīka ūndū ta ūcio!”

¹² Ningī Daudi akīmwīra atīrī, “Ikara gūkū mūthenya ūngī ūmwe, na rūciū nīngagūtūma ūcooke.” Nī ūndū ūcio Uria agīkara Jerusalemu mūthenya ūcio na ūcio ūngī warūmīrīire. ¹³ Hīndī ĩrīa Daudi aamwītire, akīrīānīra na akīnyuuanīra nake, ningī Daudi agītūma arīio nī njoohi. No hwaī-inī Uria agīthīi gūkoma mūgeeka-inī wake arī hamwe na ndungata cia mwathi wake; ndaigana gūthīi gwake mūciī.

¹⁴ Rūciinī Daudi akīandīkīra Joabu marūa, akīmanengera Uria atware. ¹⁵ Marūa macio maandīkītuo atīrī, “Twara Uria harīa mbaara īhīire mūno. Ūcooke ūmūti-ganīrie nīgeetha ooragwo.”

¹⁶ Rīrīa Joabu aarigiicīrie itūūra rīrīa inene, akīga Uria harīa aamenyaga nīho haarī agitīri arīa maarī njamba. ¹⁷ Hīndī ĩrīa andū a itūūra rīu inene mookire kūrūa na Joabu-rī, andū amwe a mbūtū cia ita cia Daudi makīūragwo; o nake Uria ūria Mūhiti agīkua.

¹⁸ Joabu agītūma mūndū kūrī Daudi akamūhe ūhoru wothe wa mbaara īyo. ¹⁹ Nake agīatha mūndū ūcio aatūmire atīrī: “Warīkia kūhe mūthamaki ūhoru ūyū wothe wa mbaara, ²⁰ marakara ma mūthamaki maahota kūrīrīmbūka, nake aahota gūkūūria atīrī, ‘Nī kīi gītūmire mūkuhīrīrie mūno itūūra inene mūkarūe? Kaī mūtooī atī no mamūrathe na mīguī marī rūthingo-inī? ²¹ Nūū woragire Abimeleku mūrū wa Jerubu-Beshethu? Githī ti mūndū-wa-nja wamūikīrie ihiga rīa gīthīi arī rūthingo-inī igūrū? Githī ti kīo gīatūmire akuīre kūu Thebezu? Nī kīi kīratūmire mūthīi hakuhī mūno na rūthingo?’ Angī-gakūūria ūguo-rī, nawe ūkaamūcookeria atīrī, ‘O nayo ndungata yaku, Uria ūria Mūhiti nīmūkuū.’”

²² Nake mūndū ūcio akiumagara agīthīi, na aakinya, akīra Daudi maūndū mothe marīa Joabu aamūtūmīte

akoige. ²³ Nake mündũ ũcio watũmĩtwo akĩira Daudi atĩrĩ, “Andũ acio maratũkĩririe hinya, marooka kũrũa na ithuĩ werũ-inĩ, no tũrakĩmahũndũra nginya itoonyero-inĩ rĩa kĩhingo gĩa itũũra rĩrĩa inene. ²⁴ Hĩndĩ ĩyo aikia a mĩguĩ maraikĩria ndungata ciaku mĩguĩ marĩ rũthingo igũrũ, na andũ amwe a mũthamaki nĩmakuĩte. O na ningĩ ndungata yaku, Uria ũrĩa Mũhiti, nĩkuĩte.”

²⁵ Nake Daudi akĩira mündũ ũcio atĩrĩ, “Thiĩ wĩre Joabu atĩrĩ: ‘Tiga kũigua ũũru nĩ ũhoro ũcio; rũhiũ rũniinaga mündũ ũmwe o ta ũrĩa rũniinaga ũrĩa ũngĩ. Thiĩ na mbere gũtharĩkĩra itũũra rĩu inene ũrĩanange.’ Wĩre Joabu ũguo nĩgeetha ũmũũmĩrĩrie.”

²⁶ Rĩrĩa mũtumia wa Uria aiguire atĩ mũthuumiwe nĩakuĩte-rĩ, akĩmũcakaĩra. ²⁷ Ihinda rĩa gũcakaya rĩathira-rĩ, Daudi akiuga areehwo gwake nyũmba, nake agĩtuĩka mũtumia wake, na akĩmũciarĩra kahĩ. No rĩrĩ, ũndũ ũcio Daudi ekĩte nĩwarakaririe Jehova.

12

Nathani Kũrũithia Daudi

¹ Nake Jehova agĩtũma Nathani kũrĩ Daudi. Na aakinya harĩ we Nathani akĩira Daudi atĩrĩ, “Itũũra-inĩ rĩmwe nĩ kwarĩ na andũ eerĩ, ũmwe aarĩ gĩtonga na ũrĩa ũngĩ aarĩ mũthĩini. ² Mündũ ũcio warĩ gĩtonga aarĩ na ndũũru nyingĩ cia ng’ondũ na cia ng’ombe, ³ no ũcio warĩ mũthĩini ndaarĩ na kĩndũ tĩa o kamwatĩ kanini aagũrĩte. Agĩkar-era, nako gagĩkũra karĩ hamwe nake na ciana ciake. Kaarĩaga irio ciake, na gakanyuuagĩra gĩkombe gĩake na gaakomaga gĩthũri-inĩ gĩake. Nako kaarĩ o ta mwarĩ.

⁴ “Na rĩrĩ, mũgeni agĩũka gwa gĩtonga kũu, no gĩtonga kũu gĩkĩrega kuoya ng’ondũ ĩmwe yakĩo kana ng’ombe gĩthondekere mũgeni ũcio wokĩte gwakĩo gĩa kũrĩa.

Handū ha ũguo, gĩkĩoya kamwatĩ karĩa kaarĩ ka mũthũini na gĩgĩthĩnjĩra mündũ ũcio wokĩte gwakĩo mũciĩ.”

⁵ Daudi agĩcinwo nĩ marakara nĩ ũndũ wa mündũ ũcio, akĩĩra Nathani atĩrĩ, “Ti-itherũ o ta ũrĩa Jehova atũũraga muoyo, mündũ ũcio wĩkĩte ũguo agĩrĩrwo nĩ gũkua! ⁶ No nginya arĩhe kamwatĩ kau maita mana, tondũ nĩekĩte ũndũ ta ũcio na akaaga kũiguanĩra tha.”

⁷ Hĩndĩ ĩyo Nathani akĩĩra Daudi atĩrĩ, “Wee nĩwe mündũ ũcio! Ũũ nĩguo Jehova, Ngai wa Isiraeli, ekuuga: ‘Ndagũitĩrĩrie maguta ũtuĩke mũthamaki wa Isiraeli, na ngĩkũhonokia kuuma guoko-inĩ gwa Saũlũ.

⁸ Nĩndakũheire nyũmba ya mwathi waku, o na ngĩkũhe atumia a mwathi waku maikare gĩthũri-inĩ gĩaku. Nĩndakũheire nyũmba ya Isiraeli na Juda. Na kũngĩkorwo maũndũ macio maarĩ manini na matiakũiganĩterĩ, nĩngĩakũheire maũndũ mangĩ maingĩ. ⁹ Nĩ kĩ gĩtũmĩte ũnyarare kiugo kĩa Jehova, ũgeeka ũũru maitho-inĩ make? Nĩwooragithirie Uria ũrĩa Mũhiti na rũhiũ rwa njora, na ũkĩoya mũtumia wake atuĩke mũtumia waku. Wamũragithirie na rũhiũ rwa njora rwa andũ a Amoni. ¹⁰ Na nĩ ũndũ ũcio, rũhiũ rwa njora rũtikeehera nyũmba yaku, nĩ ũndũ nĩwaanyararire nĩ, na ũkĩoya mũtumia wa Uria ũrĩa Mũhiti atuĩke mũtumia waku.’

¹¹ “Jehova ekuuga ũũ: ‘Nĩngũkũrehithĩria thĩĩna kuuma nyũmba yaku wee mwene. O maitho-inĩ maku nĩngoya atumia aku, ndĩmahe mündũ wa nyũmba yaku, nake nĩagakoma na atumia acio aku mũthenya barigici. ¹² Wekire ũndũ ũcio na hitho, no Nĩ ngeeka ũndũ ũyũ mũthenya barigici andũ a Isiraeli othe makĩonaga.’”

¹³ Hĩndĩ ĩyo Daudi akĩĩra Nathani atĩrĩ, “Nĩnjĩhĩrie Jehova.”

Nathani agĩcookia atĩrĩ, “Jehova nĩakwehereirie mehia maku. Ndũgũkua. ¹⁴ No tondũ nĩtũmĩte thũ cia Jehova

imūmene mūno nĩ ūndũ wa gwĩka ũguo-rĩ, mwana ũcio ũciarĩrwo nĩegũkua.”

¹⁵ Nathani aarĩkia kũinũka mũciĩ-rĩ, Jehova agĩtũma mwana ũcio mūtumia wa Uria aaciarĩre Daudi arũare.

¹⁶ Daudi agĩthaitha Ngai nĩ ūndũ wa mwana ũcio. Akĩihinga kũrĩa irio, agĩtoonya nyũmba yake, agĩkoma thĩ ũtukũ ũcio wothe. ¹⁷ Nao athuuri a nyũmba yake magĩthiĩ hakuhĩ nake nĩguo mamũrũgamie na igũrũ nowe akĩrega, na ndaigana kũrĩanĩra irio nao.

¹⁸ Mũthenya wa mũgwanja wakinya-rĩ, mwana ũcio agĩkua. Nacio ndungata cia Daudi igĩtigĩra kũmwĩra atĩ mwana ũcio nĩakuĩte. Tondũ cioigire atĩrĩ, “Rĩrĩa mwana oima muoyo, twarĩirie Daudi na akaaga gũtũthikĩrĩria. Twahota atĩa kũmwĩra atĩ mwana nĩakuĩte? Aahota kwĩgera ngero.”

¹⁹ No Daudi akĩona atĩ ndungata ciake nĩciaheehanaga, akĩmenya atĩ mwana ũcio nĩakuĩte. Nake akĩũria atĩrĩ, “Kaĩ mwana akuĩte?”

Nao magĩcookia atĩrĩ, “Ĩĩ, nĩakuĩte.”

²⁰ Hĩndĩ ĩyo Daudi agĩũkĩra. Aarĩkia gwĩthamba, akĩhaka maguta na akĩgarũrĩra nguo ciake, agĩthiĩ nyũmba ya Jehova, akĩinamĩrĩra, na akĩhooya. Ningĩ agĩcooka agĩthiĩ gwake mũciĩ, agĩtia irio, nao andũ ake makĩmũrehere, akĩrĩa.

²¹ Ndungata ciake ĩkĩmũũria atĩrĩ, “Ūreka ũguo nĩkĩ? Rĩrĩa mwana ararĩ muoyo nĩũrehingĩte na ũkarĩra, no mwana akua-rĩ, wokĩra na warĩa irio!”

²² Nake agĩcookia atĩrĩ, “Hĩndĩ ĩrĩa mwana ararĩ muoyo-rĩ, ndĩrehingaga na ngarĩra. ngĩciiria atĩrĩ, ‘Nũũ ũũĩ? Jehova aahota kũnjiguĩra tha areke mwana ũcio atũũre muoyo.’ ²³ No rĩu tondũ nĩakuĩte-rĩ, nĩ kĩĩ gĩgũtũma ndĩhinge? Ndaahota kũmũriũkia? Nĩ nĩĩ ngaathĩĩ kũrĩ we, no ndangĩcooka kũrĩ nĩĩ.”

²⁴ Hīndī ĩyo Daudi akĩhooreria mūtumia wake Bathisheba, agĩthiĩ kūrī we na agĩkoma nake. Nake agĩciara kahĩĩ; nao magĩgatua Solomoni. Nake Jehova agĩkenda; ²⁵ na tondũ Jehova nĩakendete-rĩ, agĩtũma mũnabii Nathani athiĩ agakahe rĩitwa Jedidia.

²⁶ Hīndī ĩyo Joabu akĩhũũra Raba itũũra rĩa andũ a Amoni, na agĩtunyana kĩhingo kĩa hinya kĩa ũthamaki. ²⁷ Ningĩ Joabu agĩtũma andũ kūrī Daudi, akiuga atĩrĩ, “Nĩhũũranĩte na itũũra rĩa Raba o na ngatunyana maai marĩo. ²⁸ Na rĩrĩ, cookanĩrĩria ikundi icio ingĩ cia mbũtũ cia ita, nĩguo ithiũrũrũkĩrie itũũra rĩu inene irĩgwatĩre. Angĩkorwo ti ũguo nĩngwĩgwatĩra itũũra rĩu inene, narĩo rĩitanagio na niĩ.”

²⁹ Nĩ ũndũ ũcio Daudi agĩcookanĩrĩria mbũtũ ciake ciothe cia ita agĩthiĩ Raba, na akĩrĩtharĩkĩra, akĩrĩtunyana. ³⁰ Nake akĩoya thũmbĩ ya mūtwe ya mũthamaki wao, na ũritũ wayo warĩ taranda ĩmwe* ya thahabu, na nĩ yagemetio na tũhiga twa goro, nayo ĩkĩgĩrĩrwo mūtwe wa Daudi. Nake agĩtaha indo nyingĩ mũno kuuma itũũra rĩu inene, ³¹ akĩrutũrũra aikari akuo, akĩmahe wĩra wa gwatũra mbaũ na mĩthumeno, na aruti wĩra na harũ cia igera na wa mathanwa, na wĩra wa gũthondeka maturubarĩ. Nake eekire ũguo matũũra-inĩ mothe ma Aamoni. Thuutha ũcio Daudi na mbũtũ ciake ciothe cia ita magĩcooka Jerusalemu.

13

Amunoni na Tamaru

¹ Thuutha wa mahinda macio-rĩ, Abisalomu mũrũ wa Daudi aarĩ na mwarĩ wa nyina mũthaka mũno wetagwo Tamaru, nake Amunoni mũrũ wa Daudi akĩmwenda mũno.

* 12:30 nĩ ta kilo 34

² Amunoni agītangīka nginya agītua nĩ mūrūaru nĩ ūndũ wa mwarĩ wa ithe Tamaru, nīgũkorwo aarĩ mūrĩtu gathirange,* na nionaga arĩ hinya kũmwīka ūndũ o na ūrĩkũ.

³ Na rĩrĩ, Amunoni aarĩ na mūratawe wetagwo Jonadabu mūrũ wa Shimea, mūrũ wa nyina na Daudi. Jonadabu aarĩ mūdũ mwara mũno. ⁴ Akĩũria Amunoni atĩrĩ, “Nĩ kĩĩ gītũmĩte wee mūrũ wa mũthamaki woneke o ūkĩhinyĩrĩrika rũciinĩ o rũciinĩ? Kaĩ ūtangĩnjĩra gītũmi?”

Amunoni akĩmwĩra atĩrĩ, “Nĩ kwenda nyendeete Tamaru, mwarĩ wa nyina na Abisalomu mūrũ wa baba.”

⁵ Jonadabu akĩmwĩra atĩrĩ, “Thiĩ ūrĩrĩ na wĩtue atĩ ūrĩ mūrūaru. Rĩrĩa thoguo arĩũka gũkuona, ūmwĩre atĩrĩ, ‘No nyende mwarĩ wa baba Tamaru oke aahe kĩndũ gĩa kũrĩa. Andugĩre irio ngionaga, nĩguo ndĩmuone, na ningĩ ndĩe acinyiitĩte na guoko gwake.’”

⁶ Nĩ ūndũ ūcio Amunoni agĩkoma na agītua nĩ mūrūaru. Na rĩrĩa mũthamaki ookire kũmuona, Amunoni akĩmwĩra atĩrĩ, “No nyende mwarĩ wa baba Tamaru oke aathondekere tũmĩgate ngionaga, nĩguo ndĩe anyiitĩte na guoko gwake.”

⁷ Daudi agītũmanĩra Tamaru nyũmba-inĩ ya ūthamaki, akĩmwĩra atĩrĩ, “Thiĩ nyũmba ya mūrũ wa thoguo Amunoni, ūmũthondekere irio.” ⁸ Nĩ ūndũ ūcio Tamaru agĩthiĩ nyũmba ya mūrũ wa ithe Amunoni, akĩmũkora akomete. Akĩoya mũtu, akĩũkanda, agĩthondeka mũgate Amunoni akĩmuonaga, na akĩũruga. ⁹ Agĩcooka akĩoya rũgĩo, akĩmũihũrĩra mũgate, nowe akĩrega kũrĩa.

Amunoni akiuga atĩrĩ, “Andũ othe nĩmeherio haha.” Nĩ ūndũ ūcio andũ othe makiuma nja, makĩmũtiga. ¹⁰ Hĩndĩ ĩyo Amunoni akĩra Tamaru atĩrĩ, “Ndehera irio haha

* 13:2 Airĩtu gathirange maikaraga nyũmba cia airĩtu mwanya, na matĩgĩaceereire arũme, o na kana aanake a ithe ūmwe nao.

nyumba yakwa ya toro, nĩguo ndie ũcinyiitite na guoko gwaku.” Nake Tamaru akĩoya mũgate ũria aathondekete, akĩutwarĩra mūrũ wa ithe Amunoni nyumba yake ya toro. ¹¹ No rĩria aamūtwarĩire nĩguo arĩe, Amunoni akĩmũnyi-ita, akiuga atĩrĩ, “Ūka ngome nawe, mwarĩ wa baba.”

¹² Nake akĩmwĩra atĩrĩ, “Aca, mūrũ wa baba! Tiga kũnyiita na hinya. Ũndũ ta ũyũ ndwagĩrĩire gwĩkwo Isiraeli! Tiga gwĩka ũndũ ũyũ wa waganu. ¹³ Ha ũhoru wakwa nago atĩa? Thoni ciakwa ingĩcitwara nakũ? O nawe-rĩ, ũhoru waku ũgũikara atĩa? Ūkuoneka ũhaana ta mũndũ ũmwe wa andũ arĩa aaganu na akĩigu thĩinĩ wa Isiraeli. Ndagũthaita aria na mũthamaki; tondũ ndangĩgiria ũũhikie.” ¹⁴ Nowe akĩrega kũmũigua, na tondũ aarĩ na hinya kũmũkĩra, akĩmũnyiita na agĩkoma nake na hinya.

¹⁵ Ningĩ Amunoni akĩmũthũũra na rũthũũro rũnene makĩria. Ti-itherũ, aamũthũũrĩre gũkĩra ũria aamwendete. Amunoni akĩmwĩra atĩrĩ, “Ūkĩra, wehere haha!”

¹⁶ Tamaru akĩmwĩra atĩrĩ, “Aca! Kũnyingata thiĩ nĩ ihĩtia inene makĩria gũkĩra ũguo wanjĩka.”

Nowe akĩrega kũmũigua. ¹⁷ Nake Amunoni agĩta ndungata yake, akĩmũira atĩrĩ, “Eheria mũndũ-wa-nja ũyũ haha, na oima ũhinge mũrango.” ¹⁸ Nĩ ũndũ ũcio ndungata yake ikĩmũikia na nja, na ikĩhinga mũrango. Nake Tamaru eehumbĩte nguo ndaaya yagemetio na magemio ma goro, tondũ airĩtu arĩa gathirange a mũthamaki meehumbaga nguo ta iyo. ¹⁹ Tamaru akĩitĩrĩria mũhu mūtwe, na agĩtarũra nguo iyo ndaaya ng’emie irĩa eehumbĩte. Agĩcooka akĩigĩrĩra guoko gwake mūtwe, agĩthiĩ akĩrĩraga aanĩrĩire.

²⁰ Nake mūrũ wa nyina Abisalomu akĩmũũria atĩrĩ, “Kaĩ muuma na Amunoni, mūrũ wa thoguo? Rĩu ta gĩkire, mwarĩ wa maitũ, tondũ we nĩ mūrũ wa thoguo. Tiga kũigua ũũru ngoro nĩ ũndũ wa ũndũ ũcio.” Nake

Tamaru agĩtũũra mũciĩ kwa mũrũ wa nyina Abisalomu, arĩ mũndũ-wa-nja ũrĩ na kĩaha kĩnene.

²¹ Hĩndĩ ĩrĩa Mũthamaki Daudi aiguire maũndũ macio mothe-rĩ, akĩrakara mũno. ²² Abisalomu ndaigana kwaria na Amunoni ũndũ o na ũrĩkũ, mwega kana mũũru; nĩathũũrire Amunoni tondũ nĩaconorithĩtie mwarĩ wa nyina Tamaru.

Abisalomu Kũũraga Amunoni

²³ Mĩaka ĩrĩ yathira, hĩndĩ ĩrĩa amuri a ng'onde guoya a Abisalomu maarĩ kũu Baali-Hazoru hakuhĩ na mũhaka wa Efiraimu-rĩ, agĩta ariũ a mũthamaki othe mathiĩ kuo. ²⁴ Abisalomu agĩthiĩ kũrĩ mũthamaki, akĩmwĩra atĩrĩ, “Ndungata yaku nĩĩtite amuri ng'onde guoya. Hihi mũthamaki na anene ake no moke tũkorwo hamwe.”

²⁵ Mũthamaki agĩcookia atĩrĩ, “Aca, mũrũ wakwa. Tũtiagĩrĩrwo nĩ gũthiĩ ithuothe; twahota gũtuĩka mũrigo harĩwe.” O na gũtuĩka Abisalomu nĩamũthaitire-rĩ, nĩaregire biũ gũthiĩ, no akĩmũhe kĩrathimo gĩake.

²⁶ Ningĩ Abisalomu akĩmwĩra atĩrĩ, “Angĩkorwo ti ũguorĩ, ndagũthaita ũreke mũrũ wa baba Amunoni athiĩ na ithuĩ.”

Nake mũthamaki akĩmũũria atĩrĩ, “Nĩ kĩ gĩgũtũma athiĩ na inyuĩ?” ²⁷ Nowe Abisalomu akĩmũringĩrĩria, na nĩ ũndũ ũcio mũthamaki akĩreka Amunoni mathiĩ nake, hamwe na ariũ acio angĩ a mũthamaki.

²⁸ Abisalomu agĩatha andũ ake, akĩmeera atĩrĩ, “Ta thikĩrĩriai! Rĩrĩa Amunoni arĩkorwo akenete nĩ kũnyua ndibei akarĩo, na inyuĩ ndĩmwĩre atĩrĩ, ‘Ringai agwe thĩ,’ hĩndĩ ĩyo mũũragei. Mũtigitigĩre. Githĩ ti nĩ ndĩmũheete watho ũcio? Ũmĩrĩriai mũtuĩke njamba.” ²⁹ Nĩ ũndũ ũcio andũ a Abisalomu magĩka Amunoni o ta ũrĩa Abisalomu aamaathĩte. Hĩndĩ ĩyo ariũ othe a mũthamaki magĩũkĩra, makĩhaica nyũmbũ ciao, makĩũra.

³⁰ Marī njīra-inī makĩūra-rī, ũhoru ũcio ũgĩkinyīra Daudi, akĩrwo atĩrī, “Abisalomu nīoragĩte ariũ othe a mũthamaki; gũtirī o na ũmwe ũtigarĩte.” ³¹ Nake mũthamaki agĩũkĩra, agĩtembũranga nguo ciake, agĩkoma thĩ; o nacio ndungata ciake ikĩrũgama hakuhĩ nake, na igĩtembũranga nguo ciacio.

³² No Jonadabu mũrũ wa Shimea, mũrũ wa nyina na Daudi, akiuga atĩrī, “Mwathi wakwa, tiga gwĩciiria atĩ moragĩte ariũ othe a mũthamaki; no Amunoni wiki ũkuĩte. Ũndũ ũcio ũtũire ũrĩ muoroto wa Abisalomu kuuma mũthenya ũrĩa Amunoni aanyitire mwarĩ wa nyina Tamaru na hinya. ³³ Mũthamaki mwathi wakwa ndagĩrĩrwo nĩkũrũmbũiya ũhoru ũcio wa atĩ ariũ othe a mũthamaki nĩmakuĩte. Amunoni nowe wiki ũkuĩte.”

³⁴ Hĩndĩ ĩyo Abisalomu nĩakoretwo orĩte.

Na rĩrĩ, mũndũ ũrĩa warangagĩra itũũra agĩcũthĩrĩria na akĩona andũ aingĩ njīra-inī mwena wake wa ithũiro, maikũrũkiire mwena-inī wa kĩrĩma. Nake mũrangĩri agĩthĩ akĩra mũthamaki atĩrī, “Nĩndĩrona andũ mwena ũũrĩa wa Horonaimu, mwena-inī wa kĩrĩma.”

³⁵ Jonadabu akĩra mũthamaki atĩrī, “Ta kĩone, ariũ a mũthamaki marĩ haha; o ta ũrĩa ndungata yaku ĩkwĩrĩre, ũguo noguo gũtarĩ.”

³⁶ Na aarĩkia kwaria o ro ũguo-rĩ, ariũ a mũthamaki magĩũka makĩrĩraga na mũgambo mũnene. O nake mũthamaki na ndungata ciake ciothe makĩrĩra marĩ na ruo rũnene.

³⁷ Nake Abisalomu akĩũra agĩthĩ gwa Talimai mũrũ wa Amihudi, mũthamaki wa Geshuru. Nowe Mũthamaki Daudi agĩcakaĩra mũriũ mũthenya o mũthenya.

³⁸ Thuutha wa Abisalomu kũũrĩra Geshuru, aikarire kuo mĩaka ĩtatũ. ³⁹ Nayo ngoro ya mũthamaki nĩyeriragĩria gũthĩ kũrĩ Abisalomu, tondũ nĩahooreretio ũhoru-inī ũkonĩ gĩkuũ kĩa Amunoni.

14

Abisalomu Gūcooka Jerusalemu

¹ Na rīrī, Joabu mūrū wa Zeruia nīamenyete atī ngoro ya mūthamaki nīyeriragīria kuona Abisalomu. ² Nī ūndū ūcio, Joabu agītūma mūdū athiī Tekoa akagīre mūdū-wa-nja warī mūūgī, areehwo kuuma kūu. Akīira mūdū-wa-nja ūcio atīrī, “Wītue atī nīūracakaya. Wīhumbe nguwo cia macakaya, na ndūkehake maguta o na marīkū. Wītue ta mūdū-wa-nja ūikarīte matukū maingī akīrīrīra mūdū mūkuū. ³ Ūcooke ūthiī kūrī mūthamaki ūmwarīrie ciugo ici.” Nake Joabu akīmwīra ūrīa ekuuga.

⁴ Rīrīa mūdū-wa-nja ūcio wa kuuma Tekoa aathi-ire kūrī mūthamaki, akīgūithia, agīturumithia ūthiī thī nīguo amūhe gītīo, akīmwīra atīrī, “Wee mūthamaki, ndeithia!”

⁵ Nake mūthamaki akīmūūria atīrī, “Nī kī kīragūthīnia?”

Nake akiuga atīrī, “Ti-itherū nī ndī mūdū-wa-nja wa ndigwa; mūthuuri wakwa nīakuīte. ⁶ Nī ndungata yaku ndīrarī na ariū eerī. Nao maroogitana me mūgūnda, na harakīaga mūdū hau wa kūmateithūrana. Ūmwe aragūtha ūrīa ūngī na aramūūraga. ⁷ Na rīrī, mūhīrīga wothe nīūkīrīre ndungata yaku; ūkoiga atīrī, ‘Tūnengere mūdū ūrīa ūragīte mūrū wa nyina, nīgeetha tūmūūrage nī ūndū wa muoyo wa mūrū wa nyina ūrīa ooragīte; tūkīniine mūgai o nake.’ Nao mangīka ūguo no mahorie ikara rīrīa rīraakana, na no rīo riiki ndigairie, maniine rīitwa rīa mūthuuri wakwa, o na maniine njiaro ciake gūkū thī.”

⁸ Nake mūthamaki akīira mūdū-wa-nja ūcio atīrī, “Inūka, na nīngūruta watho nī ūndū waku.”

⁹ No mūdū-wa-nja ūcio wa Tekoa akīmwīra atīrī, “Mūthamaki mwathi wakwa, reke ūūru ūcio ūnjookerere

hamwe na nyūmba ya baba, na ũreke wee mūthamaki na gītĩ gĩaku gĩa ũthamaki wage gūcookererwo nĩ ũūru o na ũrikũ.”

¹⁰ Nake mūthamaki agĩcookia atĩrĩ, “Mündũ o na ũ angĩkwĩra ũndũ o na ũrikũ, mūrehe kūrĩ niĩ, nake ndagacooka gūgũthĩnia rĩngĩ.”

¹¹ Nake mündũ-wa-nja ũcio akĩmwĩra atĩrĩ, “Reke mūthamaki agwete rĩitwa rĩa Jehova Ngai wake, nĩguo agirĩrĩrie mūrĩhĩria wa thakame ndakae kũūragana rĩngĩ, nĩgeetha mūrĩũ wakwa ndakae kũūrago.”

Nake mūthamaki akĩmwĩra atĩrĩ, “Ti-itherũ o ta ũrĩa Jehova atũūruga muoyo-rĩ, gūtĩrĩ rũcuĩrĩ o na rũmwe rwa mūtwe wa mūrũguo rũkũgũa thĩ.”

¹² Ningĩ mündũ-wa-nja ũcio akĩmwĩra atĩrĩ, “Reke ndungata yaku ikwĩre kiugo wee mūthamaki, mwathi wakwa.”

Nake agĩcookia atĩrĩ, “Kĩarie.”

¹³ Mündũ-wa-nja ũcio akĩmũũria atĩrĩ, “Nĩ kĩĩ gītũmĩte wee ũthondeke ũndũ ta ũyũ wa gũũkĩrĩra andũ a Ngai? Rĩrĩa mūthamaki oiga ũguo-rĩ, githĩ tiwe wĩtũĩrĩre ci-ira, nĩgũkorwo mūthamaki ndacooketie mūrĩũ wake ũrĩa mũingate mũciĩ? ¹⁴ Ta ũrĩa maaĩ maitĩkaga thĩ, marĩa matangĩoeka-rĩ, no taguo arĩ o nginya ithuĩ tũkue. No Ngai ndarutaga mündũ muoyo; handũ ha gwĩka ũguo-rĩ, athondekaga njĩra nĩgeetha mündũ ũrĩa mũingate ndakae gūtũūra ta ateetwo biũ agathengio harĩ we.

¹⁵ “Na rĩrĩ, njũkĩte gũkwĩra ũhoro ũyũ wee mūthamaki mwathi wakwa tondũ andũ nĩmatũmĩte niĩ nditĩgĩre. Ndungata yaku ĩciiritie atĩrĩ, ‘Niĩ nĩngwarĩria mūthamaki; no gũkorwo nĩegwĩka ũrĩa ndungata yake ikũmũũria; ¹⁶ no gũkorwo mūthamaki nĩegwĩkĩra kũhonokia ndungata

yake kuuma guoko-inĩ kwa mündũ ũrĩa ũrageria gütũni-ina niĩ hamwe na mũriũ wakwa, matweherie kuuma kũrĩ igai rĩrĩa twaheirwo niĩ Ngai.’

¹⁷ “Na rĩrĩ, ndungata yaku ĩgũkwĩra atĩrĩ, ‘Kiugo gĩaku mũthamaki mwathi wakwa kĩrondeehere ũhurũko, nĩgũkorwo mũthamaki mwathi wakwa ahaana ta mũraika wa Ngai wa gũkũũrana wega na ũũru. Jehova Ngai waku aroikara nawe.’”

¹⁸ Hĩndĩ ĩyo mũthamaki akĩira mündũ-wa-nja ũcio atĩrĩ, “Ndũkaahithe ũndũ o wothe ũrĩa ngũkũũria.”

Nake mündũ-wa-nja ũcio akĩmwĩra atĩrĩ, “Mũthamaki mwathi wakwa nĩakĩarie.”

¹⁹ Nake mũthamaki akĩmũũria atĩrĩ, “Githĩ mütinyi-itaniĩre na Joabu ũhoro-inĩ ũyũ wothe?”

Nake mündũ-wa-nja akĩmũcookeria atĩrĩ, “Ti-itherũ o ta ũrĩa ũtũũraga muoyo, wee mũthamaki mwathi wakwa, gũtirĩ mündũ ũngũhũgũra mwena wa ũrĩo kana wa ũmotho, aregane na ũndũ o wothe ũrĩa mũthamaki mwathi wakwa angiuga. ĩĩ nĩguo, ni ndungata yaku Joabu yanjĩĩre njike ũndũ ũyũ, na niwe wĩkĩrite ciugo ici ciothe kanua-inĩ ka ndungata yaku. ²⁰ Nake Joabu, ndungata yaku niwe wĩkĩte ũguo nĩgeetha agarũre ũndũ ũrĩa ũrĩ ho ihinda rĩrĩ. Mwathi wakwa arĩ ũũgĩ ta wa mũraika wa Ngai; nĩamenyaga ũndũ wothe ũrĩa wĩkĩkaga bũrũri-inĩ.”

²¹ Mũthamaki akĩira Joabu atĩrĩ, “Nĩ wega, nĩngwĩka ũguo. Thiĩ, ũcookie mwanake ũcio ti Abisalomu.”

²² Joabu akĩgũithia aturumithĩtie ũthiũ thĩ nĩguo amũhe gĩtĩno, na akĩrathima mũthamaki. Joabu akĩmwĩra atĩrĩ, “Ūmũthĩ ndungata yaku niyamenya atĩ nĩrĩkĩtie gwĩtĩkĩrĩka maitho-inĩ maku mũthamaki mwathi wakwa, tondũ mũthamaki nĩetĩkĩrite ihooya rĩa ndungata yake.”

²³ Hĩndĩ ĩyo Joabu agĩthĩ Geshuru, na agĩcookia Abisalomu Jerusalemu. ²⁴ Nowe mũthamaki akĩmwĩra atĩrĩ, “No

nginya athiĩ mūciĩ gwake mwene; ndakarekwo oone ūthiũ wakwa.” Nĩ ūndũ ūcio Abisalomu agĩthiĩ mūciĩ gwake na ndaigana kuona ūthiũ wa mūthamaki.

²⁵ Thĩinĩ wa Isiraeli guothe gūtiarĩ mūndũ ūngĩ o na ūmwe waganagwo gūthakara ta Abisalomu. Kuuma rūcuĩrĩ rwake rwa mūtwe nginya nyarĩrĩ ciake ndaarĩ na kameni. ²⁶ Rĩrĩa rĩothe eenjaga njuĩrĩ cia mūtwe wake, nĩenjagwo o mwaka wathira rĩrĩa njuĩrĩ yamūritūhira mūno, angĩamĩthimire, ūritũ wayo wakoragwo ūrĩ cekeri magana meerĩ,* kūringana na gĩthimi kĩa mūthamaki.

²⁷ Nake Abisalomu nĩaciarire aanake atatũ na mūirĩtu ūmwe. Nake mwarĩ eetagwo Tamaru, na aarĩ mūndũ-wanja mūthaka.

²⁸ Abisalomu aatūũrĩre mĩaka iĩrĩ Jerusalemu atarĩ oona ūthiũ wa mūthamaki. ²⁹ Ningĩ Abisalomu agĩtūmanĩra Joabu nĩguo amūtũme kūrĩ mūthamaki, no Joabu akĩrega gūthiĩ kūrĩ we. Ningĩ akĩmūtūmanĩra riita rĩa keerĩ, no akĩrega gūthiĩ. ³⁰ Hĩndĩ iyo akĩira ndungata ciake atĩrĩ, “Atĩrĩrĩ, mūgūnda wa Joabu ūhakanĩte na wakwa, na arĩ na cairi kuo. Thiĩ mūmĩcine na mwaki.” Nĩ ūndũ ūcio ndungata cia Abisalomu ikĩgwatia mūgūnda ūcio mwaki ūkĩhĩa.

³¹ Hĩndĩ iyo Joabu agĩthiĩ mūciĩ kwa Abisalomu, akĩmwĩra atĩrĩ, “Nĩ kĩĩ gĩatũma ndungata ciaku icine mūgūnda wakwa?”

³² Nake Abisalomu akĩira Joabu atĩrĩ, “Ndagūtūmanĩire, ngĩkwĩra atĩrĩ, ‘Ūka, nĩguo ngūtũme kwa mūthamaki, ūkamūũrie atĩrĩ, “Nĩ kĩĩ gĩatũmire nyume Geshuru? Ūngĩrĩ ūndũ mwega korwo nĩkuo ndūũraga o na rĩu!” Rĩu-rĩ, nĩngwenda kuona ūthiũ wa mūthamaki, na hangĩkorwo nĩ harĩ na ūndũ njikĩte mūũru, nĩakĩn-jũrage.”

* 14:26 nĩ ta kilo igĩrĩ na robo (2:25)

³³ Nĩ ũndũ ũcio Joabu agĩthiĩ kũrĩ mũthamaki, na akĩmũhe ũhoru ũcio. Hĩndĩ iyo mũthamaki agĩta Abisalomu, nake agĩũka, akĩinamĩrĩra aturumithĩtie ũthiũ thĩ mbere ya mũthamaki. Nake mũthamaki akĩmumunya Abisalomu.

15

Abisalomu Gũciirĩra gwĩka Daudi Ũũru

¹ Na rĩrĩ, thuutha wa maũndũ macio, Abisalomu agĩthondekera ngaari cia ita na mbarathi, na andũ mĩrongo itano a gũthiiga mbere yake mateng’erete. ² Nake ookĩraga rũciinĩ tene akarũgama mũkĩra-inĩ wa njĩra irĩa yathiiaga kĩhingo-inĩ gĩa itũũra rĩrĩa inene. Na rĩrĩa mũndũ o wothe ooka arĩ na mateta ma gũtwarĩra mũthamaki nĩguo atue itua-rĩ, Abisalomu akamwĩta, akamũria atĩrĩ, “Uumĩte itũũra rĩrĩkũ?” Nake akamũ-cookeria atĩrĩ, “Ndungata yaku yumĩte mũhĩrĩga-inĩ ũmwe wa Isiraeli.” ³ Ningĩ Abisalomu akamwĩra atĩrĩ, “Atĩrĩrĩ mateta maku nĩ ma kĩhoo to na nĩ magĩrĩre, no gũtirĩ mũndũ ũthuurĩtwo wa kũrũgamĩrĩra mũthamaki ũngĩgũthikĩrĩra.” ⁴ Ningĩ Abisalomu akamwĩra atĩrĩ, “Naarĩ korwo ndaatuuo mũciiri wa bũrũri ũyũ! Hĩndĩ iyo mũndũ o wothe ũrĩ na mateta kana ciira no ooke kũrĩ nĩ, na nĩ ngatigĩrĩra ciira wake nĩwatuuo na kĩhoo to.”

⁵ Ningĩ hĩndĩ ciothe rĩrĩa mũndũ wothe amũkuhĩrĩra ainamĩrĩre mbere yake, Abisalomu agatambũrũkia guoko, akamũhĩmbĩria na akamũmumunya. ⁶ Abisalomu eka-ga ũguo kũrĩ andũ othe a Isiraeli arĩa mookaga kũrĩ mũthamaki gũcaria kĩhoo to, na nĩ ũndũ ũcio akĩguucĩrĩra ngoro cia andũ a Isiraeli.

⁷ Na rĩrĩ, mĩaka ĩna yathira, Abisalomu akĩra mũthamaki atĩrĩ, “Njĩtikĩria thĩ Hebroni nĩgeetha ngahingie mwĩhĩtwa ũrĩa ndeehĩtire harĩ Jehova.

⁸ Hīndī ĩrĩa ndungata yaku yatũũraga Geshuru kũu Suriata, nĩndehĩtĩre na mwĩhĩtwa ngiuga atĩrĩ, ‘Jehova angĩkanjookia Jerusalemu, nĩngamũhooya ndĩ kũu Hebironi.’”

⁹ Nake mũthamaki akĩmwĩra atĩrĩ, “Thiĩ na thayũ.” Nĩ ũndũ ũcio Abisalomu agĩthiĩ Hebironi.

¹⁰ Hīndī ĩyo Abisalomu agĩtũma andũ na hitho mĩhĩrĩganiĩ yothe ya Isiraeli makoige atĩrĩ, “Rĩrĩa mũrĩigua tũrumbeta twahuhwo, hīndī ĩyo muuge atĩrĩ, ‘Abisalomu nĩwe mũthamaki wa Hebironi.’” ¹¹ Andũ magana meerĩ kuuma Jerusalemu nĩo maathiĩte hamwe na Abisalomu. Meetĩtwo marĩ ageni, na magĩthiĩ matekũmenya nĩ ũũru meekaga, matĩrĩ ũndũ maamenyaga ũhoroinĩ ũcio. ¹² Na hīndī ĩrĩa Abisalomu aarutaga magongonariĩ, agĩtũmanĩra Ahithofeli ũrĩa Mũgiloni,* o ũrĩa waheaga Daudi kĩrĩra, oke kuuma itũũra rĩao rĩa Gilo. Na nĩ ũndũ ũcio ndundu ya gũũkĩrĩra mũthamaki ikĩgĩa na hinya, nao arũmĩrĩri a Abisalomu magĩkĩrĩrĩria kũingĩha.

Daudi Kũũra

¹³ Na rĩrĩ, hagĩũka mũndũ ũmwe watũmĩtwo kũrĩ Daudi, akĩmwĩra atĩrĩ, “Ngoro cia andũ othe a Isiraeli irũmĩrĩire Abisalomu.”

¹⁴ Hīndī ĩyo Daudi akĩra anene ake othe arĩa aarĩ nao Jerusalemu atĩrĩ, “Ūkai! No nginya tũũre; kwaga ũguo gũtirĩ o na ũmwe witũ ũkũhonoka kũũragwo nĩ Abisalomu. No nginya tũthiĩ o ro rĩu, kana Abisalomu oke narua atũkorerere, atũhubanĩrie na atwanange, na ahũũre itũũra rĩrĩ inene na rũhiũ rwa njora.”

¹⁵ Nao anene a mũthamaki makĩmũcookeria atĩrĩ, “Ndungata ciaku nĩciĩhaarĩrie gwĩka ũndũ o wothe ũrĩa mũthamaki mwathi witũ angĩthuura wĩkwo.”

* 15:12 Ahithofeli aarĩ gukawe wa Bathisheba, na aarĩ mũtaarani mũũgĩ.

¹⁶ Nake mūthamaki akiumagara, arūmīrīrwo nĩ andũ a nyūmba yake yothe; no agītiga thuriya ikūmi cia kūmenyerera nyūmba ya mūthamaki. ¹⁷ Nĩ ūndũ ūcio mūthamaki akiumagara, arūmīrīrwo nĩ andũ acio othe, magĩthiĩ handũ haraaya, makīrūgama ho. ¹⁸ Nao andũ ake othe makīmūhītūka, hamwe na Akerethi othe, na Apelethi, na Agiti othe magana matandatũ arĩa maatwaranite hamwe nake kuuma Gathu, makīhītūka magĩthiĩ mbere ya mūthamaki.

¹⁹ Mūthamaki akīūria Itai ūrĩa Mūgiiti atīrī, “Nĩ kīi gīgūtūma ūthiĩ hamwe na ithuĩ? Cooka ūgaikare hamwe na Mūthamaki Abisalomu. Wee ūrī mūdũ wa kūngĩ, mūdũ ūthaamite akoima būrūri wake. ²⁰ Ūrookire o ira. Ingīgwītīkīria atĩa wambīrīrie kūrūūra na ithuĩ, o rīrĩa itaramenya kūrĩa ndīrathiĩ? Hūdũka, woe andũ a būrūri wanyu ūcooke nao. Naguo ūtugi na wīhokeku iroikara hamwe nawe.”

²¹ No Itai agīcookeria mūthamaki atīrī, “Ti-itherũ o ta ūrĩa Jehova atūūruga muoyo, na o ta ūrĩa wee mūthamaki mwathi wakwa ūtūūruga muoyo-rī, harĩa hothe mūthamaki mwathi wakwa angīkorwo arī, o na kūngīkorwo nĩ gūtūūra muoyo kana gūkua, hau no ho ndungata yaku ūgaakorwo īrī.”

²² Nake Daudi akīra Itai atīrī, “Thiĩ na mbere, ūthiĩ ūhītūkīte.” Nĩ ūndũ ūcio Itai ūrĩa Mūgiiti agĩthiĩ ahītūkīte hamwe na andũ ake othe, na andũ a nyūmba yake arĩa maarī hamwe nake.

²³ Nao andũ othe a būrūri ūcio makīrīra na mūgambo mūnene rīrĩa andũ acio othe maahītūkaga. Mūthamaki o nake akīringa mūrīmo ūrĩa ūngĩ wa karūũ ga Kidironi, nao andũ othe magĩthiĩ merekeire werū-inī.

²⁴ Zadoku o nake aarī ho, na Alawii othe arĩa maarī hamwe nake nĩo maakuũite ithandūkũ rĩa kīrīkanīro kĩa Ngai. Nao makīga ithandūkũ rĩa kīrīkanīro kĩa Ngai

thĩ, nake Abiatharu akĩruta magongona nginya rĩrĩa andũ othe maarĩkirie kuuma itũũra rĩu inene.

²⁵ Ningĩ mũthamaki akĩira Zadoku atĩrĩ, “Oya ithandũkũ rĩa Ngai ũrĩcookie itũũra-inĩ rĩu inene. Ingĩtikĩrĩka maitho-inĩ ma Jehova-rĩ, nĩakanjookia na atũme ndĩrĩone na nyone gĩikaro gĩake rĩngĩ. ²⁶ No angĩkiuga atĩrĩ, ‘Niĩ ndikenetio nĩwe,’ hĩndĩ ĩyo niĩ nĩndĩhaarĩire; nĩanjike o ũrĩa wothe angĩona kwagĩrĩre.”

²⁷ Ningĩ mũthamaki akĩira Zadoku ũrĩa mũthĩnjĩri-Ngai atĩrĩ, “Githĩ wee ndũrĩ muoni-maũndũ? Cooka ũthĩ itũũra-inĩ rĩu inene na thayũ, mũrĩ na mũrũguo Ahimaazu, na Jonathani mũriũ wa Abiatharu. Wee na Abiatharu mũthĩ na ariũ acio anyu eerĩ. ²⁸ Na niĩ ngũikara njetereire mariũko-inĩ kũu werũ-inĩ, o nginya hĩndĩ ĩrĩa ũkaandehithĩria ũhoru ũnjĩire ũrĩa maũndũ matarĩ.” ²⁹ Nĩ ũndũ ũcio Zadoku na Abiatharu magĩkuua ithandũkũ rĩa Ngai, makĩrĩcookia Jerusalemu na magĩikara kuo.

³⁰ No Daudi agĩthĩ na mbere kwambata kĩrĩma kĩa mĩtamaiyũ, o akĩrĩraga; nĩehumbĩrĩte mũtwe, na aarĩ magũrũ matheri.† Andũ othe arĩa aarĩ nao-rĩ, o nao nĩmehumbĩrĩte mũtwe, nao maambatire o makĩrĩraga.

³¹ Na rĩrĩ, Daudi nĩamenyithĩtio atĩrĩ, “Ahithofeli aarĩ hamwe na arĩa maarĩ ndundu na Abisalomu.” Nĩ ũndũ ũcio Daudi akĩhooya atĩrĩ, “Wee Jehova, garũra kĩrĩra kĩa Ahithofeli, ũgĩtue ũrimũ.”

³² Na rĩrĩa Daudi aakinyire gacũmbĩrĩ ga kĩrĩma, harĩa andũ maahooyagĩra Ngai-rĩ, Hushai ũrĩa Mũariki aarĩ hau kũmũtũnga, atembũrangĩte nguo yake ndaaya, na akeitĩrĩria tĩiri mũtwe. ³³ Nake Daudi akĩmwĩra atĩrĩ, “Ũngĩkorwo nĩũgũthĩ na niĩ, ũgũtuĩka mũrigo harĩ niĩ.

† 15:30 Kwĩhumbĩra mũtwe na gũthĩ magũrũ matheri warĩ ũndũ wa kuonania kĩa na gũcakaya.

³⁴ No ũngĩcooka itũūra-inĩ rĩu inene na wĩre Abisalomu atĩrĩ, ‘Nĩngũtuũka ndungata yaku wee mũthamaki; ndĩratũire ndĩ ndungata ya thoguo mbere iyo, no rĩu ngũtuũka ndungata yaku,’ hĩndĩ iyo no ũndeithie gũthũkia mataaro ma Ahithofeli. ³⁵ Githĩ Zadoku na Abiatharu arĩa athĩnjĩri-Ngai matiigũkorwo kũu hamwe nawe? Meerage ũndũ o wothe ũngĩgua nyũmba-inĩ ya mũthamaki. ³⁶ Ariũ ao eerĩ, Ahimaazu mũrũ wa Zadoku, na Jonathani mũrũ wa Abiatharu marĩ kũu hamwe nao. Matũmage kũrĩ nĩ na ũndũ o wothe ũngĩgua.”

³⁷ Nĩ ũndũ ũcio Hushai mũrata wa Daudi agĩcooka, na agĩkinya Jerusalemu o rĩrĩa Abisalomu aatoonyaga itũūra rĩu inene.

16

Daudi na Ziba

¹ Na rĩrĩ, Daudi aakorirwo ahĩtũkĩte gacũmbĩrĩ ga kĩrĩma o hanini-rĩ, agĩkora Ziba, ndungata ya Mefiboshethu, ĩmwetereire ĩmũtũnge. Aarĩ na ndigiri igĩrĩ ciatandikĩtwo na igakuua mĩgate magana meerĩ na iman-jĩka cia thabibũ nyũmũ igana rĩmwe, na ikũmba igana cia ngũyũ, o na mondo ya ndibei.

² Nake mũthamaki akĩũria Ziba atĩrĩ, “Nĩ kĩ gĩtũmĩte ũrehe indo ici?”

Nake Ziba agĩcookia atĩrĩ, “Ndigiri nĩ cia gũkuua andũ a nyũmba ya mũthamaki, nayo mĩgate na matunda nĩ cia kũrĩno nĩ andũ, nayo ndibei nĩyakũnyuuo nĩ arĩa mangĩrwo nĩ hinya gũkũ werũ-inĩ.”

³ Mũthamaki agĩcooka akĩmũũria atĩrĩ, “Arĩ ha mũrũ wa mũriũ wa mwathi waku?”

Nake Ziba akiuga atĩrĩ, “Aikarĩte Jerusalemu, tondũ areciiria atĩrĩ, ‘Ũmũthĩ nyũmba ya Isiraeli nĩkũnjookeria ũthamaki wa guka.’”

⁴ Ningĩ mūthamaki akĩira Ziba atĩrĩ, “Indo ciothe iria iraarĩ cia Mefiboshethu kuuma rĩu nĩ ciaku.”

Nake Ziba akiuga atĩrĩ, “Nĩndakwĩnyiihĩria; reke njĩtikĩrike maitho-inĩ maku, wee mūthamaki, mwathi wakwa.”

Shimei Kūruma Daudi

⁵ Mūthamaki Daudi aakuhĩrĩa Bahurimu-rĩ, mūndũ wa mūhĩrĩga wa nyũmba ya Saũlũ agĩũka oimĩte kuo. Nake eetagwo Shimei mūrũ wa Gera; agĩũka akĩrumanaga.

⁶ Agĩkĩria Daudi na anene othe a mūthamaki mahiga, o na gũtuũka mbũtũ ciothe cia ita na arangĩri maarĩ mwena wa Daudi wa ũrĩo na wa ũmotho. ⁷ Shimei akĩrumana, akiuga atĩrĩ, “Thiĩ na kũu, thiĩ na kũu, wee mūiti wa thakame, wee kĩmaramari gĩkĩ! ⁸ Jehova nĩakũrĩhĩtie, thakame yothe ĩrĩa wanaita ya nyũmba ya Saũlũ, ũrĩa wathanaga ithenya rĩake. Jehova nĩaneanĩte ũthamaki kũrĩ mūrũguo Abisalomu. Wee nĩũkinyĩrĩirwo nĩ mwanangĩko tondũ ũrĩ mūiti wa thakame!”

⁹ Hĩndĩ iyo Abishai mūrũ wa Zeruia akĩũria mūthamaki atĩrĩ, “Nĩ kĩĩ kĩratũma ngui ĩno nguũ* ĩrume mūthamaki mwathi wakwa? Reke ninge mūrĩmo ndĩmũtinie mūtwe.”

¹⁰ No mūthamaki akiuga atĩrĩ, “Tũnyiiitanĩire ũndũ ũrĩkũ nĩ na inyuĩ, inyuĩ ariũ a Zeruia? Angĩkorwo ararumana tondũ Jehova nĩamwĩrite atĩrĩ, ‘Ruma Daudi,’ nũũ ũngĩmũũria atĩrĩ, ‘Ūgwĩka ũguo nĩkĩ?’”

¹¹ Ningĩ Daudi akĩira Abishai na anene ake othe atĩrĩ, “Mūrũ wakwa, ũrĩa uumĩte mūthiimo-inĩ wakwa, nĩwe ũraageria kũnduta muoyo. Githĩ Mũbenjamini ũyũ ndan-gĩgĩka makĩria ma ũguo! Tiganai nake; rekei arumane, tondũ Jehova nĩwe ũmwĩrite eke ũguo. ¹² Hihi no gũkorwo Jehova nĩekuona thĩĩna wakwa, na nĩakandĩha na wega nĩ ũndũ wa irumi ici ndĩrarumwo ũmũthĩ.”

* 16:9 Gwĩta mūndũ ngui nguũ warĩ ũndũ wa kũnyarara mūndũ biũ.

¹³ Nĩ ũndũ ũcio Daudi na andũ ake magĩthĩ na mbere magereire njĩra nake Shimei akagera mwena-inĩ wa kĩrĩma ang'ethanĩire nao, agĩthĩ akĩrumanaga, na akĩmũikagĩria mahiga, na akamũminjagĩria tĩiri. ¹⁴ Nake mũthamaki na andũ othe arĩa maarĩ nake magĩkina kũria maathiiaga manogeete. Na kũu nĩkuo Daudi aahurũkiire, akĩnogoka.

Ūtaaro wa Hushai na wa Ahithofeli

¹⁵ Hĩndĩ ĩyo Abisalomu na andũ othe a Isiraeli magĩũka Jerusalemu, na Ahithofeli agĩkorwo hamwe nao. ¹⁶ Hĩndĩ ĩyo Hushai ũria Mũariki, mũrata wa Daudi, agĩthĩ kũri Abisalomu, akĩmwĩra atĩri, “Mũthamaki arotũura nginya tene! Mũthamaki arotũura nginya tene!”

¹⁷ Abisalomu akĩũria Hushai atĩri, “Ūyũ nĩguo wendo ũria wonetie mũrata waku? Nĩ kĩ kĩragiririe ũthĩ na mũrata waku?”

¹⁸ Nake Hushai akĩra Abisalomu atĩri, “Aca, ũria ũthuurĩtwo nĩ Jehova, na agathuurwo nĩ andũ aya, na agathuurwo nĩ andũ othe a Isiraeli, nĩ ndĩ wake, na njikare nake. ¹⁹ Ningĩ-rĩ, njagĩrĩrwo nĩgũtungatĩra ũũ? Githĩ ndi-agĩrĩrwo nĩ gũtungatĩra mũriũ? O ta ũria ndaatungatĩire thoguo, noguo ngũgũtuungatĩra.”

²⁰ Abisalomu akĩra Ahithofeli atĩri, “Tũhe ũtaaro waku. Twagĩrĩrwo nĩ gwĩka atĩa?”

²¹ Ahithofeli agĩcookia atĩri, “Koma na thuriya cia thoguo iria aatigire nĩgeetha irorage gĩikaro kĩa mũthamaki. Hĩndĩ ĩyo andũ othe a Isiraeli nĩmakaigua atĩ wee wĩmũthũũre biũ nĩ thoguo, namo moko ma andũ arĩa othe ũrĩ nao nĩmekũgĩa hinya.” ²² Nĩ ũndũ ũcio makĩambĩra Abisalomu hema nyũmba igũrũ, nake agĩkoma na thuriya cia ithe mbere ya andũ othe a Isiraeli.

²³ No rĩrĩ, matukũ-inĩ macio mataaro marĩa Ahithofeli aaheanaga maahaanaga ta ma mũndũ ũhooete kĩrĩa kũri

Ngai. Ūguo nĩguo Daudi na Abisalomu mooyaga mataaro mothe ma Ahithofeli.

17

¹ Ahithofeli akĩira Abisalomu atĩrĩ, “Reke thuure andũ ngiri ikũmi na igĩrĩ nĩguo tũthiĩ ūtukũ o ro ūyũ tũgakinyĩre Daudi. ² Na ndĩmũtharĩkĩre o ro rĩu arĩ mũnogu na atarĩ na hinya. Ndĩmũmakie, na andũ arĩa othe arĩa marĩ hamwe nake moore. Njũrage o mũthamaki we wiki, ³ na hũndũre andũ othe macooke kũrĩ we. Gĩkuũ kĩa mũndũ ūcio ūracaria gĩgũcookia andũ othe harĩwe; gũtirĩ mũndũ ūkũgurara.” ⁴ Narĩo ithugunda rĩu rĩkĩoneka rĩrĩ rĩega nĩ Abisalomu na athuuri othe a Isiraeli.

⁵ No Abisalomu akiuga atĩrĩ, “Tũmanĩrai Hushai ũrĩa Mũariki o nake, nĩguo tũigwe ũrĩa ekuuga.” ⁶ Na rĩrĩa Hushai ookire, Abisalomu akĩmwĩra atĩrĩ, “Ahithofeli nĩaheanĩte mataaro maya. Nĩ wega twĩke ūguo aroiga? Angĩkorwo ti ūguo-rĩ, tũhe woni waku.”

⁷ Hushai agĩcookeria Abisalomu atĩrĩ, “Itaaro rĩrĩa Ahithofeli aheanĩte ti rĩega ihinda-inĩ rĩrĩ. ⁸ Wee nĩũũ thoguo na andũ ake; nĩ andũ njamba, na nĩ njamba ta nduba itunyĩtwo mwana wayo. Ningĩ thoguo arĩ na ũmenyo wa mbaara; ndarĩ hĩndĩ angĩraarania na mbũtũ cia ita. ⁹ O na rĩu ahithĩtwo ngurunga kana akahithwo handũ hangĩ. Angĩtharĩkĩra mbũtũ ciaku cia ita mbere-rĩ, ũrĩa wothe ūkaigua ũhoru ūcio akoiga atĩrĩ, ‘Mbũtũ cia ita cia Abisalomu nĩciũragĩtwo.’ ¹⁰ Hĩndĩ ĩyo o na mũthigari ũrĩa njamba, ũrĩa ngoro yake ĩhaana ta ngoro ya mũrũũthi-rĩ, nĩakarĩngĩka nĩ guoya, tondũ Isiraeli othe nĩmooĩ atĩ, thoguo nĩ njamba ya ita na atĩ andũ arĩa marĩ nake nĩ njamba.

¹¹ “Nĩ ũndũ ūcio ngũgũtaara atĩrĩ: Reke andũ othe a Isiraeli kuuma Dani nginya Birishiba, acio aingĩ mũno

ta mūthanga wa hūgūrūrū cia iria, moonganio othe ma-cookanĩrĩre harĩwe, na wee mwene ūmatongorie magĩthĩi ita-inĩ. ¹² Hĩndĩ ĩyo nĩtũkaamũtharĩkĩra harĩa hothe tũngĩ-muona, tũmũmbĩrĩre o ta ūrĩa ime rĩgũaga thĩ. Nĩgũkorwo we mwene o na kana mũndũ o na ūmwe wake gũtirĩ ũgaatigara muoyo. ¹³ O na ningĩ angĩgatoonya itũūra inene, andũ othe a Isiraeli makaarehe mĩhĩndo itũūra-inĩ rĩu, tũrikururie tũritware gĩtuamba-inĩ, o nginya kwage gacunjĩ karĩo kangĩoneka.”

¹⁴ Nake Abisalomu na andũ othe a Isiraeli makiuga atĩrĩ, “Ūtaaro wa Hushai ūrĩa Mũariki nĩ mwega gũkĩra wa Ahithofeli.” Nĩgũkorwo Jehova nĩatuĩte atĩ nĩegũthũkia ūtaarani ūcio mwega wa Ahithofeli nĩgeetha arehithĩrie Abisalomu mwanangĩko.

¹⁵ Hushai akĩra Zadoku na Abiatharu, acio athĩnjĩri-Ngai, atĩrĩ, “Ahithofeli nĩataarĩte Abisalomu na athuuri a Isiraeli meeke ũna na ũna, no niĩ ndĩmataarĩte meke ũna na ũna. ¹⁶ Rĩu tũmana kũrĩ Daudi narua, ūmwĩre atĩrĩ, ‘Ūtukũ ũyũ menya ndũkaraare mariũko-inĩ kũu werũ-inĩ; ringa mũrĩmo na ndũkaage gwĩka ũguo, kwaga ũguo mũthamaki na arĩa othe arĩ nao nĩmekũniinwo.’”

¹⁷ Jonathani na Ahimaazu maikaraga Eni-Rogeli. Nayo ndungata ya mũirĩtu nĩyo yarĩ ĩthĩi ĩkamahe ũhoru ūcio, nao mathĩi makeere Mũthamaki Daudi, tondũ mat-ingĩetĩkĩrĩre kuonwo magĩtoonya itũūra-inĩ rĩu inene. ¹⁸ No kamwana kanini nĩkamonire na gakiĩra Abisalomu. Nĩ ūndũ ūcio andũ acio eerĩ makiumagara na ihenya magĩtoonya nyũmba ya mũndũ kũu Bahurimu. Nake aarĩ na gĩthima hau nja ya mũciĩ wake, nao makĩharũrũka thĩinĩ wakĩo. ¹⁹ Nake mũtumia wa mũndũ ūcio akĩoya kĩndũ gĩa kũhumbĩra, agĩgĩtambũrũkia igũrũ rĩa mũromo wa gĩthima, na akĩanĩka ngano igũrũ rĩakĩo. Na gũtirĩ mũndũ o na ūmwe wamenyire ũhoru ūcio.

²⁰ Na rĩrĩa andũ a Abisalomu mookire kũrĩ mĩtumia ũcio kũu nyũmba gwake-rĩ, makĩmũũria atĩrĩ, “Ahimaazu na Jonathani marĩ ha?”

Nake mĩtumia ũcio akĩmacookeria atĩrĩ, “Maringire mũrĩmo ũũrĩa wa karũũĩ.” Nao andũ acio makĩmacaria no mationire mũndũ; nĩ ũndũ ũcio magĩcooka Jerusalemu.

²¹ Thuutha wa andũ acio gũthiĩ, Jonathani na Ahi-maazu makiuma gĩthima-inĩ, na magĩtwarĩra Mũthamaki Daudi ũhoro ũcio. Makĩmwĩra atĩrĩ, “Wĩhaarĩrie ũringe rũũĩ o narua, Ahithofeli nĩ ataaranĩte ũna na ũna wa gũgũũkirĩra.” ²² Nĩ ũndũ ũcio Daudi na andũ othe arĩa maarĩ nake magĩũkĩra na makĩringa Rũũĩ rwa Jorodani. Na gũgĩkĩa gũtirĩ mũndũ ũtaaringĩte Rũũĩ rwa Jorodani.

²³ Na rĩrĩa Ahithofeli onire atĩ mataaro make matiinarũmĩrĩrwo-rĩ, agĩtandĩka ndigiri yake, akĩinũka gwake mũciĩ itũũra-inĩ rĩake. Agĩthondeka maũndũ make, agĩcooka akĩĩita. Nĩ ũndũ ũcio agĩkua na agĩthikwo mbĩrĩra-inĩ ya ithe.

²⁴ Daudi agĩthiĩ Mahanaimu, nake Abisalomu akĩringa Rũũĩ rwa Jorodani hamwe na andũ othe a Isiraeli.

²⁵ Abisalomu nĩathuurĩte Amasa atuĩke mũnene wa mbũtũ cia ita ithenya rĩa Joabu. Amasa aarĩ mũriũ wa mũndũ wetagwo Jetheri, Mũisiraeli ũrĩa wahikĩtie Abigaili, mwarĩ wa Nahashu, mwarĩ wa nyina na Zeruia nyina wa Joabu.

²⁶ Andũ a Isiraeli na Abisalomu maambĩte hema ciao bũrũri-inĩ wa Gileadi.

²⁷ Na rĩrĩa Daudi aakinyire Mahanaimu, Shobi mũrũ wa Nahashu wa kuuma Raba kwa Aamoni, na Makiri mũrũ wa Amieli kuuma Lo-Debari, na Barizilai ũrĩa Mũgileadi kuuma Rogelimu ²⁸ makĩrehe indo cia gũkomera, na mbakũri, na indo cia rĩũmba. Ningĩ makĩrehe ngano na cairi, na mĩtu na ngano hĩhie, na mboco na ndengũ, ²⁹ na ũũkĩ na ngorono, na ng'onde na maguta mamata ma iria rĩa ng'ombe, nĩgeetha Daudi na andũ ake marĩe.

Tondū moigire atĩrĩ, “Andũ aya nĩahũũtu, na makanoga, na makanyootera gũkũ werũ-inĩ.”

18

Gikuũ kĩa Abisalomu

¹ Na rĩrĩ, Daudi akĩũngania andũ arĩa maarĩ nake, na agĩthuura anene a gwatha thigari ngiri ngiri na a gwatha thigari igana igana. ² Daudi agĩtũma mbũtũ icio cia ita ithiĩ ikarũe, gĩcunjĩ gĩa ithatũ gĩathagwo nĩ Joabu, na gĩcunjĩ gĩa ithatũ gĩathagwo nĩ Abishai mũrũ wa nyina na Joabu, mũrũ wa Zeruia, na gĩcunjĩ kĩngĩ gĩa ithatũ gĩgaathwo nĩ Itai ũrĩa Mũgiiti. Nake mũthamaki akĩra mbũtũ icio cia ita atĩrĩ, “Ti-itherũ nĩ mwene nĩngumagarania na inyuĩ.”

³ No andũ acio makĩmwĩra atĩrĩ, “Wee ndũgũthiĩ; tũngĩ-gaakĩrio hinya tũũre-rĩ, matĩngĩrũmbũiya ũhoro witũ. O na nuthu iitũ ĩngĩkua-rĩ, matĩngĩrũmbũiya ũhoro ũcio; no wee ũrĩ bata gũkĩra andũ ngiri ikũmi aitũ. Rĩu nĩ kaba ũtũteithĩrĩrie ũrĩ gũkũ itũũra-inĩ rĩrĩ inene.”

⁴ Nake mũthamaki agĩcookia atĩrĩ, “Niĩ ngwĩka ũrĩa wotho mũkuona kwagĩrĩire.”

Nĩ ũndũ ũcio mũthamaki akĩrũgama kĩhingo-inĩ rĩrĩa andũ acio othe moimagaraga marĩ ikundi cia andũ igana igana, na cia ngiri ngiri. ⁵ Mũthamaki agĩatha Joabu, na Abishai, na Itai, akĩmeera atĩrĩ, “Menyererai mwanake ũcio ũgwĩtwo Abisalomu nĩ ũndũ wakwa.” Nacio mbũtũ ciothe cia ita nĩciaiguire mũthamaki akĩheana watho nĩ ũndũ wa Abisalomu kũrĩ o ũmwe wa anene a mbũtũ cia ita.

⁶ Mbũtũ icio cia ita ikĩerekera werũ-inĩ ikarũe na Isiraeli, nayo mbaara ikĩrũrwo mũtitũ-inĩ wa Efiraimu. ⁷ Kũu nĩkuo mbũtũ cia ita cia Isiraeli ciatooreirio nĩ andũ a Daudi. Nao arĩa maakuire mũthenya ũcio maarĩ

aingĩ mũno, maarĩ andũ ngiri mĩrongo ĩĩrĩ. ⁸ Mbaara ikĩhurunjũka bũrũri wothe, naguo mũtitũ ũkĩniina andũ aingĩ mũthenya ũcio gũkĩra arĩa maaniinirwo nĩ rūhiũ rwa njora.

⁹ Nake Abisalomu agĩcemia na andũ a Daudi. Nake aahaicite nyũmbũ yake, na rĩrĩa nyũmbũ yathiiagĩra rungu rwa hongwe ndumanu cia mũgandi mũnene, mũtwe wa Abisalomu ũkĩhata mũtĩ-inĩ. Nake agĩtigwo acunjuurĩte rĩera-inĩ, nayo nyũmbũ ĩrĩa aahaicite igĩthĩ o na mbere.

¹⁰ Hĩndĩ ĩrĩa mũndũ ũmwe wao onire ũguo, akĩra Joabu atĩrĩ, “Nĩndona Abisalomu acunjuurĩte mũtĩ-inĩ wa mũgandi.”

¹¹ Joabu akĩra mũndũ ũrĩa wamwĩre ũguo atĩrĩ, “Atĩ kĩĩ! Nĩwamuona? Nĩ kĩĩ kĩagiria ũmũgũthe agwe thĩ o ro hau? Nĩngĩakũhe cekeri ikũmi cia betha,* na mũcibi wa mũndũ njamba.”

¹² No mũndũ ũcio agĩcookia atĩrĩ, “O na ingĩthimĩrwo cekeri ngiri ĩmwe† njĩkĩrĩrwo guoko, ndingĩtambũrũkĩria mũrũ wa mũthamaki guoko ndĩmwĩke ũũru. Mũthamaki aagwathire wee, na Abishai, na Itai tũkĩiguaga, akĩmwĩra atĩrĩ, ‘Menyererai mwanake ũcio ũgũtĩwo Abisalomu nĩ ũndũ wakwa.’ ¹³ Na ingĩtwarĩrĩrie muoyo wakwa thĩna-inĩ, na tondũ gũtirĩ ũndũ ũhithagwo mũthamaki, no wĩherie ũndiganĩrie.”

¹⁴ Joabu akiuga atĩrĩ, “Nĩ ndigũte mahinda nĩ ũndũ waku.” Nĩ ũndũ ũcio akĩoya matimũ matatũ, agĩthĩ, akĩmũtheeca namo ngoro Abisalomu arĩ o muoyo hau mũtĩ-inĩ wa mũgandi-inĩ ũcio. ¹⁵ Nao andũ ikũmi arĩa maakuuagĩra Joabu indo cia mbaara makĩrigiicĩria Abisalomu, makĩmũhũũra, makĩmũũraga.

* 18:11 nĩ ta giramu 110 † 18:12 nĩ ta kilo 11

¹⁶ Hīndī ĩyo Joabu akīhuha karumbeta, nacio mbūtū cia ita igītiga gūteng’eria andū a Isiraeli, tondū Joabu nācirūgamirie. ¹⁷ Nao makīoya Abisalomu, makīmūikia irima inene kūu mūtītū, na makīūmba hība nene ya mahiga igūrū rīake. Hīndī ĩyo andū othe a Isiraeli makīūrīra kwao mīciī.

¹⁸ Hīndī ĩrīa aarī muoyo, Abisalomu nīeyakīire gītugī agīkīhaanda Gītuamba-inī kīa Mūthamaki kīrī gīa kīrīrikano gīake, tondū eeciirītie atīrī, “Nī ndirī na kahīi kangītūūrīa rīitwa rīakwa.” Agīita gītugī kīu rīitwa rīake, nakīo gīttagwo Gītugī kīa Abisalomu nginya ūmūthī.

Daudi Gūcakaya

¹⁹ Na rīrī, Ahimaazu mūrū wa Zadoku akiuga atīrī, “Reke hanyūke ngatwarīre mūthamaki ūhorō atī Jehova nīamūhonoketie kuuma guoko-inī gwa thū ciake.”

²⁰ Joabu akīmwīra atīrī, “Wee tiwe wagīrīirwo nī gūtwarā ūhorō ūcio ūmūthī. Reke ūgaatwara ūhorō ihinda rīngī, no ndūgwīka ūguo ūmūthī, tondū mūrū wa mūthamaki nīakuīte.”

²¹ Hīndī ĩyo Joabu akīira Mūkushi ūmwe atīrī, “Thīi ūkeere mūthamaki ūrīa wonete.” Mūkushi ūcio akīnamīrīra mbere ya Joabu na akīhanyūka agīthīi.

²² Ahimaazu mūrū wa Zadoku akīira Joabu rīngī atīrī, “O ūrīa kūrītuīka, reke nūmīrīre Mūkushi ūcio.”

No Joabu agīcookīa atīrī, “Mūrū wakwa, ūkwenda gūthīi nīkī? Wee ndūrī na ūhorō ūrīa ūngīheerwo kīheo.”

²³ Nake akiuga atīrī, “O ūrīa kūrītuīka, nīngwenda kūhanyūka.”

Nī ūndū ūcio Joabu akiuga atīrī, “Kīhanyūke!” Hīndī ĩyo Ahimaazu akīhanyūka agereire werū-inī, akīhītūka Mūkushi.

²⁴ Daudi aaikairīte thī gatagatī ga kīhingo kīa na thīinī na kīa nja-rī, mūrangīri agīthīi kīhingo-igūrū

agereire rūthingo-inĩ. Na rĩrĩa aacũthĩrĩrie nja, akĩona mũndũ ahanyũkĩte arĩ o wiki. ²⁵ Nake mũrangĩri agĩta mũthamaki na akĩmũmenyithia ũhoru ũcio.

Nake mũthamaki akiuga atĩrĩ, “Akorwo arĩ wiki, akĩrĩ na ũhoru mwega.” Nake mũndũ ũcio agĩkuhĩrĩria o gũkuhĩrĩria.

²⁶ Ningĩ mũrangĩri akĩona mũndũ ũngĩ ahanyũkĩte, agĩta mũrangĩri wa kĩhingo, akĩmwĩra atĩrĩ, “Atĩrĩrĩ, mũndũ ũngĩ ahanyũkĩte arĩ o wiki!”

Nake mũthamaki akiuga atĩrĩ, “No nginya o nake akorwo ararehe ũhoru mwega.”

²⁷ Mũrangĩri akiuga atĩrĩ, “Ndĩrona mũndũ ũcio wa mbere akĩhanyũka ta Ahimaazu mũrũ wa Zadoku.”

Mũthamaki akiuga atĩrĩ, “Ūcio nĩ mũndũ mwega, arooka arĩ na ũhoru mwega.”

²⁸ Ningĩ Ahimaazu agĩta mũthamaki, akĩmwĩra atĩrĩ, “Gũtirĩ na ũũru!” Akĩnamĩrĩra mbere ya mũthamaki aturumithĩtie ũthiũ thĩ, akiuga atĩrĩ, “Jehova Ngai waku arogocwo! Nĩaneanĩte andũ arĩa maatambũrũkĩtie moko mookĩrĩre mũthamaki mwathi wakwa.”

²⁹ Nake mũthamaki akĩũria atĩrĩ, “Mwanake ũcio ti Abisalomu arĩ o thayũ?”

Nake Ahimaazu agĩcookia atĩrĩ, “Nĩnyonire kĩrigicano kĩnene rĩrĩa Joabu ekwendaga gũtũma ndungata ya mũthamaki o na niĩ, ndungata yaku, no ndinamenya kiuma gĩa kĩa.”

³⁰ Nake mũthamaki akiuga atĩrĩ, “Rũgama haha mwena-inĩ weterere.” Nĩ ũndũ ũcio agĩthiĩ mwena-inĩ, akĩrũgama ho.

³¹ Hĩndĩ ĩyo Mũkushi agĩkinya, akiuga atĩrĩ, “Mũthamaki mwathi wakwa, ta igua ũhoru ũyũ mwega! Jehova nĩakũhonoketie ũmũthĩ kuuma kũrĩ arĩa maragũũkĩrĩre.”

³² Mūthamaki akĩũria Mūkushi atĩrĩ, “Mwanake ũrĩa ti Abisalomu arĩ o thayũ?”

Mūkushi akĩmũcookeria atĩrĩ, “Thũ ciothe cia mūthamaki mwathi wakwa, na andũ arĩa othe mangĩũkĩra makũgere ngero marotũika ta mwanake ũcio.”

³³ Mūthamaki akiinaina. Akĩhaica, agĩthĩ nyũmba ya igũrũ ya kĩhingo-inĩ, akĩrĩra. Agĩthĩ akiugaga atĩrĩ, “Ũũ mũrũ wakwa Abisalomu! Mũrũ wakwa, mũrũ wakwa Abisalomu! Naarĩ korwo nĩ nĩ ndĩrakuire handũ haku, ũũ mũrũ wakwa, mũrũ wakwa!”

19

¹ Nake Joabu akĩrwo atĩrĩ, “Mūthamaki nĩrarĩra agĩcakayagĩra Abisalomu.” ² Naguo ũhootani wa mūthenya ũcio wa mbũtũ cia ita ciothe ũkĩgarũrũka, ũgĩtuĩka macakaya, tondũ mūthenya ũcio mbũtũ cia ita nĩci-aiguire gũkĩrwo atĩrĩ, “Mūthamaki arĩ na kĩa nĩ ũndũ wa mũriũ.” ³ Mūthenya ũcio andũ magĩcooka itũũra-inĩ inene na hito, o ta ũrĩa andũ macookaga na hito maconokete rĩrĩa moorĩte kuuma mbaara-inĩ. ⁴ Nake mūthamaki akĩhumbĩra ũthiũ, akĩrĩra na mũgambo mũnene akiugaga atĩrĩ, “Ũũ Abisalomu, mũrũ wakwa! Ũũ Abisalomu, mũrũ wakwa, mũrũ wakwa!”

⁵ Hĩndĩ iyo Joabu agĩtoonya nyũmba kũrĩ mūthamaki, akĩmwĩra atĩrĩ, “Ũmũthĩ nĩũconorithĩtie andũ aku othe, arĩa marĩkĩtie kũhonokia muoyo waku, na mĩoyo ya ariũ aku na ya airĩtu aku, na mĩoyo ya atumia aku o na ya thuriya ciaku. ⁶ Wee wendete arĩa magũthũire, na ũkamenā arĩa makwendete. Ũmũthĩ nĩwonanĩtie biũ atĩ ndũrĩ bata na anene a mbũtũ cia ita o na andũ ao. Nĩ nguona atĩ wee gĩkeno gĩaku kĩngĩrĩ rĩrĩa Abisalomu angĩrĩ muoyo ũmũthĩ na ithuothe tũkorwo tũkuĩte. ⁷ Rĩu ũkĩra ũthĩ ũkoomĩrĩrie andũ aku ũmekĩre hinya. Nĩ ngwĩhĩta na rĩtwa rĩa Jehova atĩ aakorwo ndũkuuma

ũthiĩ gũtanatuka, gũtirĩ mũndũ o na ũmwe ũgũkorwo mwena waku. Ũndũ ũyũ ũgũtuĩka mũũru kũrĩ we gũkĩra maũndũ mothe mooru marĩa managũkora kuuma ũrĩ mũnini nginya rĩu.”

⁸ Nĩ ũndũ ũcio mũthamaki agĩũkĩra, agĩkarĩra gĩtĩ gĩake kĩhingo-inĩ. Hĩndĩ ĩrĩa andũ meerirwo atĩrĩ, “Mũthamaki aikarĩte kĩhingo-inĩ,” othe magĩũka mbere yake.

Daudi Gũcooka Jerusalemu

Na rĩrĩ, andũ a Isiraeli nĩmoorĩte magacooka kwao mĩciĩ. ⁹ Mĩhĩrĩga-inĩ yothe ya Isiraeli, andũ othe maakararanagia makoiga atĩrĩ, “Mũthamaki nĩwe watũkũũrĩre kuuma guoko-inĩ gwa thũ ciitũ; nĩwe watũhonokirie kuuma guoko-inĩ kwa Afilisti. No rĩu nĩorĩte akoima bũrũri-inĩ akĩũrĩra Abisalomu; ¹⁰ nake Abisalomu ũrĩa twaitĩrĩrie maguta atũthamakĩre-rĩ, nĩakuĩrĩre mbaara-inĩ. Nĩ ũndũ ũcio mwaĩte kwaria ũhoru wa gũcookia mũthamaki nĩkĩ?”

¹¹ Mũthamaki Daudi nĩatũmanire kũrĩ Zadoku na Abi-atharu, athĩnjĩri-Ngai, makeerwo atĩrĩ, “Ūriai athuuri a Juda atĩrĩ, ‘Nĩ kĩĩ gĩgũtũma mũrigie thuutha harĩ gũcookia mũthamaki nyũmba-inĩ yake ya ũthamaki, kuona atĩ ũrĩa kũraario Isiraeli guothe nĩgũkinyĩire mũthamaki kũrĩa aikaraga? ¹² Inyuĩ mũrĩ ariũ a baba, tũrĩ a mũthiimo ũmwe, na thakame ĩmwe. Nĩ kĩĩ kĩngĩtũma mũtuĩke a kũrigia thuutha kũinũkia mũthamaki?’ ¹³ Ningĩ mwĩre Amasa atĩrĩ, ‘Githĩ wee ndũrĩ wa mũthiimo wakwa, na thakame yakwa? Ngai arothũũra o na anjĩke ũũru makĩria, angĩkorwo kuuma rĩu gũthiĩ na mbere wee tiwe ũgũtuĩka mũnene wa mbũtũ ciakwa cia ita ithenya rĩa Joabu.’”

¹⁴ Nake mũthamaki akĩguucĩrĩria ngoro cia andũ othe a Juda ta ciarĩ ngoro ya mũndũ ũmwe. Nao magĩtũmana kũrĩ mũthamaki, makiuga atĩrĩ, “Cooka, wee hamwe na

andū aku othe.” ¹⁵ Hīndī ĩyo mūthamaki agĩcooka agĩthĩ agĩkinya Jorodani.

Na rĩrĩ, andū a Juda nĩmookĩte Giligali nĩguo matũnge mūthamaki mamũringie Rũũ rwa Jorodani. ¹⁶ Nake Shimei mūrũ wa Gera, Mūbenjamini kuuma Bahurimu, agĩkūrũka na ihenya marĩ na andū a Juda nĩguo magatũnge Mūthamaki Daudi. ¹⁷ Nake aarĩ na andū a Benjamini ngiri ĩmwe, o hamwe na Ziba ndungata ya mũcĩi wa Saũlũ, na ariũ ake ikũmi na atano, na ndungata mĩrongo ĩrĩ. Nao makĩhanyũka nginya Rũũ rwa Jorodani harĩa mūthamaki aarĩ. ¹⁸ Makĩringĩra iriũko-inĩ nĩguo maringie andū a nyũmba ya mūthamaki na meeke o ũrĩa angĩenda.

Hīndī ĩrĩa Shimei mūrũ wa Gera aaringire Rũũ rwa Jorodani akĩgũithia thĩ mbere ya mūthamaki, ¹⁹ na akĩmwĩra atĩrĩ, “Mwathi wakwa nĩ atige kũndua mwĩhia. Tiga kũririkana ũrĩa ndungata yaku yekire mahĩtia mūthenya ũrĩa mūthamaki mwathi wakwa oimire Jerusalemu. Mūthamaki nĩatige kũiga ũhoru ũcio meciiria-inĩ make. ²⁰ Nĩgũkorwo nĩ ndungata yaku nĩnjũũ atĩ nĩnjĩhĩtie, no ũmũthĩ nĩndoka haha ndĩ mũndũ wa mbere wa nyũmba yothe ya andū a Jusufu; ndaikūrũka njũke ndũnge mūthamaki mwathi wakwa.”

²¹ Ningĩ Abishai mūrũ wa Zeruia akiuga atĩrĩ, “Githĩ Shimei ndagĩrĩire nĩ kũũragwo nĩ ũndũ wa ũrĩa ekĩte? Nĩarumire mũitĩrĩre maguta wa Jehova.”

²² Nake Daudi agĩcookia atĩrĩ, “Tũnyiitaniire ũndũ ũrĩkũ na inyuĩ, inyuĩ ariũ a Zeruia? ũmũthĩ nĩguo mũgũtuĩka thũ ciakwa! No kũhoteke mũndũ o na ũrĩkũ ooragwo thĩnĩ wa Isiraeli ũmũthĩ? Githĩ nĩ ndikĩũĩ atĩ ũmũthĩ nĩ nĩ mūthamaki wa Isiraeli?” ²³ Nĩ ũndũ ũcio mūthamaki akĩra Shimei atĩrĩ, “Wee ndũgũkua.” Nake mūthamaki akĩmũhe ũhoru ũcio na mwĩhitwa.

²⁴ Na rĩrĩ, Mefiboshethu, mwana wa mūriũ wa Saũlũ, o nake n̄aikũrũkire agĩthĩĩ gũtũnga mũthamaki. Nake ndethambĩte magũrũ kana akenja nderu, o na kana akahũũra nguo ciake kuuma mũthenya ũrĩa mũthamaki aathiire nginya mũthenya ũrĩa aacookire arĩ na thayũ. ²⁵ Rĩrĩa ooimire Jerusalemu agatũnge mũthamaki, mũthamaki akĩmũũria atĩrĩ, “Mefiboshethu, nĩ kĩĩ kĩagiririe ũthĩĩ na nĩĩ?”

²⁶ Nake akiuga atĩrĩ, “Mũthamaki mwathi wakwa, nĩgũkorwo nĩ ndungata yaku ndĩ mwonju, ‘Ndoigire atĩrĩ, nĩngũigĩrĩra ndigiri yakwa matandĩko na ndĩmĩhaice, nĩguo hote gũthĩĩ na mũthamaki’. No Ziba ndungata yakwa akĩngunyanĩra. ²⁷ Na nĩacambĩtie ndungata yaku kũrĩ mũthamaki mwathi wakwa. Mwathi wakwa mũthamaki ahaana ta mũraika wa Ngai; nĩ ũndũ ũcio ĩka ũrĩa ũkuona kwagĩrĩire. ²⁸ Njaro ciothe cia guka ciagĩrĩirwo nĩ kũũragwo nĩ mũthamaki mwathi wakwa. No wee nĩwaheire ndungata yaku handũ na arĩa marĩĩagĩra metha-inĩ yaku. Nĩ ũndũ ũcio ndĩ na kĩhooto kĩrĩkũ gĩa gũgũkaĩra rĩngĩ mũthamaki wakwa?”

²⁹ Mũthamaki akĩmwĩra atĩrĩ, “Nĩ kĩĩ kĩngĩtũma warie makĩria ma ũguo? Ndaathana atĩ wee na Ziba mũgayane mũgũnda.”

³⁰ Mefiboshethu akĩira mũthamaki atĩrĩ, “Reke oe mĩgũnda yothe, kuona atĩ wee mwathi wakwa nĩũcookete mũciĩ na thayũ.”

³¹ Nĩngĩ Barizilai, ũrĩa Mũgileadi agĩkũrũka kuuma Rogelimu akaringe Rũũĩ rwa Jorodani me hamwe na mũthamaki, na amumagarie njĩra-inĩ ya kuuma kũu. ³² Na rĩrĩ, Barizilai aarĩ mũthuuri mũkũrũ mũno wa mĩaka mĩrongo ĩnana. Nĩwe waheaga mũthamaki irio hĩndĩ ĩrĩa aikarĩte Mahanaimu, tondũ aarĩ mũndũ mũtongu mũno. ³³ Nake mũthamaki akĩira Barizilai atĩrĩ,

“Nītūringe mūrīmo nawe, tūthiī ūikare hamwe na nīi Jerusalemu, na nīndīrīkūheaga irio.”

³⁴ Nowe Barizilai agĩcookeria mūthamaki atīrī, “Nī mīaka īngī iigana atīa nīi ngūtūūra muoyo nīguo nyambate thiī Jerusalemu hamwe na mūthamaki? ³⁵ Rīu ndī na ūkūrū wa mīaka mīrongo īnana. No menye ūtiganu wa ūndū mwega na mūūru? Ndungata yaku yahota gūcama kīrīa īrarīa na kīrīa īranyua? No hote kūigua mīgambo ya arūme na ya andū-a-nja makīina? Nī kīi kīngītūma ndungata yaku itūike mūrigo ūngī kūrī mūthamaki mwathi wakwa? ³⁶ Ndungata yaku nīkūringa Rūūi rwa Jorodani hamwe na mūthamaki handū ha itīina inini, no nī kīi kīngītūma mūthamaki andīhe nīi na njīra īyo? ³⁷ Reke ndungata yaku īcooke, nīgeetha ngaakuīra itūura-inī rīakwa hakuhī na mbīrīra ya baba na maitū. No rīrī, ndungata yaku Kimuhamu nīiringe hamwe na mūthamaki mwathi wakwa. Mīike o ūrīa ūkuona kwagīrīire.”

³⁸ Mūthamaki akiuga atīrī, “Kimuhamu nīekūringa hamwe na nīi, na nīngūmwīka o ūrīa ūngīona kwagīrīire. Na ūrīa wothe ūngīenda kuuma kūrī nīi nī ngūgwīkīra.”

³⁹ Nī ūndū ūcio andū othe makīringa Rūūi rwa Jorodani, nake mūthamaki agĩcooka akīringa. Mūthamaki akīmunya Barizilai na akīmūrathima, nake Barizilai agĩcooka gwake mūciī.

⁴⁰ Rīrīa mūthamaki aaringire mūrīmo agīkinya Giligali, Kimuhamu akīringa hamwe nake. Nacio mbūtū ciothe cia ita cia Juda na nuthu ya mbūtū cia ita cia Isiraeli ikīringia mūthamaki.

⁴¹ Thuutha wa kahinda kanini andū othe a Isiraeli nīmookaga kūrī mūthamaki makamwīra atīrī, “Nī kīi gīatūmire ariū a baba, andū a Juda, matūtunye mūthamaki na wara, na mamūcookie nyūmba yake kuuma mūrīmo wa Jorodani, hamwe na andū ake othe?”

⁴² Andũ othe a Juda magĩcookeria andũ a Isiraeli atĩrĩ, “Twekire ũguo tondũ mũthamaki nĩ wa nyũmba iitũ. Nĩ kĩĩ gĩgũtũma mũrakario nĩ ũhoru ũcio? Nĩ irio tũrĩite cia mũthamaki? Nĩ harĩ kĩndũ twĩyoeire ithuĩ ene?”

⁴³ Ningĩ andũ a Isiraeli magĩcookeria andũ a Juda atĩrĩ, “Ithuĩ tũrĩ na icunjĩ ikũmi kũrĩ mũthamaki, na hamwe na ũguo-rĩ, tũrĩ na kĩhooito gĩa gũtuĩka a Daudi gũkĩra inyuĩ. Nĩ ũndũ ũcio nĩ kĩĩ gĩgũtũma mūtũmene? Githĩ ti ithuĩ twarĩ a mbere kwaria ũhoru wa gũcookia mũthamaki witũ?”

No andũ a Juda magĩcookia marĩ na ũũru mũingĩ mũno o na gũkĩra andũ a Isiraeli.

20

Sheba Kũremera Daudi

¹ Na rirĩ, kwarĩ mũndũ wa ngũĩ wetagwo Sheba mũrũ wa Bikiri, Mũbenjamini, nake agĩkorwo aarĩ hau. Akĩhuha karumbeta, akĩanĩrĩra, akiuga atĩrĩ,

“Ithuĩ tũtirĩ na igai harĩ Daudi,

tũtirĩ na handũ harĩ mũrũ wa Jesii!

O mũndũ nĩacooke hema-inĩ yake, inyuĩ andũ a Isiraeli!”

² Nĩ ũndũ ũcio andũ othe a Isiraeli magĩtiganĩria Daudi, makĩrũmĩrĩra Sheba mũrũ wa Bikiri. No andũ a Juda makĩrũmĩrĩra mũthamaki wao kuuma Jorodani nginya Jerusalemu.

³ Rĩrĩa Daudi aacookire gĩkaro kĩa nyũmba yake ya ũthamaki kũu Jerusalemu-rĩ, akĩoya thuriya iria ikũmi aatigĩte imenyagĩrĩre nyũmba ya ũthamaki, makĩigwo nyũmba marangagĩrwo. Nĩamaheaga irio, no ndaakomire nao. Maatũũraga marĩ ahingĩre na matarĩĩ ta atumia a ndigwa nginya mũthenya wa gũkua.

⁴ Nake mũthamaki akĩĩra Amasa atĩrĩ, “Tũmanĩra andũ a Juda moke kũrĩ nĩ mũira wa matukũ matatũ

mataanathira, nawe mwene ũgaakorwo ho.” ⁵ No rĩrĩa Amasa aathiire gwĩta andũ a Juda, agĩkara ihinda iraya kũrĩ rĩrĩa mũthamaki aamwĩrite.

⁶ Daudi akĩra Abishai atĩrĩ, “Rĩu Sheba mūrũ wa Bikiri nĩegũtũgera ngero nene kũrĩ ĩrĩa twagerirwo nĩ Abisalomu. Oya andũ a mwathi waku mũmũteng’erie, kwaga ũguo aahota kuona matũura mairigĩre oorĩre kuo, na ithuĩ twage kũmuona.” ⁷ Nĩ ũndũ ũcio andũ a Joabu, na Akerehi, na Apelethi, na njamba ciothe iria ciarĩ hinya makiumagara matongoretio nĩ Abishai. Nao magĩthĩĩ moimĩte Jerusalemu, mateng’eretie Sheba mūrũ wa Bikiri.

⁸ Rĩrĩa maarĩ ihiga-inĩ rĩrĩa inene kũu Gibeoni, Amasa agĩũka kũmatũnga. Joabu eehumbĩte nguo ciake cia mbaara, na akehotoro mũcibi na rũhiũ rũrĩ njora thĩinĩ. Rĩrĩa aathiire mbere, rũhiũ rũu rũkiuma njora-inĩ.

⁹ Joabu akĩra Amasa atĩrĩ, “Ūrĩ mwega, mūrũ wa baba?” Hĩndĩ ĩyo Joabu akĩnyiita Amasa nderu na guoko gwake kwa ũrĩo nĩguo amũmumunye. ¹⁰ Amasa ndaatin-danĩrĩre na rũhiũ rũrĩa Joabu aanyiitĩte na guoko, nake Joabu akĩmũtheeca nda naruo, namo mara make maki-uma makĩgũa thĩ, na ndaigana kũmũtheeca rĩngĩ, nake Amasa agĩkua. Ningĩ Joabu na mūrũ wa nyina Abishai magĩteng’eria Sheba mūrũ wa Bikiri.

¹¹ Ūmwe wa andũ a Joabu akĩrũgama mwena-inĩ wa Amasa, akiuga atĩrĩ, “Mũndũ ũrĩa wotho ũrĩ mwena wa Joabu na mwena wa Daudi, nĩarũmĩrĩre Joabu!” ¹² Nake Amasa eegaragaragia thakame-inĩ yake arĩ njĩra gata-gatĩ, nake mũndũ ũcio akĩona atĩ mbũtũ ciothe cia ita nĩciarũgamaga hau. Rĩrĩa aamenyire atĩ o mũndũ aakinyaga harĩ Amasa akarũgama-rĩ, akĩmũkururia ku-uma njĩra-inĩ, akĩmũiga gĩthaka-inĩ, na akĩmũhumbĩra na nguo. ¹³ Amasa aarĩkia kweherio njĩra-inĩ, andũ othe makĩrũmĩrĩra Joabu, magĩteng’eria Sheba mūrũ wa Bikiri.

¹⁴ Sheba akīhītūkīra mīhīrīga-inī yothe ya Isiraeli, agīkinya Abeli-Bethi-Maaka, akīhītūkīra būrūri-inī wothe wa Aberi, arīa moonganire hamwe na makīmūrūmīrīra. ¹⁵ Nacio mbūtū ciothe cia ita hamwe na Joabu igīūka na ikīrigiicīria Sheba kūu Abeli-Bethi-Maaka. Magīthondeka kīhumbu gīa tīiri kūrigania na itūūra, nakīo gīkīambatio nginya rūthingo rwa na nja rwa ūgitīri wa itūūra. Na rīrīa maahūūruga rūthingo nīguo marūmomore-rī, ¹⁶ mūdū-wa-nja ūmwe mūūgī agīitana arī thīinī wa itūūra rīu, akiuga atīrī, “Ta thikīrīria! Ta thikīrīria! İrai Joabu oke haha nīguo njarie nake.” ¹⁷ Nake agīthīi erekeire harī we; nake mūdū-wa-nja ūcio akīmūūria atīrī, “Wee nīwe Joabu?”

Nake agīcookia atīrī, “İi nī nīi.”

Nake akiuga atīrī, “Gīthikīrīrie ūrīa ndungata yaku ikuuga.”

Nake akiuga atīrī, “Nī thikīrīrie.”

¹⁸ Mūdū-wa-nja ūcio agīthīi na mbere kwaria, akiuga atīrī, “Tene-rī, ciugo ici nīciaragio, gūkeerwo atīrī ‘Andū makaahooyaga kīrīra kūu Abeli.’ Naguo ūhoro ūgaathirīra kuo. ¹⁹ İthui-rī, tūrī andū a thayū na ehokeku thīinī wa Isiraeli. Wee ūrageria kwananga itūūra rīrī, na nīrīo nyina wa Isiraeli. Nī kīi gīgūtūma wende kūniina igai rīa Jehova?”

²⁰ Joabu agīcookia atīrī, “Ūhoro ūcio ūrondaihīrīria! Ūhoro wa kūniina na kwananga ūrondaihīrīria! ²¹ Ūguo tiguu ūhoro ūtariī. Mūdū wītagwo Sheba mūrū wa Bikiri, kuuma būrūri ūrīa ūrī irīma wa Efiraimu, nīarīkītie kwambararia guoko ookīrīre mūthamaki, ookīrīre Daudi. Tūnengerei mūdū ūcio ūmwe tu, na nīngūtigana na itūūra rīrī.”

Mūdū-wa-nja ūcio akīra Joabu atīrī, “Nīūgūikīrio mūtwe wake kuuma rūthingo-inī.”

²² Hīndī ĩyo mūtumia ũcio agĩthĩĩ kūrĩ andũ othe arĩ na mataaro macio make ma ũũgĩ, nao magĩtinia mūtwe wa Sheba mūrũ wa Bikiri, makĩũikĩria Joabu. Nĩ ũndũ ũcio Joabu akĩhuha karumbeta, nao andũ ake makĩharagana kuuma itũũra-inĩ, o mũndũ agĩcooka gwake mũciĩ. Nake Joabu agĩcooka kūrĩ mũthamaki kũu Jerusalemu.

²³ Joabu nĩwe warĩ mũnene wa mbũtũ ciothe cia ita cia Isiraeli; nake Benaia mūrũ wa Jehoiada aarĩ mũnene wa Akerethi, o na Apelethi; ²⁴ Adoniramumu aarĩ mũtongoria wa kũrutithia wĩra wa hinya; nake Jehoshafatu mūrũ wa Ahiludu nĩwe warĩ mwandĩki wa maũndũ ma ihinda rĩu; ²⁵ nake Sheva nĩwe warĩ mwandĩki-marũa; Zadoku na Abiatharu maarĩ athĩnjĩri-Ngai; ²⁶ nake Ira, ũria Mũnjairi, aarĩ mũthĩnjĩri-Ngai wa Daudi.

21

Andũ a Gibeoni Kũrĩhĩrio

¹ Na rĩrĩ, hĩndĩ ya wathani wa Daudi, nĩ kwagĩire na ng'aragu ya mĩaka ĩtatũ ĩrũmanĩrĩire; nĩ ũndũ ũcio Daudi agĩtuĩria ũhoru harĩ Jehova. Nake Jehova akiuga atĩrĩ, “Ũndũ ũyũ ũrekĩka nĩ ũndũ wa Saũlũ o na ũndũ wa nyũmba yake ĩrĩa yaitithagia thakame; nĩ ũndũ wa ũria ooragire andũ a Gibeoni.”

² Nake mũthamaki agĩita andũ a Gibeoni akĩaria nao. (Na rĩrĩ, andũ acio a Gibeoni matiarĩ amwe na Isiraeli no maarĩ matigari ma Aamori; no andũ a Isiraeli nĩme-hĩtĩte atĩ matikamooraga, no Saũlũ nĩ ũndũ wa kiyo kirĩa aarĩ nakĩo nĩ ũndũ wa Isiraeli na Juda nĩageririe kũmaniina.) ³ Nake Daudi akĩũria andũ acio a Gibeoni atĩrĩ, “Mũngĩenda ndĩmwĩkĩre atĩa? Nĩ ũndũ ũrĩkũ ingĩka tũiguane nĩguo mũrathime igai rĩa Jehova?”

⁴ Nao andũ a Gibeoni makĩmũcookeria atĩrĩ, “Tũti-agĩrĩrwo nĩ kũuria tũheo betha kana thahabu kuuma

kūrī Saülū, kana nyumba yake, o na tūtiri na kihooto gĩa kũuraga mũndũ o na ũmwe thĩinĩ wa Isiraeli.”

Daudi akĩmoria atĩrĩ, “Nĩatia mũngĩenda ndĩmwĩkĩre?”

⁵ Nao magĩcookeria mũthamaki atĩrĩ, “Ha ũhoro wa mũndũ ũrĩa watũniinire na agĩtũciirĩra ũũru nĩgeetha tũthire, nĩguo tũtikagĩe na handũ o na ha thĩinĩ wa Isiraeli-rĩ, ⁶ reke tũneo arũme mũgwanja a njaro ciake nĩgeetha mooragwo na maraganio mbere ya Jehova kũu Gibeaa ya Saülū, ũrĩa mũthũure wa Jehova.”

Nĩ ũndũ ũcio mũthamaki akiuga atĩrĩ, “Nĩngũmaneana kūrĩ inyuũ.”

⁷ Na rĩrĩ, mũthamaki akĩhonokia Mefiboshethu mũrũ wa Jonathani, mũrũ wa Saülū, nĩ ũndũ wa mwĩhĩtwa ũrĩa Daudi na Jonathani mũrũ wa Saülū meehĩtanĩire mbere ya Jehova. ⁸ No mũthamaki agĩkuua Arimoni na Mefiboshethu, ariũ acio eerĩ a Aia, mwarĩ wa Rizipa, arĩa aaciariĩre Saülū, hamwe na ariũ atano a Merabu mwarĩ wa Saülū, arĩa aaciariĩre Adirieli mũrũ wa Barizilai ũrĩa Mũmeholathu; ⁹ Nake akĩmaneana kūrĩ Gibeoni, arĩa maamooragire na makĩmaaragania kĩrĩma-inĩ mbere ya Jehova. Acio othe mũgwanja maagũire hamwe; mooragirwo hĩndĩ ya matukũ ma kĩaambĩrĩria kĩa magetha, o rĩrĩa magetha ma cairi maambagĩrĩria.

¹⁰ Rizipa mwarĩ wa Aia akĩoya nguo ya ikũnia, na akĩmĩara hau ihiga igũrũ. Kuuma kĩaambĩrĩria kĩa magetha nginya rĩrĩa mbura yoirĩire mĩrĩrĩ ũyo, ndaarekire ciimba icio ihutio nĩ nyoni cia rĩera-inĩ mũthenya, kana ihutio nĩ nyamũ cia gĩthaka ũtukũ. ¹¹ Hĩndĩ irĩa Daudi eerirwo ũrĩa Rizipa mwarĩ wa Aia, thuriya ya Saülū, eekĩte-rĩ, ¹² agĩthĩ, agĩkuua mahĩndĩ ma Saülū o na ma mũriũ Jonathani kuuma kwa andũ a Jabeshi-Gileadi. Maamarutĩte na hitho kuuma kĩaaro-inĩ kĩa mũingĩ kũu Bethi-Shani, harĩa Afilisti maamacuurĩtie, thuutha wa kũuragĩra Saülū

kūu Giliboa. ¹³ Daudi agĩkuua mahĩndĩ ma Saũlũ na ma mũriũ Jonathani kuuma kūu, na mahĩndĩ ma andũ arĩa moragĩtwo makaaraganio kūu makĩũnganio.

¹⁴ Nao magĩthika mahĩndĩ ma Saũlũ na ma mũriũ Jonathani mbĩrĩra-inĩ ya Kishu, ithe wa Saũlũ, kūu Zela thĩinĩ wa Benjamini, na magĩika maũndũ mothe marĩa mũthamaki aathanĩte. Thuutha ũcio Ngai agĩcookia ma-hooya marĩa maahooetwo nĩ ũndũ wa bũrũri.

Mbaara ya Gũũkĩrĩra Afilisti

¹⁵ O rĩngĩ nĩ kwagĩire mbaara gatagatĩ ka Afilisti na Isiraeli. Daudi agĩkũrũka agĩthiĩ hamwe na andũ ake makarũe na Afilisti, na akĩnoga mũno. ¹⁶ Nake Ishibi-Benobu ũrĩa warĩ ũmwe wa njiaro cia Rafa, ũrĩa mũthia wa itimũ rĩake warĩ na ũritũ wa cekeri magana matatũ,* na aarĩ na rũhiũ rwa njora rwerũ, ũcio akiuga nĩekũũraga Daudi. ¹⁷ No rĩrĩ, Abishai mũrũ wa Zerua akĩhonokia Daudi; akĩgũtha Mũfilisti ũcio akĩgũa, akĩmũũraga. Ningĩ andũ a Daudi makĩhĩta kũrĩ we makiuga atĩrĩ, “Gũtirĩ hĩndĩ ũgacooka gũthiĩ mbaara-inĩ na ithuĩ, nĩgeetha tawa wa Isiraeli ndũkahorio.”

¹⁸ Ningĩ thuutha wa mahinda macio, makĩgĩa na mbaara ĩngĩ na Afilisti kūu Gobu. Hĩndĩ ĩyo Sibekai ũrĩa Mũhushathi akĩũraga Safu, ũmwe wa njiaro cia Rafa.

¹⁹ Ningĩ mbaara-inĩ ĩngĩ makĩrũa na Afilisti kūu Gobu, Elihanani mũrũ wa Jaare-Oregimu ũrĩa Mũbethilehemu akĩũraga Goliathũ ũrĩa Mũgiiti, ũrĩa warĩ na itimũ rĩarĩ na mũtĩ ũigana ta mũtĩ wa mũtumi ngoora.

²⁰ Ningĩ mbaara-inĩ ĩngĩ ĩrĩa yarĩ kūu Gathu, nakuo kwarĩ na mũndũ mũnene mũno, warĩ na ciara ithathatũ o guoko, na ciara ithathatũ o kũgũrũ, ciothe ciarĩ ciara mĩrongo ĩrĩ na inya. O na ningĩ aarĩ wa rũciarĩ rwa Rafa.

* 21:16 nĩ ta giramu 330

²¹ Rĩrĩa aanyũrũririe andũ a Isiraeli, Jonathani mũrũ wa Shimea, mũrũ wa nyina na Daudi, akĩmũũraga.

²² Andũ acio ana maarĩ a rũciaro rwa Rafa kũu Gathu nao makĩgũa moko-inĩ ma Daudi na andũ ake.

22

Rwĩmbo rwa Daudi rwa Kũgooca Ngai

¹ Daudi nĩainĩire Jehova na ciugo cia rwĩmbo rũrũ rĩrĩa Jehova aamũhonokirie kuuma guoko-inĩ gwa thũ ciake ciothe na kuuma guoko-inĩ gwa Saũlũ. ² Akiuga atĩrĩ:

“Jehova nĩwe rwaro rwakwa rwa ihiga, na nĩwe rũirigo rwakwa rwa hinya, na mũkũũri wakwa;

³ Ngai wakwa nĩwe rwaro rwakwa rwa ihiga, na nĩwe rĩũrĩro rĩakwa, na ngo yakwa, na rũhĩa rwa ũhonokio wakwa.

Nĩwe kũihitho gĩakwa kĩrũmu, na nĩwe rĩũrĩro rĩakwa, na mũhonokia wakwa; nĩwe ũũhonokagia kuuma kũrĩ andũ arĩa mahũthagĩra hinya.

⁴ Ngayagĩra Jehova, ũrĩa wagĩrĩire kũgoocagwo, na ngahonokio kuuma kũrĩ thũ ciakwa.

⁵ “Ndiihũ cia gĩkuũ nĩciathiũrũrũkĩirie; nakĩo kĩguũ kĩa mwanangĩko gĩkĩngĩria hinya.

⁶ Mĩhĩndo ya mbĩrĩra ĩgĩĩthiororokeria; nayo mĩtego ya gĩkuũ ĩkĩĩhotorerera.

⁷ Mĩnyamaro-inĩ yakwa ndakaiire Jehova; ngĩgĩkaĩra Ngai wakwa arĩ hekarũ-inĩ yake.

Nĩ aiguire mũgambo wakwa, kĩrĩro gĩakwa gĩgĩkinya matũ-inĩ make.

⁸ “Thĩ ĩkĩinaina na ĩgĩthingitha; Nayo mĩthingi ya igũrũ ĩkĩenyanya;

- īkīnaina tondū aarī mūrakaru.
⁹ Ndogo īkiuma maniūrū-inī make īkīambata na igūrū;
 mwaki wa kūniinana ūkiuma kanua-inī gake.
 Kanua-inī gake hakoima makara mekūrīrīmbūka.
¹⁰ Aahingūrīre igūrū agīkūrūka thī;
 matu matumanu maarī rungu rwa makinya make.
¹¹ Ombūkire akuuītuo nī ikerubi;
 akīambata na igūrū na mathagu ma rūhuho.
¹² Ehumbīrīre na nduma,
 agītua matu marīa mairū ma mbura ma kūu igūrū
 hema yake ya kūmūthiūrūrūkīria.
¹³ Kuuma ūkengi ūrīa warī harī we,
 heni igīakana mwaki.
¹⁴ Jehova akīruruma arī kūu igūrū;
 mūgambo wa Ūrīa-ūrī-Igūrū-Mūno, ūkīguuo.
¹⁵ Aikirie mīguī, akīharagania thū,
 agīciikīria rūheni, agīcingatithia.
¹⁶ Hīndī īyo mīkuru ya iria īkīonekana,
 nayo mīthingi ya thī ikīhumbūrio,
 nī ūndū wa irūithia rīa Jehova,
 o na nī ūndū wa ihurutana rīa mīhūmū ya maniūrū
 make.
¹⁷ “Agītambūrūkia guoko gwake kuuma o kūu igūrū
 akīnyiita;
 akīnguucia akīnduta maaī-inī kūrīa kūrīku.
¹⁸ Andeithūrīre thū yakwa īrī hinya,
 akīndeithūra kūrī arīa maathūire, o acio
 maangīrītie hinya.
¹⁹ Maanjīhotoreire mūthenya ūrīa ndaarī na mūtino,
 no Jehova nīwe warī mūtiirīrīri wakwa.
²⁰ Andutire na nja akīndwara handū haariī,
 akīndeithūra tondū nīakenetio nī niī.

- 21 “Jehova anjĩkiire maũndũ kũringana na ũthingu wakwa,
akandiha kũringana na ũtheru wa moko makwa.
- 22 Nĩgũkorwo nĩnũmĩtie njĩra cia Jehova;
ndiĩkite ũũru na ũndũ wa kũhutĩra Ngai wakwa.
- 23 Mawatho make mothe marĩ mbere yakwa;
ndihutatĩire irĩra cia watho wake wa kũrũmĩrĩrwo.
- 24 Ngoretwo itarĩ na ũcuuke ndĩ mbere yake,
na ngemenyerera ndikehie.
- 25 Jehova andĩhĩte kũringana na ũthingu wakwa,
akandiha kũringana na ũtheru wakwa maitho-inĩ make.
- 26 “Ūrĩ mwĩhokeku harĩ arĩa makwĩhokete,
na harĩ mũndũ ũrĩa ũtarĩ ũcuuke ũrĩonanagia
ndũrĩ ũcuuke,
- 27 kũrĩ ũrĩa wĩtheragia wĩonanagia ũrĩ mũtheru,
no harĩ ũrĩa ũrĩ mũthiire mũogomu ũgatuĩka
njũhĩga.
- 28 Wee ũhonokagia andũ arĩa enyihia,
no maitho maku monaga andũ arĩa etĩĩ nĩguo
ũmaconorithie.
- 29 Wee Jehova, nĩwe tawa wakwa,
Jehova atũmaga nduma yakwa ĩtuĩke ũtheri.
- 30 Ndĩ na ũteithio waku no hote gũtharĩkĩra mbũtũ ya
ita;
ndĩ na Ngai wakwa no hote kũrũga rũthingo.
- 31 “Mũrungu-rĩ, njĩra ciake nĩnginyanĩru;
kiugo kĩa Jehova gĩtirĩ ihĩtia.
Nĩwe ngo ya arĩa othe mehithaga harĩ we.
- 32 Nĩ ũndũ-rĩ, nũũ Mũrungu tiga Jehova?
Na nũũ Rwaro rwa Ihiga tiga Ngai witũ?
- 33 Nĩ Mũrungu ũũhotoraga hinya na ũhoti,

agatūma njīra yakwa ikinyanīre.

34 Atūmaga magūrū makwa mateng'ere o ta ma
thwariga;

aahotithagia kūrūgama kūdū gūtūgīru.

35 We nīwe wonagia moko makwa mūrūire wa mbaara;
moko makwa no mageete ūta wa gīcango.

36 Ūūheaga ngo yaku ya ūhootani;
ūinamagīrīra thī ūkaanenehia.

37 Ūnjaramagīria njīra ya kūrīa thiiagīra,
nīgeetha magūrū makwa matigatirūke.

38 “Ndaingatithirie thū ciakwa na ngīcihehenja;
ndiacookire na thuutha nginya rīrīa cianiinirwo.

39 Ndacihehenjire biū, ikīremwo nī gūūkīra,
ikīgūa thī magūrū-inī makwa.

40 Wee ūūheaga hinya wa kūrūa mbaara,
ūgatūma thū ciakwa ciinamīrīre magūrū-inī
makwa.

41 Watūmire thū ciakwa ihūdūke ciūre,
na nī ngīniina arīa maathūire.

42 Maakaire mateithio, no hatiarī na wa kūmahonokia,
magīkīra Jehova no ndaametīkire.

43 Ndaamahūūrire makīhaana ta rūkūngū rūhinyu rwa
thī;
ngīmahūūra na ngīmarangīrīria ta ndooro ya
njīra-inī.

44 “Nīūūhonoketie ngaaga gūtharīkīrwo nī andū akwa;
ūndūūragia ndī mūtongoria wa ndūrīrī.

Andū itooī nīmakandungatagīra,

45 andū a kūngī mokaga kūrī nī menyīihītie;
maigua ngumo yakwa, makanjathīkīra.

46 Othe makuuaga ngoro;

mokaga makīinainaga moimīte ciīhitho-inī ciao
cia hinya.

- ⁴⁷ “Jehova atūūraga muoyo! O we Rwaro rwakwa rwa
Ihiga arogoocwo!
Ngai arotūgīrio, o we Rwaro rwakwa rwa Ihiga, na
Mūhonokia wakwa!
- ⁴⁸ We nīwe Mūrungu ūrīa ūndīhagīria,
aigaga ndūrīrī rungu rwa watho wakwa,
⁴⁹ nīwe ūīhonokagia kuuma kūrī thū ciakwa.
Wanyambatīririe igūrū rīa andū arīa maathūire,
ūkīndeithūra harī andū arīa mahūthagīra hinya.
- ⁵⁰ Nī ūndū ūcio, Wee Jehova, nīndīkūgoocaga ndī gata-
gatī ka ndūrīrī,
ndīinaga ngagooca rīitwa rīaku.
- ⁵¹ Aheaga mūthamaki wake ūhootani mūnene;
akonania ūtugi wake ūtathiraga kūrī ūcio wake
mūitīrīrie maguta,
kūrī Daudi na njiaro ciake nginya tene.”

23

Ciugo cia Kūrīgīrīria cia Daudi

- ¹ Ici nīcio ciugo cia kūrīgīrīria cia Daudi:
“Ūyū nīguo ūhoru wa Daudi mūrū wa Jesii,
ūhoru wa mūndū ūrīa watūgīrītio nī Ūrīa-ūrī-
Igūrū-Mūno,
mūndū ūrīa waitīrīrio maguta nī Ngai wa Jakubu,
na akeendeka mūno nī gūtungīra Isiraeli thaburi:
- ² “Roho wa Jehova nīaririe na kanua gakwa;
kiugo gīake kīarī rūrīmī-inī rwakwa.
- ³ Ngai wa Isiraeli nīaririe,
ūcio Rwaro rwa Ihiga rwa Isiraeli akīnjīra atīrī:

‘Rīrīa mūndū egwatha andū na ūthingu,
 agaathana etigīrīte Ngai-rī,
 4 atuīkaga ta ūtheri wa rūciinī riūa rīkīratha,
 o rūciinī rūrīa rūtarī matu,
 agatuīka ta ūtheri ūrīa ūūkaga mbura yarīkia gūkīa,
 mbura īrīa īmeragia nyeki.’

5 “Githī nyūmba yakwa ti nūngīrīru harī Mūrungu?
 Githī ndaarīkanīire na nīī kīrīkanīro gīa gūtūūra,
 gīthondeketwo na gīkarūma maūndū-inī mothe?
 Githī ndegūtūma ūhonokio wakwa ūkinyanīre,
 na aahingīrie maūndū mothe marīa ndīriragīria?

6 No andū arīa aaganu othe magaateo ta mīigua,
 īrīa ītacookanagīrīrio na guoko.

7 Ūrīa wothe ūhutagia mīigua
 ahūthagīra kīndū gīa kīgera kana mūtī wa itimū;
 mīigua īcinagīrwo o harīa īīgītwo.”

Andū Njamba a Daudi

8 Maya nīmo marīitwa ma andū a Daudi arīa maarī njamba:

Joshebu-Bashebethu ūrīa Mūtakemoni aarī mūnene wa arīa atatū; nake oire itimū rīake, akīhūūra andū magana manana, na akīmooraga mbaara-inī īmwe.

9 Mūnini wake eetagwo Eleazaru mūrū wa Dodai, ūrīa Mūahohi. Arī ūmwe wa arīa atatū maarī njamba, aarī hamwe na Daudi hīndī īrīa moogitire Afilisti arīa monganīte hamwe kūu Pasi-Damimu marūe mbaara. Hīndī īyo andū a Isiraeli makīūra, ¹⁰ nowe ndoorire, akīrūgama hau, akīhūūra Afilisti acio nginya guoko gwake gūkīganda kūnyiitīte rūhiū rwa njora o ro ūguo. Jehova akīrehe ūhootani mūnene mūthenya ūcio. Nacio mbūtū cia ita igīcooka kūrī Eleazaru, magatahe indo cia andū arīa akuū.

¹¹ Ūrĩa warūmĩrĩire aarĩ Shama mūrũ wa Agee ūrĩa Mũharari. Rĩrĩa Afilisti monganire hamwe handũ haarĩ mũgũnda waiyũrĩte ndengũ, ita rĩa Isiraeli rĩkĩmoorĩra. ¹² No Shama ndoorire, akĩrũgama gatagatĩ ka mũgũnda ũcio. Akĩũgitĩra na akĩũraga Afilisti acio, nake Jehova akĩrehe ũhootani mũnene.

¹³ Hĩndĩ ya magetha-rĩ, andũ atatũ thĩinĩ wa arĩa mĩrongo itatũ anene magĩkũrũka kũrĩ Daudi kũu ngurunga-inĩ ya Adulamu, hĩndĩ irĩa mbũtũ ya Afilisti yambĩte hema Gĩtuamba-inĩ kĩa Refaimu. ¹⁴ Ihinda-inĩ rĩu Daudi aarĩ kĩhitho-inĩ kĩa hinya, nayo mbũtũ ya Afilisti yarĩ Bethilehemu. ¹⁵ Daudi akĩrĩrĩria maaĩ, akiuga atĩrĩ, “Naarĩ korwo kũrĩ mũndũ ũngĩndehera maaĩ ma kũnyua kuuma gĩthima-inĩ kĩrĩa kĩrĩ hakuhĩ na kĩhingo kĩa Bethilehemu!” ¹⁶ Nĩ ũndũ ũcio andũ acio atatũ maarĩ njamba magĩtuĩkanĩria gatagatĩ-inĩ ga ita rĩa Afilisti, magĩtaha maaĩ gĩthima-inĩ kiu kĩarĩ hakuhĩ na kĩhingo kĩa Bethilehemu na makĩmatwarĩra Daudi. No Daudi akĩrega kũmanyua; akĩmaita mbere ya Jehova. ¹⁷ Daudi akiuga atĩrĩ, “Jehova, ũhoru ũyũ ũrondaihĩrĩria, njage gwĩka ũguo! Githĩ ĩno ti thakame ya andũ arĩa megũthiite magetwarĩrĩria ũgwati-inĩ wa gĩkuũ?” Nake Daudi akĩrega kũnyua maaĩ macio.

Maũndũ ta macio nĩmo meekagwo nĩ njamba icio ithatũ.

¹⁸ Abishai mūrũ wa nyina na Joabu mūrũ wa Zeruia aarĩ mũnene wa acio atatũ. Nake akĩoya itimũ rĩake agĩtharĩkĩra andũ magana matatũ, akĩmooraga; nĩ ũndũ ũcio akĩgĩa igweta o ta acio Atatũ. ¹⁹ Githĩ ndaakĩgĩire na igweta inene gũkĩra acio Atatũ? Nĩwe watuĩkire mũnene wao, o na gũtuĩka ndaataranĩirio nao.

²⁰ Benaia mūrũ wa Jehoiada aarĩ mūrũĩ njamba wa ku-uma Kabizeeli, ūrĩa wekire maũndũ manene ma ũcamba. Nĩooragire njamba nene igĩrĩ cia ita cia Moabi. Ningĩ

nīatoonyire irima mūthenya warĩ na tharunji, akĩũraga mūrũũthi. ²¹ Nĩooragire Mūmisiri mũndũ warĩ mūnene mūno. O na gũtuũka Mūmisiri ũcio nĩanyiitĩte itimũ na guoko gwake, Benaia aathiire akĩmũtharĩkĩra na njũgũma. Nake akĩhuria itimũ rĩu rĩarĩ guoko-inĩ kwa Mūmisiri ũcio na akĩmũũraga na itimũ rĩu rĩake. ²² Macio nĩmo maũndũ ma ũcamba marĩa meekirwo nĩ Benaia mūrũ wa Jehoiada; o nake aarĩ igweta o ta andũ arĩa atatũ maarĩ njamba. ²³ Nĩatĩtwo gũkĩra arĩa Mĩrongo Ītatũ, no ndaataranĩirio na acio Atatũ. Nake Daudi akĩmũtua mūnene wa arĩa maamũrangagĩra.

²⁴ Thĩinĩ wa andũ acio Mĩrongo Ītatũ, arĩa angĩ maarĩ:
 Asaheli mūrũ wa nyina na Joabu,
 na Elihanani mūrũ wa Dodo wa kuuma Bethlehemu,
²⁵ na Shama ũrĩa Mũharodi,
 na Elika ũrĩa Mũharodi,
²⁶ na Helezu ũrĩa Mũpaliti,
 na Ira mūrũ wa Ikeshu kuuma Tekoa,
²⁷ na Abiezeri kuuma Anathothu,
 na Mebunai ũrĩa Mũhushathi,
²⁸ na Zalimoni ũrĩa Mũahohi,
 na Maharai ũrĩa Mūnetofathi,
²⁹ na Helebu mūrũ wa Baana ũrĩa Mūnetofathi,
 na Ithai mūrũ wa Ribai wa kuuma Gibe a kũu Benjaminini,
³⁰ na Benaia ũrĩa Mũpirathoni,
 na Hidai wa kuuma tũrũũ-inĩ twa Gaashu,
³¹ na Abi-Aliboni ũrĩa Mũaribathi,
 na Azamavethu ũrĩa Mũbahurimu,
³² na Eliahaba ũrĩa Mũshaaliboni,
 na ariũ a Jasheni,
 na Jonathani ³³ mūrũ wa Shama ũrĩa Mũharari,
 na Ahiamu mūrũ wa Sharari ũrĩa Mũharari,
³⁴ na Elifeleti mūrũ wa Ahasabai ũrĩa Mũmaakathi,
 na Eliamu mūrũ wa Ahithofeli ũrĩa Mũgiloni,

³⁵ Herezo ũrĩa Mũkarimeli,

na Parai ũrĩa Mũaribi,

³⁶ na Igali mūrũ wa Nathani kuuma Zoba,

na mūrũ wa Hagili,

³⁷ na Zeleku ũrĩa Mũamoni,

na Naharai ũrĩa Mũbeerothi,

ũrĩa wakuuagĩra Joabu mūrũ wa Zeruia indo ciake cia mbaara,

³⁸ na Ira ũrĩa Mũithiri,

na Garebi ũrĩa Mũithiri,

³⁹ na Uria ũrĩa Mũhiti.

Andũ acio othe maarĩ mĩrongo ĩtatũ na mũgwanja.

24

Daudi gũtara Arũi a Mbaara

¹ Ningĩ marakara ma Jehova magĩakanĩra Isiraeli, nake agĩkĩra Daudi meciiria nĩguo amokĩrĩre, akĩmwĩra atĩrĩ, “Thiĩ ũgatara andũ a Isiraeli na a Juda.”

² Nĩ ũndũ ũcio mũthamaki akĩra Joabu na anene a mbũtũ cia ita arĩa maarĩ hamwe nake atĩrĩ, “Thiĩ kũndũ guothe mĩhĩrĩga-inĩ ya Isiraeli kuuma Dani nginya Birishiba na mũtare andũ arĩa mangĩthiĩ mbaara, nĩgeetha menye ũrĩa maigana.”

³ No Joabu agĩcookeria mũthamaki atĩrĩ, “Jehova Ngai waku angĩrongerera mbũtũ cia ita maita igana, namo maitho ma mũthamaki marokĩionera. No nĩ kĩ gĩgũtũma mũthamaki mwathi wakwa ende gwĩka ũndũ ta ũyũ?”

⁴ No rĩrĩ, mũthamaki, agĩkararia Joabu na anene a mbũtũ cia ita; nĩ ũndũ ũcio makĩehera mbere ya mũthamaki, magĩthiĩ gũtara andũ a Isiraeli arĩa mangĩathiire mbaara.

⁵ Nao marĩkia kũringa Rũũ rwa Jorodani, makĩamba hema hakuhĩ na Aroeri, mwena wa gũthini wa itũũra mũkuru-inĩ ũcio, magĩtuĩkanĩria bũrũri wa Gadi

magĩkinya Jazeri. ⁶ Magĩthiĩ Gileadi na bŭrŭri-inĩ ũcio wa Tahatimu-Hodishi, magĩkinya Dani-Jaani magĩthiŭrŭka magĩkinya Sidoni. ⁷ Magĩcooka magĩthiĩ merekeire kĩirigo kĩa hinya gĩa Turo na matũura-inĩ mothe ma andũ a Ahivi na ma Kaanani. Marigĩrĩrio-ini magĩthiĩ Birishiba kũu Negevu ya Juda.

⁸ Maarĩkia gũthiĩ bŭrŭri-inĩ wothe, magĩcooka Jerusalemu thuutha wa mĩeri kenda na matukũ mĩrongo iĩrĩ.

⁹ Joabu agĩcookeria mũthamaki ũhoru wa mũigana wa andũ arĩa mangĩathiire mbaara: Thĩinĩ wa Isiraeli kwarĩ andũ ngiri magana manana andũ marĩ na hinya wa mwĩrĩ na mangĩahotire kũhũthĩra rũhiũ rwa njora, nakuo Juda maarĩ ngiri magana matano.

¹⁰ Nake Daudi agĩthiĩnĩka mũno ngoro thuutha wa gũtara andũ acio a mbaara, akĩra Jehova atĩrĩ, “Nĩnjĩhĩtie mũno nĩ ũndũ wa ũguo njĩkĩte. Rĩu, Wee Jehova-rĩ, ndagũthaitha ũnjehererie mahĩtia, nĩ ndungata yaku. Nĩnjĩkĩte ũndũ wa ũrimũ mũno.”

¹¹ Daudi atanokĩra rŭciinĩ rŭrũ rŭngĩ-rĩ, kiugo kĩa Jehova gĩgĩkinyĩra mũnabii Gadi, ũrĩa wonagĩra Daudi maũndũ, akĩrwo atĩrĩ: ¹² “Thiĩ ũkeere Daudi ũũ, ‘Jehova ekuuga atĩrĩ: Ũrĩ na maũndũ matatũ ma gũthuura. Nawe ũthuure ũmwe wamo ũrĩa ngũkũherithia nago.’”

¹³ Nĩ ũndũ ũcio Gadi agĩthiĩ kŭrĩ Daudi, akĩmwĩra atĩrĩ, “Nĩũkwenda bŭrŭri waku ũgĩe ng’aragu mĩaka itatũ? Kana ũũrĩre thũ ciaku mĩeri itatũ igũteng’eretie? Kana kũgĩe matukũ matatũ ma mũrimũ wa mũthiro bŭrŭri-inĩ waku? Rĩu-rĩ, wĩciirie ũhoru ũcio ũtue itua rĩrĩa ngũcookeria ũcio ũndũmĩte.”

¹⁴ Daudi akĩra Gadi atĩrĩ, “Rĩu ndĩ na thĩina mũnene mũno. Nĩtũrekwo tũgũwĩre moko-inĩ ma Jehova, nĩgũko-

rwo tha ciake nĩ nyingĩ; no ndũkareke ngwe moko-inĩ ma andũ.”

¹⁵ Nĩ ũndũ ũcio Jehova akĩrehera Isiraeli mũthiro kuuma rūciinĩ rūu nginya ihinda rĩrĩa rĩatuĩtwo; nao andũ ngiri mĩrongo mũgwanja kuuma Dani nginya Birishiba magĩkua. ¹⁶ Rĩrĩa mūraika aatambūrũkirie guoko gwake nĩguo aanange Jerusalemu-rĩ, Jehova akĩigua kĩaha nĩ ũndũ wa kĩnyariirĩko kũu akĩira mūraika ũcio wanangaga andũ atĩrĩ, “Tigĩra hau! Eheria guoko gwaku.” Hĩndĩ ĩyo mūraika ũcio wa Jehova aarũgamĩte kĩhuhĩro-inĩ kĩa ngano kĩa Arauna, ũrĩa Mũjebusi.

¹⁷ Rĩrĩa Daudi onire mūraika ũcio woragaga andũ-rĩ, akĩira Jehova atĩrĩ, “Nĩ nĩ nĩ njĩhĩtie o na ngeeka ũũru. Andũ aya matariĩ o ta ng’ondũ. Nĩatĩa mekĩte? Reke guoko gwaku kũnjũkĩrĩre nĩ na nyũmba yakwa.”

Daudi gwaka Kĩgongona

¹⁸ Mũthenya o ro ũcio-rĩ, Gadi agĩthĩ kũrĩ Daudi, akĩmwĩra atĩrĩ, “Ambata, ũthĩ wakĩre Jehova kĩgongona, hau kĩhuhĩro-inĩ kĩa ngano* kĩa Arauna ũrĩa Mũjebusi.” ¹⁹ Nĩ ũndũ ũcio Daudi akĩambata o ta ũrĩa Jehova aathanĩte na kanua ka Gadi. ²⁰ Rĩrĩa Arauna aacũthĩrĩirie akĩona mũthamaki na andũ ake magĩũka marorete na kũrĩ we, akiuma nja, akĩinamĩrĩra mbere ya mũthamaki aturumithĩtie ũthiũ thĩ.

²¹ Arauna akiuga atĩrĩ, “Nĩ kĩĩ gĩatũma mũthamaki mwathi wakwa oke kũrĩ ndungata yake?”

Nake Daudi akĩmũcookeria atĩrĩ, “Ndooka kũgũra kĩhuhĩro gĩaku kĩa ngano, nĩguo njakĩre Jehova kĩgongona, nĩgeetha mũthiro ũyũ ũkorete andũ ũthire.”

²² Arauna akĩira Daudi atĩrĩ, “Reke mũthamaki mwathi wakwa oe kĩrĩa gĩothe angĩenda akĩrute igongona. Ici

* 24:18 Ihuhĩro cia ngano ciakagwo kũndũ kũrĩa gũtũũgĩru nĩ ũndũ wa rūhuhũ.

nĩ ndegwa cia igongona rĩa njino, na ici nĩcio indo cia kũhuhĩra ngano namo macooki ma ndegwa matuĩke ngũ.

²³ Atĩrĩrĩ, wee mũthamaki, Arauna nĩaheana indo icio ciothe kũrĩ mũthamaki.” Arauna agĩcooka akĩmwĩra atĩrĩ, “Jehova Ngai waku arogwĩtikĩra.”

²⁴ Mũthamaki agĩcookeria Arauna atĩrĩ, “Aca, no nginya ngũrĩhe nĩ ũndũ wakĩo. Ndikũrutĩra Jehova Ngai wakwa igongona rĩa njino rĩa kĩndũ kĩrĩa itarĩhiire thogora.”

Nĩ ũndũ ũcio Daudi akĩgũra kĩhuhĩro kũu kĩa ngano na ndegwa icio na cekerĩ mĩrongo ĩtano cia betha.[†] ²⁵ Daudi agĩakĩra Jehova kĩgongona hau, na akĩruta maruta ma njino na maruta ma ũiguano. Hĩndĩ ĩyo Jehova agĩcookia mahooya nĩ ũndũ wa bũrũri, naguo mũthiro ũrĩa warĩ Isiraeli ũgĩthira.

† 24:24 nĩ ta giramu 660

Biblica® Kiugo Gĩtheru Kĩa Ngai Kĩhingũre

Gikuyu: Biblica® Kiugo Gĩtheru Kĩa Ngai Kĩhingũre (Bible) of Kenya
copyright © 2013 Biblica, Inc.

Language: Kikuyu (Gikuyu)

Contributor: Biblica, Inc.

Biblica® Open Kikuyu Holy Word of God™

Copyright © 2013 by Biblica, Inc.

“Biblica” is a trademark registered in the United States Patent and Trademark Office by Biblica, Inc. Used with permission.

All content on open.bible is made available under a Creative Commons Attribution-ShareAlike 4.0 License (<http://creativecommons.org/licenses/by-sa/4.0/>).

You are free to:

Share — copy and redistribute the material in any medium or format

Adapt — remix, transform, and build upon the material for any purpose, even commercially

Under the following conditions:

Attribution — You must attribute the work as follows: “Original work available for free at www.biblica.com and open.bible” Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original.

Use of trademarks: Biblica® is a trademark registered in the United States Patent and Trademark Office by Biblica, Inc. and may not be included on any derivative works. Unaltered content from open.bible must include the Biblica® trademark when distributed to others. If you alter the content in any way, you must remove the Biblica® trademark before distributing your work.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2021-11-15

PDF generated using Haiola and XeLaTeX on 29 Jan 2022 from source files dated 29 Jan 2022

fc720f23-baa2-5544-80d5-259f1bddeb63